

冊府元龜

巡按福建監察御史臣李<sub>臣</sub>訂正

分守建南道左布政使臣胡維霖 叅閱

知建陽縣事 臣黃國琦 較釋

銓選部

條制第三

唐憲宗元和二年正月制曰江淮大縣每歲據闕委三省御史臺諸司長官節度觀察使各舉堪任縣令不限選數並許赴集臺省官及刺史亦令有闕先於縣令中揀擇如有能否與元舉人同賞罰復置具員



簿以序內外庶官

五月中書門下舉奏正月赦文令於中書置具員簿以序內外庶官爰自近年因循遂廢清源正本莫急於斯令京嘗叅官及外官五品已上前資見任起元和二年量定考數置具員簿應諸州刺史次赤府少尹次赤令諸陵令五府司馬及上州以上上佐東宮官除左右庶子王府官四考已上並請五考其臺官先定月數令諸侍御史滿十三月殿中侍御史滿十八月監察御史依前二十五月與轉三省官並三省餘官及三考四考外其文武官四品已上並五考商

量與改尚書省四品已上文武官三品已上緣品秩已崇不可限以此例須有進改並臨時奏聽進止其權知官後至兩考然與正授不得用權知官資政轉其內外諸色官中緣官闕要人及緣事須有改移者卽不在嘗格敘遷之限諸道及諸使副使行軍司馬判官參議掌書記支使推官巡官等有勅充職掌舉簡較五品已上官及臺省官三考與改轉餘官四考與改如未經考者並諸授同類官經兩考者依資與轉如前銜已使下官未經考者請以本官改轉經三考者依資與轉仍許通前任計爲考數其軍州戎



鎮別立功效事跡彰著爲衆所知者須別甄錄卽具  
上事奏聽進止其罷使郎官御史任依舊冬薦其諸  
道應須薦送人等自今已後諸郎官御史者便其時  
限同爲冬薦所同准例簡勘申送中書門下六品已  
上官非郎官御史者狀到後望付吏部准貞元元年  
二月七日勅處分從之  
三年三月詔秘書省弘文館左春坊司經局較書郎  
正字宜委吏部自今於平留選人中擇取志行貞進  
藝學精通者注擬綜覈名實唯在得人不得以登科  
及第其較書正字限考入畿縣簿尉任依嘗格

四月詔重定舉縣令之法准元年赦書所舉縣令皆  
令直言其事不得妄爲文飾吏部舉其事狀隨事簡  
勘者今主司只畧勘資歷未究材能自今已後宜委  
吏部精加考覈必使詳實所冀舉不妄施官無虛授  
仍令四時注擬其觀察刺史所舉不得授以本州府  
縣令到任後有罪犯其舉主准前勅貶罰  
四年正月中書門下奏伏准元和二年制告舉薦縣  
令等前後勅文非一有司難於遵守令旨中外所舉  
縣令並依表狀十月三十日到省省司精加磨勘依  
平選人例分入三銓注擬平選人中有資考事跡人



才與縣令相類卽先注擬時集望停從之令長親人之吏也此以資授多才不稱官故令庶僚舉也上才或不屑就受薦者多不出其類徒以未涉資序遂超踐優論者以爲啓倖門故稍復舊制焉  
三月詔令後宗正寺脩撰圖譜官知匭使判官至考滿日宜各減兩選

七年八月中書門下奏請州府五品已上官替後委本道觀察使及長吏量其才行幹能堪獎用者具人才資歷每年冬季一度聞薦其罷使郎官御史委中書門下兩省御史臺尚書省掌參及諸司職事三品

已上文官左右庶子詹事諸司少卿監子司業少尹國子博士長安萬年縣令太宰博士著作郎秘書丞等每年冬准此聞薦諸司府參佐簡較試官從元授官月日計如是五品已上官及臺省官經三十六箇月奏改轉如未經考便有事及停替官本限之外更加十箇月卽任申奏從之

八年九月刑部奏准今年七月二十一日勅諸色左降官等經五考滿許量移者其貶降日授正員官或無責詞亦是責授並請至五考滿然後許本任處申闕並餘左降官緣任處多在遐遠至考滿日其申牒



稽遲致使留滯者其刺史錄事參軍等請與下考如蒲後隨已申牒未量移間其祿料並准天寶貞元兩度勅文依舊支給其本犯十惡等罪已有正名請依舊從之

十一月勅有司奏申光蔡三州州縣官緣給復無稅應支俸料今量定員額及課料其六品已下官仍令吏部於選人中擇優與注擬每月課料錢委所司量與支給其員外課料等本額待給復年滿一切仍舊十二月吏部奏比遠州縣官請量減選四選五選六選請減一選七選八選九選各請減兩選十選十一

選十二選各減三選伏以比遠處都七十五州選人試後懼不及限者卽伏請注擬雖有此例每年不過一百餘人其比遠州縣皆是開元天寶中仁風樂土今者或以俸錢减小或以地在遠方凡事平流從前不注至若勸課耕種歸懷逃亡其所擇才急於近地有司若不注授所在唯聞假攝編氓益困田土益荒請減前件選勅旨宜依

十一年九月中書門下奏字人之官從古所重遂許論薦冀得循良其或不依節文虛指事迹旣開謬舉之路是長倖求之風望自今已後所舉人事迹與節



九尺六寸制三  
卷之六十三  
文不同及簡勘無據并到官後不稱職及有負犯等事並請量輕重坐其舉主輕則削奪重則貶謫伏以前後勅文雖有條約比來銓覈多務因循今重申明所期畫一其舉人到省後所簡勘如與節文不同仰具事由並舉主名銜申中書門下如所司鹵莽便與判成察知事狀違越則所司舉主同坐從之  
十二年六月詔自今已後應受權判官京官一考已上外官兩考已上職事條舉者然與正授如未及正授別要除改者不得全用權知判官資如特委重務卽不在此限

十三年六月停每年舉薦縣令

十四年三月吏部奏請用鄆曹濮等一十二州州縣官員闕先是淄青不申闕員至是叛將李師道誅始用闕焉

穆宗以元和十五年正月卽位二月中書門下奏見任正員官充職掌等比限兩考及授官經二周年以上方許奏請然與依資改轉有才在下位者不免留滯請自今已後諸道使應奏請正員官充職掌經一年者卽依資與改轉如未周者卽量與同類試官如此處分庶將得中勅旨依奉



長慶二年三月詔曰如聞近日武班之中淹滯頗久  
 又有諸道薦送大將或隨節使歸朝自今已後宜令  
 神策六軍使及南衙掌參武官具由歷并前後功績  
 牒送中書門下若勲伐素高人才特異者量加獎擢  
 其掌參武官准具員年月日改轉勿令淹滯諸道軍  
 府大將監察以上官者三周年與改轉大將未曾奏  
 官者亦仰奏請應天下諸軍各委本道據守舊額不  
 得輒有減省官健有死王事者三周年不得停本分  
 衣糧自憲宗御宇至此十八年矣凡朔方吳蜀泊山  
 東兩河累興問罪之師其間兵戈少息者不五  
 六歲故帝自藩邸細聞軍旅之事謂戎臣武卒掌宜  
 姑息繼統之始則以恣行給資神策禁旅須左右三

軍兵建號長行者其名最衆人尚獲五萬至於非時  
 賜與不可勝紀驕橫不戢其勢已甚今又降優假之  
 詔俾其蕃大復有工賈胥吏窺昇朝籍者厚持緡貨  
 納於方鎮方鎮嗜利者即以大將文符給之偽其職  
 秩年月未幾則求薦聞必曰某以歲久宜遷某以殊  
 勲合獎宰臣奏擬下得王官欲望兵復於農官清其  
 品難矣

九月詔曰廣德貞元再有勅旨要官密歲並不許任  
 京兆判司畿令兩赤縣丞簿尉等緣人不遵行更資  
 提舉自今已後切宜禁斷  
 十月中書門下奏諸司要官密戚周親見任府縣官  
 伏以所立隄防止緣權要今諸司卿監保傅三少詹  
 事祭酒王傅西班將較等亦無威力敢冒典章一繫



防閑事誠太過自今已後應宰臣及左右僕射御史大夫中丞給事舍人左右丞諸司尚書侍郎度支鹽鐵使在京城者并諸王駙馬其周以上親并女婿親外甥請准廣德二年三月十一日及貞元二年二月十三日勅不得任京兆府判司次赤及畿令長安萬年丞簿尉其餘一切並不在此限冀典法易遵羣情大愜詔付所司永爲掌式

敬宗寶歷元年正月詔曰如聞去冬吏部選人駁放者衆或文狀粟錯或書判差池主司守文不得不爾旣施惠澤亦在霑恩其長名及雜駁選人如有未離京城者委吏部今月內簡勘除涉踰濫者餘並却收以比遠殘闕注擬如不情願不可強之又刺史縣令已後若無過犯未滿三周年不得除替如理行尤異但議就加其有才宜他職灼然要籍者中書門下先具事由及授上年月奏聽進上

二年二月容管經畧使嚴公素上言容州及普寧等七縣請同廣韶桂賀四州例比選從之

十一月詔京百司應帶職奏正員官者自今已後宜於諸司及府縣見在任官中選擇便以本官充職如見任無相當者卽任於當年見選人中奏用便據資



序與官不要更待銓試仍永爲掌式

十二月詔應請以一子官廻授諸親者自今已後須是周親仍勘驗分明方可注擬從有司之請也

是月吏部又奏伏以吏部每年集人及定留放至於注擬皆約闕員近者入仕歲增由闕日少實由諸道州府所奏悉行致令選司士子無闕貧弱者凍餒滋甚留滯者喧訴益繁至有待選十餘年累糧千餘里累駁之後方敢望官注擬之時別遇勅授私惠行於外府怨謗歸於有司特望明立節文令自今已後諸司諸使天下州府選限內不得奏六品已下官勅旨

依奏

文宗太和元年正月山陵使奏伏以景陵光陵已來諸司諸使所差補押當及雜職掌等官皆據舊例合得減選其中有無選可減者便放非時選吏曹緣是承優放選例多判成有過格年深身名踰濫赴嘗選不得者多求減選職掌圖得非時集因緣優勅成此倖門其吏曹爲弊頗甚今請應差前資官充職掌並不得取選數已過格人庶絕奸冒勅旨依奏

是月詔應緣諸軍使充押當雜任使合承優減選人請差前資官充不得取選數過格人



五月禮部奏山陵挽郎准光陵合補二百二十人伏以近者仕進多門身名轉濫苟循往例為弊滋深取前弘文崇文館生及已考滿太廟齋郎充如人數不足兼取前明經充其中有未過者請放冬集仍減兩選已定各集者減二選從之

八月勅諸道諸軍使應奏判官并每年冬薦等所奏判官除新開幕府擬員額置署外其向後奏請如是元闕即云官某職今奏某人充如已有今更奏即云某職某人緣某事停奏某人替具前使下臺省官合冬薦者除府使罷外既有薦用當且要籍豈合數月

依字本補二十五

之間便稱去職自今已後如帶職掌授臺省未經兩考者不在冬薦限如其中實有事故其他官據品秩合冬薦者則依元勅

九月中書門下奏諸道應奏州縣官銜散試官及無出身人幕府遷授致仕官諸京司奏流外諸道進奏官等兩畿及諸道奏長馬縣令錄事參軍簿尉等兩京及諸道州府六品已下官除初授外並合是吏部注擬近日優勞資蔭入仕轉多每年選集無闕可授若容濫請是啓倖門遂使平人不無受屈今請並停淮山南三川硤內及諸道比遠雖吏部注擬不情願



赴任者及元不注擬者其縣令參軍長吏倚賴義不容私如有才術優长假攝勞效特許前資見任及有出身人中奏請每道不得過三五人如諸道縣令錄事參軍政事異能決疑及緝理殘破若須旌賞者許所在奏論然須指事而言在選限內亦請准實歷二年十二月七日勅處分京諸司流外官並每年繫部闕員今並不許奏請致仕酌法循舊頗越典章自今請自掌叅官五品以外官及四品者許致仕餘停又幕府遷授章服貞元元和之間使府奏職至侍御史然後兼省官至於章服皆獎時效人思勸勉克已慕名近日奏殿中及戎卒便請朱紫數事俱行其中自綠腰金皆非典故請自侍御史後年月足後便始與省官至於朱紫許於本使府有事跡尤異爲衆所知者然許奏請唯副使行軍奏職時如先着綠便許着緋餘不在此限又諸道進奏官舊例皆不奏正官近旣奏請仍於別道占請有俸祿處頗乖典制今請並奏當道官如資歷已至五品考滿日已前者望許至考滿日從之近歲倖門雜啓以前四條者又甚時宰臣方貞百度故次第矯革焉

十月中書門下奏應禮部諸色貢舉人及吏部諸色



科目選人等凡未有出身未有官如有文學只合於禮部應舉有出身有官合於吏部赴科目選近年以來格文差斥多有白身及用散試官並稱鄉貢者竝赴科目選及注擬之時卽妄論資次曾無格例有司不知所守其宏詞拔萃學究一經則有定制然亦請不在用散試官限其三禮三傳一史三史明習律令第如白身並令國子監及州府同明經進士薦送如考試及第明習律令同明經一史三禮三傳同進士三史嘗年闕送吏部便授第二任官如有出身及有正員官本是吏部嘗選人則任於吏部不限選數應

科目三史則超一資授官如制舉人旣諸色人中皆得選試則無出身官人並可以請不用散試官從之二年閏三月都省奏落下吏部三銓甲內今春注超資官凡六十七人勅部省所執是格銓司所引是例互相陳列頗亦紛紜所貴清而能通亦繇議事以制論選已過方則爭今選人可哀難更停滯其三銓已授官都省落下並依舊注與重團奏仍限五日內畢其中如官超一資半資已今據稍優者至後選日量事降所尚書侍御注擬不一致令都省以此與詞鄭綱丁公著各罰一季俸東銓所落人數較少楊嗣復



罰兩月俸其今年選格仍分明標出近例有可行者  
收入格不可者於格內書破則所司有文可守選人  
無路俸求時尚書左丞韋弘景以吏部注擬不公選  
人多超資授官紀按其事落下勅申吏部引例以爲  
據選人輩又惜官已成道路沸騰日倍宰相喧訴遂  
降此勅

六月勅應諸軍使及諸道軍將兼特授正官如聞內  
外官曹悉皆充滿上自要重下至卑散班行府縣更  
無闕員或未經考便須更替相訟薦請爲弊滋深况  
設官有定額不可增加列職無算數難兼命秩又文

武名分授受各殊其諸使諸道將較等自今後宜依  
注例除舊有正官外並不得兼授正官

九月勅吏部今年東都選事宜令河南尹王播權知  
侍郎銓試畢日停

三年二月勅領南選補雖是舊制遠路行李未免勞  
人當處若有才能廉使宜委推擇待兵息事簡續舉  
舊章其南選便可更便一二年

四月中書門下奏內外文武官除授近日人多干競  
跡罕貞脩或日詣宰司自陳功狀或上黷宸扆曲祈  
恩私亦有粗因勞績已授官榮及居今任別無課效



唯引向前事狀只希更與遷昇凡是此流稍要立制  
伏望自今須有除授並先選吏跡有聞行已務退者  
隨才獎用如有跡涉浮躁事形微求者量加擯棄從  
之又詔東都選事宜權停

七月詔諸道進奏官舊例多是本道差文武職掌官  
充自後遂有奏帶正官者近又有諸兼簡較官及憲  
官者遍相援引轉無章程自今已後更有奏請帶正  
官者不得兼簡較及憲官如准諸道諸軍諸使職掌  
官例請簡較兼憲官充則不得帶正員官其見任有  
官者且聽仍至合轉改時商量處分

四年五月中書門下奏准太和元年九月十九日勅  
釐革兩畿及諸道奏請州縣官唯山劔三川峽內及  
諸道比遠許奏縣令錄事叅軍其餘並停自勅下以  
來諸道累有奏請如滄景德棣後已與數員伏以  
勅令頒行不合違越苟有便宜則須改張自今已後  
山劔三川峽內及諸道比遠州縣官有出身及前資  
正員官人中每道除錄事外望各許奏三數員如河  
北諸道滄景德棣之類經破傷之後及靈夏邠寧麟  
坊涇原振武豐州全無俸料有出身人及正員官悉  
不肯去吏部從前多不注擬如假攝有勞望許於諸



色人中量事奏三數員其餘勒約及期限並依太和元年九月十九日勅處分可之

七月吏部奏當司兩銓侍郎廳伏以吏部居文昌首曹侍郎爲尚書二職銓庭所宜順序廳事固有等差舊以尚書廳之次爲中銓其次爲東銓自乾元中侍郎崔器以當時休咎爲虞奏改中銓爲西銓久次侍郎居左以新除侍郎居右因循倒置議者非之伏請今以後以久次侍郎居西銓以新除侍郎居東銓勅旨依奏

是月吏部奏三銓正令史每銓元置七人今請依太和元年流外銓起請置五人減下二人南曹令史一十五人今請依太和元年流外銓起請節文減下三人奉勅宜依

五年二月吏部奏請量抽大和三年終已來至今年三月四月已來得員及計人成三考關四十五員伏緣去冬諸色黃衣叅選者倍多於嘗年其間十七人皆是勲臣貴戚及嘗叅官子弟不可任遠處州縣官三銓以當年合用闕方員發遣之外每銓各有十餘人未得官今請准元和中及長慶初勅例據見在人數量抽前件闕注擬畢具所用闕聞奏勅旨宜依



六月勅應選人未試已前南曹駁放後經廢置詳斷及准堂判却收比來南曹據給帖人數續到續試銓司吏不考判便同平留選人例注擬稍涉僥倖自今已後應有此色竝請待正月十日准格詳斷限畢都引試判不及格并雜犯及續簡勘庫報并前選子案不同並駁放不在更陳狀披訴及重詳斷之限是月又勅應選人及冬集人子案門下省簡勘畢後比來更考南曹令史收領却納門下甲庫在於公事頗甚勞煩自今已後請勒吏部過院本令史便自分付甲庫以備他年簡勘請門下省勒甲庫令史每過選切點勘收什明立文案據官吏等遞相分付不得妄有破除南曹申請之時如有稱失落欠少本令史專知官准簡報楷改違條例處分是月吏部奏准貞元十八年四月一日勅諸親注得外官欲赴任自今已後每年須先奏聞者今請至時准勅簡勘聞奏其諸親已薨歿子弟注得外官者准前後勅合奏聞起今已後請便赴集更不在重奏限其給解處審勘責仍於家狀一一具言親等第如違駁放勅旨依奏

是月詔南曹簡勘廢置詳斷選人儻有屈事足以往



覆辨明近年已來不問有理無理多經中書門下接  
訴致令有司失職莫知所守選人踰分唯望哀矜若  
無條約恐更滋甚起今已後其被駁選人若已依期  
限經廢置詳斷不成自謂有屈任經中書門下陳狀  
狀到吏部後銓曹及廢置更爲詳斷審其事理可收  
卽收如散至三人已上廢置郎官請牒都省罰直如  
至十人以上具事狀申中書門下取處分如未經廢  
置詳斷公然越訴或有已經詳斷不錯輒更有投論  
者選人量殿兩選當具格文榜示冀無冤濫亦免俸  
求

七月詔諸色藝能授官自今已後如有罪犯停職者  
委本司牒報吏部不在敘用限

六年五月御史臺奏請諸道節度觀察防禦經畧等  
使有子孫授京城及諸州府官合赴任奏請勾留在  
本道事伏以本置官員籍其任守吏曹注擬皆是職  
司况調選須有出身合年十五已上比及於二十已  
下十年則二十五年足可以爲成人矣今則皆稱年  
小奏請勾留在於相承習以成例若實年小卽不合  
早補身名若實當年又何慮爲官不了今請諸方鎮  
子孫應選授及奏授官一切勒歸本任不得輒更奏



留如或恩出殊賞特賜一子者年五十已下卽任奏聽進止庶得藩方絕塵冒之請州府無假攝之官中外遵承典章不紊從之

八月詔凡權知授官皆緣本資稍優未合便得藉才擢用故且權知若通計五考卽便同正授極爲僥倖自今已後應諸州府五品長馬權知正授通計六考滿停其勒留官如有未滿六考停給課科者便准此却與支給

七年五月中書門下奏國之根本繫於生靈人之性命縣於守宰刺史猶官重事隔莫得躬親親人之切無如縣令况自兵興已來仍歲災歉百姓凋弊救弊之術在於擇吏又錄事參軍糾察屬縣課責下僚一郡紀綱藉其提舉若曰令吏曹注擬無由得盡人才真偽難知貪廉莫辨准太和二年赦書已令揀擇緣吏部起請多有異同訪聞近年已來所舉殆絕又去年吏部舉請令郎官御史等舉薦勘爲縣令錄事參軍者雖有保任之言殊非責成之道臺省官假使是其親故或素所深知旣非得於任官未必究其事實豈若考績効於理所聽善惡於臆謠則改之否臧較然易辨臣等商量望令京兆河南尹及天下刺史各



於本府本道嘗選人中揀勘擇堪為縣令司錄錄事  
 參軍人名具課績才能聞薦其諸州先申牒觀察使  
 都加考覈申送至吏部至選集日不要就選場更試  
 書判吏部尚書侍郎引詣銓曹試時務狀一道訪以  
 理人之術及自陳歷任以來課績令其一一條對但  
 事理明切不假詞華取其理識優長者以為等第便  
 於大縣及難理處注擬仍取稅五萬貫以下縣注授  
 即免盡占嘗選人闕員其刺史所舉縣令錄事參軍  
 如并有人人得上下考就加爵秩者任年考已深者  
 便優與進改其縣令錄事參軍如在任績効明著兼

得上下考及陟狀者許非時放選仍優與處分便委  
 本州長吏聞薦庶得詳其實效如所舉縣令錄事參  
 軍犯贓一百貫已下者刺史量削階秩一百貫已上  
 者移守僻遠小郡觀察使望委中書門下奏聽進止  
 其犯贓官縱累逢恩赦亦不在收敘之限所舉人中  
 如有兩人善政一人贓犯亦得贖免如此則長吏切  
 於求理須自擇才上奉朝章必無濫舉可之  
其餘官見任得  
上下考與減三選如兩選已下者同非時人例處分  
 七月中書門下奏諸道諸使停罷郎官御史等望令  
 罷職後其所任官經兩考已上方得冬薦如所任官



未經考者許以罷職後計月日成兩考卽得冬薦如考數未滿便冬薦者其所舉官量加殿罰如文學才行堪獎用者中書門下別加採擇不在此限諸州府上佐罷秩後便求本道薦狀入城今中外官員年不盈溢聞薦繼至除授稍難其上佐考滿後望量立年限經二年已上方得聞薦其非時替者更守二年卽似稍屈望一年後許冬薦如才行行政績爲衆所知者望委中書門下搜訪與昇獎不在此限例從之

八年正月吏部奏准勅疎理諸色入仕人等今諸司流外令吏府史掌固禮生楷書醫工及諸軍諸使承

優官典摠一千九百七十二員共請權減六百五十七員兵部奏應管左右仗千牛僕寺殿中省進馬左右金吾仗長上共一百六十一員今三色共請減六十七員文簡武簡三衛每年三銓都請留六十人爲定禮部奏明經弘文館生大廟郊社齋郎掌坐等共五百五十二人今六色共請一百三十八人從之九月詔復集吏部禮部兵部今年選舉銓試之期遞延一月

九年十二月詔中書門下吏部各有甲庫籍天下諸色出身以防淪濫諸道應奏諸色官改轉悉下三庫



以稽其實委給事中中書舍人吏部格式郎中各與本甲庫官具有無異同申中書門下然與進擬如諸司使所奏不實或以無爲有各加懲殿以絕奸源

開成元年二月中書門下上言諸州刺史諸府少尹次赤令諸州府五品已上官并掌叅官等在任之例約是三載命代之後遽則到京人數旣多闕員掌少稍經時月則訴饑寒起今後請據舊章刺史及五品已上官在外應受替去任非有徵召未得到京宜委所在州府每兩月一度申中書門下其初狀仍具前任政績受代月日中書門下准前置具員量才除授

其家在上都因自歸止者京兆府申奏  
十月中書門下奏兩畿及兩京奏六品已下官除勅授外並吏部注擬准太和五年五月二十六日勅中書門下奏近勅隔絕諸司奏六品已下寬免占吏部闕員亦稍絕邪濫其兩府司錄及尉知捕賊皆藉幹能用差專任吏部所注或慮與事稍乖自今已後京兆府及河南府司錄及知捕賊蒲椽官員合入者充其餘並准太和元年九月勅及太和四年五月四日勅處分

二年二月吏部奏准制請敘一子官張茂昭男左武



衛大將軍克勤進狀稱男小未堪授任請迴與外甥  
准起請節文只許迴與周親克勤又奏承前諸家請  
迴授外甥並蒙允許中書省牒吏部詳斷左司員外  
郎權判吏部廢置裴夷直斷一子官恩在報功貴延  
賞典若無已子許及周親今張克勤自有息男妄以  
外甥奏請移於他族知是何人儻涉賣官實爲亂法  
雖接近日勅例難破著定節文國章旣在必行宅相  
恐難虛授具狀上中書門下并牒中書省克勤所請  
不允遂爲定例

四月中書門下奏天下之理在能官人古人以還委

重吏部自循資授任衡鏡失權立格去留簿書得計  
比緣今年三月選事方畢四月已後方脩來年格文  
五月頒下及到地遠已及秋期今請起今月與下長  
格所在州府榜門曉示其所資官取本任黃衣本貫  
解一千里內三月十日解到省二千里三千里遞加  
十日並勒本州賫送選人發解訖任各歸家其年七  
月十五日齊於所住府看吏部長榜定留放其得留  
人並限其年十二月十日齊到省試注唱正月內銓  
門開永爲定例如其年合用闕少選人文書無違犯  
可較則於本色闕內先集選深人年長人其餘人旣



無闕可集南曹俱爲判成榜示所任州縣府許次年  
取本任州府公驗便依限赴集更不重取本任本貫  
解舊格已久不便更改事遂不行

七月諸道有以試御奏授州縣官者帝於閣內謂宰  
臣曰每年選人辛勤用苦尚無缺員與之試御奏授  
不可輕許唯河北道吏部不注許其奏請繇是四方  
之倖人暫息

十二月庚戌中書門下奏武官合入卽將等其堪送  
名者請中書門下准吏部送名例磨勘仍先過堂然  
後比擬從之

三年三月吏部奏去年所脩長定選格或乖往制頗  
不便人不可久施請却用舊格從之

八月辛丑中書門下奏伏准開成元年正月一日勅  
諸州刺史少尹赤令並聳叅官等授替去任非有徵  
召不得到京宜委所在州府取其由歷每兩月一度  
申中書門下省叅詳勅意以前件官到京後未有除  
授旅食可矜且令在外以候遷陟訪聞遠地不論朝  
旨將謂故有勅格阻其戀闕之心干進者亦以迭來  
守道者便成廢滯恐須釐正以徇重情其諸道州府  
應有前件官等得替後任赴闕廷或家在四方亦隨



所便從之

十二月詔曰應諸道奏請軍將兼巡內州別駕長史判司等近日諸色入流人多官途隘窄諸道軍將自有衣糧優厚之處仍兼月俸若更占州縣員闕則文吏無所容身須有申明人知分限起今已後諸道節度團練防禦等使不得更奏大將充巡內上佐等官今日已前見任者且依任前守官應京有司有專知別當及諸色職掌等近日諸司奏請州縣官及六品已下官充本司職掌援引舊例色目漸多致使勾留溢於舊額起今已後各於本司見任官寮之中揀擇差署不得別更奏官如是勅額職名當司無官員相當者卽任准舊例奏請

四年正月吏部奏嶺南五管及黔中道選補准元和十年九月二十九日格五年一集至選前一年南曹先牒五管等道催索文解又准太和五年三月十八日勅權停令欲准格簡舉排比伏請裁下詔曰兩道選補停罷多時極爲利便隔年舉奏撓動遠情宜更停五年議者以爲人遠地便不足爲慮曾不知舊制無遺於遠人事可經久令一方之政得其人則一境之人受其福苟非其人則假攝之官皆授里人至有



胥賈用賄求假本州令錄哀斂剝下而又恣其喜怒以報已私自罷選補使今藩方差官杼軸之歎南人益困

二月勅吏部去冬粟錯及長名駁放選人等如聞經冬在京窮悴頗甚街衢接訴有可哀矜宜委吏部簡勘條流鈐轄如非淪濫正身不到欠考欠選大段取病之外卽與重收以比遠殘闕注擬不得用平留闕如員闕不相當一唱不伏官者便任冬集不在更論訴限如未經中書門下陳狀勅下後不得續收今年已後不得以爲例

七月己丑詔曰諸門入仕人數轉多每年吏曹注擬無闕唯河北諸道河東澤潞山劔三川京北京西管内官員稍多假攝之中實有勞効每年許奏三兩人仍須是元額闕不得替見任人其餘諸道並不得奏人

五年七月潮州刺史林郇陽奏州縣官諸同漳河廣韶桂賀等州例吏曹注官勅旨潮州是嶺南大郡與韶州畧同宜下吏部准韶州例收闕注擬餘依

十一月嶺南節度使盧鈞奏當道伏以海嶠擇吏與江淮不同若非諳熟土風卽難搜求人瘼且嶺中往



之弊是南選今之弊是北資臣當管二十二州唯韶  
廣州官僚每年吏部選授道途遐遠瘴癘交侵選人  
若家事任持身名真實孰不自負無繇肯來更以俸  
入卑微每歲號為北遠若非下司貧弱令使卽是遠  
處無能之流比及到官皆有積債十中無一肯識廉  
恥臣到任四年備知情狀其潮州官吏伏望特循往  
例不令吏部注擬且委本道求才若攝官廉慎有聞  
依前許觀察使奏正事堪經久法可施行勅旨依奏

冊府元龜

冊府元龜

巡按福建監察御史臣李嗣京 訂正

知長樂縣事 臣夏允彝參閱

知建陽縣事 臣黃國琦較釋

銓選部

條制第四

唐武宗會昌元年五月中書奏州縣攝官假名求食  
常懷苟且不卹疲人其州縣闕少官員今後望委本  
州刺史於當州諸縣官中量賢劇分配公事勾當如  
官員數少力實不逮處卽於前資官選擇清謹有能



者差攝不得取散試官充

二年四月制准太和九年十二月十八日勅進士初合格竝令授諸州府叅軍及緊縣尉未經兩考不許奏職蓋以科第之人必弘理化黎元之弊欲使諸詳近者諸州長吏漸不遵承雖注縣官多靡使職苟從知已不念蒸人流例寢成供費不少况去年選格更改新條許本郡奏官便當府充職一人從事兩請料錢虎名吏曹正員不親本任公事其進士宜至合選年許諸道依資奏授試官充職如奏授州縣官即不在兼職之限

五年七月詔應在京百司官典優成授官人等既云趨吏執舉簿書優成命官須居散秩近日僭越殊紊舊規累資或至於登朝班序豈容於雜類自今已後如有改轉官宜止於中下州長馬但不能登朝事貴得體永為常式

六年五月制縣令員數至廣朝廷難悉諳知吏部三銓祇憑資考訪於近日多不得人委觀察使於前資攝官內精加選擇當具薦論如後犯贓連坐所舉人及判官重加懲責

宣宗大中六年正月 中書門下奏應天下令錄簿掾



有闕及見任見者改正委長吏舉其能者代之如舉之不當請准前後勅殿其舉主從之

五月詔吏部選格一日縣令司錄錄事參軍今任四上考減兩選餘官得四上考縣令司錄參軍得三考並減一選二日選人大功已上親連任停解如已得資者依本官選數集未得資及未上並同非時選人例放選

懿宗咸通十二年七月中書門下奏准今年六月十二日勅釐革諸道及在京諸司奏官并請章服事者其諸道奏州縣官司錄錄事參軍或見任公事敗闕不理切要替換及前任實有勞效且見有闕員卽任各舉所知每道奏請仍不得過兩人其河東潞府邠寧涇原靈武監夏振武天德鄜坊滄德易定三川等道觀察防禦等使及嶺南五管每道每年除令錄外許量奏簿尉及中下州判司及縣丞共三人偏州不在奏州縣官限其黔中所奏州縣官及大將管內卽任准舊例處分在京諸司及諸道帶職奏官或非時充替考限未滿並却與本資官諸道節度及都團練防禦使下將較奏轉試官及憲御等令諸節度使每年量許五人都團練防禦量許三人爲定不得更於



其外奏請其御史中丞已下卽准勅文條流須有軍功方可授任自今後如顯立戰伐功勞者任具事績申奏如簡勘不虛當別具商量處分以外輒不得更有奏請其幽鎮魏三道望且准承前舊例處分勅旨從之

僖宗廣明元年正月勅吏部選入粟錯長名駸放者除有身名踰濫及欠選欠考外以此遠殘闕收注哀帝天祐二年三月詔曰設官分職各有司存銓衡旣任於吏曹除授寧煩於宰執但所司注擬申到中書過驗酌量苟或差舛難可盡定近年除授其徒實

繁占選部之闕員擇切當之優便遂使三銓注擬之間皆曠職務且以宰臣所任提舉百辟唯務公平將致無私克臻有道應天下州府令錄並委吏部三銓注擬中書門下自天祐二年四月十一日後並不除授或有諸道薦守量留據狀詳度可否施行庶幾各司其局免致繁曠宰相提綱永存事體從宰臣所奏也

三年四月吏部奏比者格式申送員闕選人多有重疊皆是兩人同到本道致使磨勘之際各有爭論蓋是選人指闕之時妄稱事故銓司無因得知具狀須



與注擬如到任替闕參差請准舊條殿選除此外如是格式申送員闕仰且穩便去處請官不得更妄指射諸道假滿拋官不到任不放上停官不赴任員闕及違程不及限等員闕冀其畫一免悞銓司公事者詔曰比者吏部注官只憑格式送闕近以諸州不申闕解且從權指揮選人指射之時既不詳審銓司注唱之際遂使交加頗屬弊訛頻起論訟所司釐革合議允從

十一月詔應合赴吏部嘗調選人等三銓公事素有條流近年多不公平遂致授任重疊既聞爭競須暫停留今者元帥梁王動靜推公周旋陳理或慮選人羈旅特請准式施行兼緣已及深冬所司未有起請若或稽滯必緩程期功在考詳務令精當今年冬嘗調選人宜委三銓並准舊例處分如或踰濫輒違格文罪在官曹非止猾吏其四鎮管內官員須候本道申闕到省方可注擬

梁大祖開平元年四月勅開封府司錄參軍及六曹掾屬宜各置一員兩畿赤縣置令簿尉各一員  
二年十月勅省諸道州府六曹掾屬只留戶曹參軍一員通判六曹



乾化二年三月丙申詔曰夫興隆邦國必本於人民  
惠養疲羸允資於令長苟選求之踰濫固撫理之乖  
違如聞吏部擬官中書除授或緣親舊處約或爲勢  
要力干姑徇私情靡求才實念茲蠹弊宜舉條章自  
今已後應中書用人及吏部注擬並宜省藩身之才  
業驗爲政之否臧必有可觀方可任用如或尚行請  
託猶假貨財其所司人吏等必當推窮重加懲斷有  
司官長別有處分

後唐莊宗同光二年三月中書門下奏糾轄之任時  
謂外臺宰字之官古稱列爵如非朝命是廢國章近  
日諸道多是各例官御便指州縣請朝廷之正授樹  
藩鎮之私恩頗亂規程宜加條制自今後大鎮節度  
使管三州已上者每年許奏管內官三人如管三州  
已下者許奏管內官二人仍須有課績尤異方得上  
聞若止於簡慎無暇徵科及限是守嘗道只得書考  
旌善不得特有薦奏其防禦使每年只許奏一人並  
無尤異不得奏薦刺史無奏薦之例不得輒亂規程  
更有將資官員請他處除授請之橫薦最亂格文其  
已前事件如故違所司不得輒與通進若奏下中書  
亦不在施行之限



是月中書門下奏賞善罰惡致理之源選材任能爲政之本所在刺史縣令有政績尤異爲衆所知或招復戶口能增加賦稅者或辨雪冤獄能活人生命者及去害物之積弊立利人之新規有益於州縣爲衆所推者卽仰大處逐件分明開奏不得輒加緣飾以爲浮詞據事狀不虛則加獎激以勸能吏如在任貪猥誅剝生靈公事不治爲政怠惰具事節聞奏勘覈不虛當加譴罰以戒慢官其州縣官任三考滿卽具闕申送吏部格式候勅除銓注本道不得擅差攝官輒替正授者從之

是月勅應南郊大禮六品已下行事官朕禋祀天地朝享祖宗百司各具其威儀都吏遂蒙其置攝希因需澤以錄微勞然而躁妄之徒經求競進叅雜之道真濫莫分勘職名則半是冗員語人數則又盈千計若無簡舉便與寵榮不惟開僥倖之門兼恐撓銓衡之務須明條例方別等差應諸司行事官並付三銓各遣取告赤考牒解繇入仕曆子等磨勘如文書盡備只欠一選者便與依資注官欠兩選者與注同類官欠三選四選者與減一選欠五選至七選者與減兩選欠八選至十一選者與減三選一奏一除未合



入選門者許自同光二年數本官選數滿日起集其太嘗寺先以白身差攝本寺官應奏祠祭勞考稍深者追取元額補牒簡勘不虛卽與正授如因大禮差補行事有前任官及出身者卽須准諸司例追告赤磨勘其諸色黃衣欠兩選者與減一選應官資已高不合銓司注擬者亦委子細簡勘送名中書門下如全無文書稱失墜官告勅簡勅甲又無證據只有格式公驗并諸司諸州府公憑及試授官文牒兼文書過格年月深遠者並宜落下所冀官無濫受恩不虛行

四月三銓奏准本朝故事州府官員府置司錄叅軍外有功倉戶法兵事六曹州有錄事叅軍亦置六曹縣置令丞主簿各一員尉三員分判公事自後除兩京外都督府及州置戶法二員餘四員並省縣置令主簿各一員丞尉並省者伏以今年除本分合格選人外有郊禋行事人數絕多伏見州官事簡掾曹請依舊兩員縣局務繫佐官請添一員其間有尉無簿者請添置主簿一員其赤畿次畿並請准此除兩京外其判司只置司戶司法兩員從之

八月中書奏吏部三銓門下省南曹廢置甲庫格式



流外部銓等司公事並繁長定格循資格十道圖等前件格文本朝剗立簡制姦濫倫敘官資頗謂精詳久同遵守自亂離之後巧偽滋多兼同光元年八月車駕在東京權判南曹工部員外郎盧重本司起請一卷蓋以興復之始務切懷來凡有條流多失根本以至冬集起選人并南郊行事官及倍位宗子共一千三百餘人銓曹簡勘之時互相援引去留之際不絕爭論若有依違必長訛濫望差權判尚書省銓左丞崔沂吏部侍郎崔貽孫給事中鄭韜光李光序吏部員外郎盧損等同詳定舊長定格循資格十道圖務令簡要可久施行從之

九月侍中郭崇韜奏臣伏見今年三銓選人并行事官等內有冒名入仕假蔭發身或卜祝之徒工商之類既淄澠之一亂諒玉石之寧分蓋以偽朝已來蠹政斯久猾吏承寬而得計非才行貨以自媒上下相蒙薰蕕同器遂使寒素者多遭排斥廉介者翻至湮沉不唯顯紊於官箴抑亦頗傷於治本近以注擬之後送省之間引驗而已有異同僭濫而果招論訟將數至化須塞倖門臣欲請別降條流特行釐革許其潛相覺察互有告陳若真偽之能分卽賞刑之必舉



應見注授官員等內有自無出身入仕買覓鬼名告赤及將骨肉文書楷改名姓或歷任不足妄稱失墜押彼公憑或假人蔭緒托形勢論囑安排叅選所司隨例注官者如有人陳論勘鞫不虛者元論事人特議超獎如未合格人或無名駿放者便承僞濫人所授官資其所犯人下所司簡格處分如同保人知保內有冒名濫進之謀亦許陳首若遁相蓋藏被別人論告並當駿放其銓司闕頭人吏如被形勢迫脅主張踰濫選人及自己不公亦許陳首並與放罪若被人論告當行朝典兼恐見任官及諸道選人身死多有不肖子孫將出身歷任告赤貨賣與人自今後仰所在身死之處並須申報本州令錄事叅軍於告勅上分明書身死月日却分付子孫兼每年南曹及三銓停滯多及周歲致選人廣作京債經費倍多致其到官必不廉慎此後至春來並須公事了絕若更逗留當加責罰所有懼罪逃移者仰所司具錄名姓申奏請終身勿齒兼牒本貫州縣各令知悉或有條流未盡處仰所司簡長定格別具條奏從之銓綜之司僞濫斯久識者皆知不可承前未能卒除及崇韜條奏之後澄汰甚嚴或放棄田閭毀林告赤者十七八



矣議者以爲惟新之始品物咸亨條奏諸蠹衆怨大作怒其苛察之甚

三年八月勅諸司人吏授官從來只繫勞考年滿赴選方許離司近日已來頗墮條制到司曾無一課公事尚未諳詳便求薦論深爲僥倖遂使故事都失蓋繇舊人不存豈唯勞逸之罔均兼致司局之曠敗自今年除勞考滿三銓注官卽許赴任非時不得奏薦如有注掌難重勞績可稱許本司奏聞當與減選或是顯然事迹在司年深齒髮祇役不任卽許解職赴任餘切依格條處分

四年二月左拾遺李慎儀吏部員外王松上表云諸道州縣皆是攝官誅剝生靈漸不存濟此蓋郭崇韜在中書日未詳本朝故妄被閑人獻疑點簡選曹曲生異議行矯枉過直之道成欲益反損之文其選人凡關一事闕違並是有涉踰濫或告赤欠少或文字參差保內一人不來五保皆須並廢文書一紙有誤數任皆不勘詳且自天下亂離將五十載無人不遇兵革無處不遭焚燒性命脫免者尚或甚稀文書保全者固應極少其年選人及行事官一千三百餘員得官者纔及數十皆以踰濫爲名盡被焚毀棄逐遂令選人或斃踣於旅店或號哭於行途萬口一詞同



爲怨酷臣等頃曾商議堅確不迴以至二年已來選人不敢赴集銓曹無人可注中書無人可除去年闕近二年授官不及六十乃致諸道皆是攝官朝廷之恩澤不行縉紳之祿秩皆廢銜寃負屈不敢申陳列局分曹莫非僥倖且攝官只自州府多因賄賂而行朝廷不知姓名所司不考課績皆無拘束得恣貪殘及有罪名又不申奏互相掩蔽無迹追尋遂使人戶流移州縣貧困日甚一日爲弊轉多若不直具奏聞別爲條例不惟難息時病兼且益亂國章臣等商量伏請特降勅文宣布遠邇明言往年制置不自於宸衷此日焦勞特頒於睿澤兼以選曹公事情僞極多中書條流亦恐未盡望以中書所條件及王松等所論事節并與新定選格有輕重未盡處並委銓曹子細點簡酌量但可以去其踰濫革彼弊訛不失本舊規能成選曹永例者務在酌中以爲定制別具起請諸條從之

二月勅三川涇鳳秦隴等州縣官員數目極多其上佐官自少尹已下依本朝舊制各具見任員闕申奏其州判司准近制置錄事叅軍司戶司法叅軍各一員縣置縣令主簿各一員餘並停其出替選任一准



三銓堂式

明宗天成元年四月制曰力學登第承蔭出身或欠文書浸成踰濫先遭抹毀幾至調選無人州縣多是攝官爲弊滋甚宜令三銓別爲啓請止除僞濫餘復舊規

七月樞密使宣旨使府判官州縣官告勅此後宜據道數進納仍令祇候宣賜者中書奏往例朝廷命官除將相外並不賜官告因僞朝條流凡准宣授官卽特恩賜今使府判官皆許本道奏請或聞多在京師至於令錄悉是放勅後本官自於吏部出給告赤中書不更管係今若爲點簡所授官吏器能欲令親承聖澤臣等商量自兩使判官州縣令錄在京除授者卽望令於內殿謝官便辭赴任不便進納官告其判司主簿已下極是卑秩不合更許朝對勅下後望准舊例處分從之

八月勅中書先條奏州縣令錄正衙後合赴內殿謝辭者如今錄是除授者宜令給事中引對如是旨授准舊例委三銓尚書侍郎各自引對仍須前一日閣門進狀勅朕以方平區宇念切蒸黎頃當災歉之餘未絕瘡痍之苦緬惟邦本實繫官嘗苟未致於雍熙



則莫寧於宵旰必在委於良吏付以親人儻縱因循轉成勞擾先朝以選門興訟剝放極多近年以來銓注無幾遂致諸道州縣悉是攝官既無考課之規豈守廉勤之節而况多因薦託苟徇顏情替罷不辜送迎爲弊殘民害物以日繫時言念所深焦勞何已宜令三京及諸道州府據見任攝官如未有正官到間且差月日錄名申奏如已後或爲公事及月限已滿要行替換卽須具因繇并選差攝官自來歷任姓名聞奏責免無故頻有替換如有內外臣僚輒行薦託並不得應副儻聞違越當舉憲章

二年正月吏部郎中孔邈奏近見選人或以志在循陔難違色養或以家同懸磬不辨裂裳致違調選之期遂遇廢沉之例臣愚伏請自天成元年已前有出身分明者悉許注擬况三蜀之內員闕極多俾出自於朝恩免使希於假攝

三月銓司奏據南曹駁放選人累經銓及經中書門下論接准堂判具新舊過格年限分折申上者伏以選人或有出身或因除授各拘上例方赴調集多因遠地兵戈兼以私門事故遂致過格固非願爲新條標在七年舊格容於千載臣等叅詳其選人過格年



限伏請且依舊格不問破憂停集除本選數過格十年外不在赴集之限奏勅宜依

十月制曰掄選之道雖在精研調集之勞頗聞艱苦應選人內有過格年深無門叅選縱有材器難逐進趨宜令三銓磨勘行止實曾兵戈阻隔卽與今年冬集判成選人例量材注官如或詐稱不在此限

十二月中書門下條流應諸道選人等其中有過格年深無門叅選者准天成二年十月二十三日德音並委吏部南曹磨勘如實曾阻兵戈者許令注擬如或詐稱不在此限者凡是選人專思合格不肯固踰

選限自滯身名縱阻干戈須在州縣應有過格人仰吏部南曹子細磨勘曾阻兵戈州府去處或曾假攝卽有隨處文牒一一指實卽便送銓司亦須詳先授告身攝牒及審驗年貌方可注擬三銓注擬自有嘗規從前或有宰臣占著好州縣員闕不令銓曹注授今年應是員闕並送曹銓候移省之時若有好闕尚在必議勘尋其請託及受囑人等當行黜責選人之內族類甚多經任之中資考備在應南曹判成人等仰三銓各據逐人出身入仕文書一一比驗年貌灼然不謬方與注官據長定格選人中有隱憂者殿五



選伏以人倫之貴孝道爲先既有負於尊親定不公於州縣有傷風教須峻條章自今後諸色官員內有隱冒憂勞者勘責不虛終身不齒所有入仕已來告勅並封付所司焚毀奏勅宜依舊例當行勘責毀人之三年正月吏部格式司狀申當司先准勅及堂帖指揮應焚毀告身勘同人及失墜文書等臣伏請重給告身令先與簡勅甲如無勅甲可簡卽仰取同勅甲人告身勘驗同卽與出給若是本朝授官及同光元年後授勘簡同卽重與告身如是僞朝授官勘簡不虛卽與出給公驗便同告身例處分者伏以再給文書實爲難重有司點簡務在周防當司近曾申堂請以合准指揮出給告身公驗旋具選人出身歷任行止牒甲庫永爲應驗證明奉判准申者其所追取到選人授官勅甲或同甲勅告身勘驗旣同須准前指揮出給見有勅甲者便須注出重給事繇年月日若不注破慮恐選人却將失墜告身參選刺驗勅甲旣同文書浩大所司難爲一一點簡如是引驗同勅甲之人告身出給佗後却將失墜文書選時甲庫又無憑應驗其同勅甲人告身欲於後面連粘紙亦須使印批注仍牒報南曹要憑將來簡勘者奉勅宜依所



申仍具已出給告身公驗人數姓名開奏將來更有合給者旋具申奏

五月二十一日勅先准同光三年十二月二十五日勅北京及河北諸道攝官內有御署一任簡牒分明前銜先有正官告勅者便與據正官資敘依資授一任官其無正官告赤者與授黃衣初任者其兩任三任已上簡牒分明兼有正官告勅者與超資授一任官其無正官告勅只有兩任三任簡牒者與授從黃衣第二任官各令取近罷攝任處州府文解便許非時赴選者前件攝官等當任使之際共副憂勤及開

泰之期豈宜昇降凡有先皇帝御署兼朕署攝簡牒每一任同一任正官赴選日依資注擬宜令北京及河北諸道州府知悉餘准元勅處分

是月中書條奏在朝庶官有託故停官者時日稍多卽却與前官百司人吏合格者並從選未合格者逐司以年勞奏薦只與勒留官凡百司長官月限將滿及已有人替不得奏薦人使改補職次諸道薦人摠與不可全阻又難今後諸道節度使每年許薦二人帶使相者許薦三人團練防禦使各一人節度觀察判官並留旨授書記已下卽隨府議者以爲百司人



吏只以年勞方得赴選今許非時薦勞以勒留官爲特恩卽合格之日又何爲勞考哉雖誠其司長將蒲其奈教猱升木何此欲止之而反啓之藩候舉知俾資共理苟得其人多亦何害如非其人惠及黎庶又何以名器徇諸侯之請託兩使賓佐卽慮難守苟能守之卽有知人之忠矣

是月詔州縣官以三十月爲考限刺史以二十五月爲限以到任日爲始

七月中書舍人盧詹上言曰一同分土五等命官所以字彼黎民司其輿賦至於田租桑稅夏斂秋徵或旨限不愆或簡量增羨殊非異政乃是葺程竊見諸州頻奏縣令多以稅輸辦集便作功勞諸道纔有表章朝廷已行恩命且徵科是縣令之職分不過合望於甄酬若一年兩度轉遷則三載六昇階級併加寵渥慮失規程伏乞止絕薦論但稽課最卽銓司黜陟自有等差貴塞倖門以循舊制奉勅盧詹職居近侍懇述大綱案州縣之規程重國家之恩命旣爲允當須示聽從

八月癸未中書舍人劉贊請令選人准舊制試判從

之



九月右諫議大夫張延雍請令南曹引驗選人正身較其年貌從之

十一月勅禮部員外和凝奏應補齋郎並須引驗正身以戒冒名凡使蔭者云一任官得補一人今後改官頓轉品者卽可如無嫡子卽許以親姪繼院並念書十卷試可則補

是月吏部郎中何澤以流外官只考勞乞不試書判從之

十二月勅選門官吏訛濫者多自今後並令各錄三代家狀鄉里骨肉在朝親情先於曹印署納吏部中書門下三庫各一本候得判印狀卽許所司給付新

簽告兼本任官處及鄉里亦具一本納逐州縣

四年正月大理寺奏近爲陵令虛稱試銜簡法以詐假論又據長定格選人無出身未曾任正員官使虛銜散試官奏授正員官及權知權判等官未得資日以諸事故解官並立選集限勅旨名官之榮其求甚重試攝之任所得非輕徐究根源亦闕治道自亂離已來天下州府例是攝官皆給試銜或因勘窮便關詐假法中書雖則不可選條內其奈不無爰當大定之期宜示惟新之道已前或有稱試銜者一切不問



此後並宜禁止  
 五月詔曰凡于祿仕固有規程發身必藉於器能在  
 任須彰於勞考否臧斯異黜陟並行朕自統寰區務  
 均渥澤淹滯者皆期振舉勤恪者亦議旌酬既開進  
 取之門遂有躁求之衆或不守選限捷路希恩或纒  
 罷官資奔波取事侵有數之員闕屈無媒之選人以  
 此比方宜各條理自今後應前資官有出身及兩除  
 官並可依嘗調赴選兼有莊宗并朕御署亦可准近  
 勅赴選其一任除官未入選緒若無定制難以進身  
 宜約所守官資序高低許今同有出身人合格年限  
 求官赴京日仍須本道申送則與除第二任官兩除  
 後便准嘗調選人例如此則事有區分人無奔競如  
 藉才器非時昇擢不在此限

九月中書門下奏來年二月南郊大理應諸司寺監  
 合行事官伏以明德惟馨冀神靈之昭鑒作事謀始  
 庶王道之和平前件將來行事官等既預嚴禋希霑  
 聖澤先宜條貫免忤擬倫應合差行事官但是前資  
 并及第黃衣及三司徵科勒留官充仍逐司寺監先  
 引驗歷任告身分明則得差補若失墜文書則須得  
 本處當時公驗不得憑諸處所給憑繇如是州縣官



須見四道五道已上歷攝文牒皆是節察及直屬京  
防禦團練使差署乃點勘逐任年月遠近曾親公事  
及得替因繇不是虛牒則得收補其逐司合差職員  
官吏須是已經附奏者充不得臨時旋出虛牒將來  
所司磨勘如不依元指揮公然顏情互容謬妄其逐  
司官吏并本人並當勘責各行嚴斷從之  
初同光二年郊天諸  
寺監行事官千餘人不先引驗或以貨賂收補及行  
事畢銓注覆奏率皆偽濫無憑時樞密使郭崇韜在  
中書宰臣豆盧革常說等共議懲革奏請焚毀塗抹  
其告勅偽濫者伍百人一時逃竄其文書不足者久  
駐京師終無所得皆相率慟哭而去士人側目以崇  
韜為詞然所行雖正失於不先定格式引驗俾仕進  
者真偽自判也今宰臣所  
奏既行議者以為宜之

十月詔曰本朝一統之時除嶺南黔中去京地遠三  
年一降選補使號為南選外其餘諸道及京有司諸  
色選人每年動及數千分在三銓尚書繁重近代選  
人每年不過數百何必以一司公事作三處官方况  
有格條各作資考兼又明行勅命務絕阿私宜新公  
共之規俾慎官聳之要其諸道選人宜令三銓官員  
都在省署子細磨勘無違礙後即據格同商量注擬  
連署申奏仍不得踵前於私第注官如此則人吏易  
可整齊公事亦無遲滯者

十一月勅應諸道見任州縣官司在任之時若時違



犯本道非時衝替宜却勒赴任考滿卽罷其本判官  
當行責罰時藩鎮帥臣不識國體妄罷邑宰欲  
署其假官朝廷知之故有是命也

十二月戊戌勅其自陳狀乞除官者所賜告身並係  
特恩雖舊例令本官自出價錢慮不迫者稍難送納  
兼知本司人吏以此爲名接便更致邀頡於官估綾  
羅紙價外廣索價數力及者隨時應副闕乏者須至  
淹延今後應是官告除准宣官破外其過伏乞除官  
并追封追贈敘封進封官告及舉人冬集綾羅紙標  
軸錦袋等宜令並與官破仍勒各隨色樣尺寸如法  
裝脩疾速書寫印署進納

是月巳酉勅應諸道州府令錄等官告勅牒元是中  
書進納入內令閣門宣賜其判司主簿官告舊是所  
司發遣受恩命後赴本任地里遠近各有程限比候  
進納恐有停滯沉緩紙標軸價錢近已官破今後所  
除州縣官告身勅牒宜令中書門下指揮不要進納  
並委宰臣當面給付貴無畱滯兼免任京破費  
是月勅應三銓公事宜准近勅指揮仍只使吏部尚  
書銓印其東銓印並封宜付中書門下封送禮部權  
收管訖申奏

冊府元龜

冊府元龜

銓選部

卷之六十三



冊府元龜

巡按福建監察御史臣李嗣京 訂正

知 閩 縣 事 臣曹鼎臣 參閱

知 建 陽 縣 事 臣黃國琦 較釋

銓選部 五

條制第五

後唐長興元年三月勅凡是選人皆有資考每至赴  
調必驗文書或不具全多稱失墜將明木末須示規  
程其判成諸色選人黃甲下後將歷任文書告勅連  
粘宜令南曹逐縫使印都於後面粘紙具前後歷任



文書都計多少紙數具年月日判成授某官懼其分假於人故也又中書奏吏部流內銓諸色選人所試判兩節欲悉定其等第以優者超一資其次者依資又次者以同類道理全疎者於同類中人戶少處注擬從之

五月制曰獲遇拜郊遠來行事既施微効宜被優恩欠一選者宜令待闕欠兩選者減一選欠三選四選者減兩選欠五選六選者減三選欠七選八選者減四選欠九選已上者減五選三司勒停官顯有過倦遂當停替不逢大禮終是棄人仍令所司以罷官埋選赴掌調如是今年合格者許令待闕注擬仍委吏部南曹依元簡勘事節合減選數給付牒知

是月又勅凡命職官只憑告勅條流雖切謬濫不無况來自羣方固非遍識除因章露始見罪尤先皇帝臨御之初郭崇韜制置甚切雖加峻法尚有訛風誠由本朝多事已來僞室偷安之際皆隨往制莫識嚴規秩高者以蔭緒假人廣求財貨吏狡者以貪恠得志不顧憲章遂致傳授身名分張告勅勘初任則多稱失墜論資考則只有公憑前後相蒙真僞莫辨若不特行釐革無由永絕根源宜令自此應除授選授



州縣官引驗磨勘須召有官三人保非謬妄則奏擬仍於告身內監出保官姓名據本官所通三代名銜有出身無出身歷任告勅文書并逐任考數若是本朝及僞朝所受者並只於將來新告身內一一收監其文書納留不再給付如自中興已來歷任待受新命後都粘連繳尾具道數委吏部使印背縫郎官於狀尾押署給付或有失墜卽須於所失處州縣投狀具三代名諱及出身歷任請公憑赴京勘會甲庫同卽重與出給如公然拆破印縫不計與人不與人將來求事並令焚毀其人當行極典自茲凡受新命並依此例施行其見任內外文武朝臣及諸司職守諸道州府判官并軍州職員有曾爲州縣官及曾改名所受本朝及僞署官告勅牒歷任文書亦並須送納入官只以中興已來文書敘理其見任州縣官及諸色前資官守選官等所歷任文書亦仰速便送納委所司點勘無違碍則准前收監給與公憑任赴將來求事叅選其秦王茂貞墨制官員並須得本道識認具歷任申奏所司簡勘不虛亦給與公憑將來隆資受官所貴凡是身名免有混雜仍限一週年內改正了絕其興元已西應曾受僞蜀官員緣地里遙遠許



勅到後一週年為限仍各於本罷任處州府投狀具三代名諱出身歷任一一分析申奏到日點勘准前指揮如出限外縱有申送到文書並不敘理兼諸道亦不得以此身名奏薦如違罪在本判官其本人別行嚴斷庶得新恩迥異舊弊永除表為君一統之基塞入仕多端之倖仍付所司

七月吏部南曹奏磨勘南郊行事官前守濮州范縣主簿李範是同光三年不納告身人數准勅終身不齒今又冒名於四方館行事前南河府長水縣主簿趙知遠使兄為父蔭行事者勅指李範已該恩赦特放罪收納文書趙知遠以兄為父未之前聞既遇郊禋特從恩宥出身歷任文書付所司焚毀放罪勒歸鄉貫本道長吏與改昭穆奏聞其餘南郊行事合減選人數候將來選限滿日宜並不取逐處文解不更經南曹點簡赴銓注擬

時中書選部磨勘甚精進者真偽明白人皆便之

九月勅諸道奏薦州縣官前街內有賜紫金魚袋者若循嘗例州縣官十六考方得敘緋若已佩金章固難為令錄此後天下州府不得奏薦著紫官員為州縣官

是月前興唐府寇氏縣尉楊知萬經中書陳狀稱光



化三年明經及第其後選授官兩任莊宗郊天年於將作監內行事禮畢擬授太子通事舍人旋直錯監父母年幾駁落其年丁父憂至天成二年又丁母憂去年九月方服闋今春欲赴郊天行事又緣貧困無財可辦今乞引驗已前文書量賜陶鑄者中書簡到同光二年行事案楊知萬謬通父母年幾停落勅旨楊知萬實曾行事尋已注官只爲父母轉年恩命遂寢外別無違碍自後相次丁憂久任京城誠宜傷愍宜令銓司點簡歷任文書准非時選人例處分或前資官中有與楊知萬事狀相類者並准此指揮

十月吏部南曹關試今年及第舉人進士李飛等六十九人內三禮劉瑩李斐李銑李道全明筭宋延美等五人所試判語皆同尋勘狀皆稱晚逼試偶拾得判草寫淨實不知判語不合一般者勅旨貢院擢科考詳所業南曹試判激勸爲官劉瑩等既不攻文合直書其事豈得相傳橐草侮瀆公場載究情繇實爲忝冒及至定期覆試果聞自懼私歸宜令所司落下其所給春關仍各追納兼放罪許再赴舉兼自此南曹凡有及第人試判之時切在精專點簡如更有效此者准例處分



是月中書奏吏部流內銓諸色選人先條流試判兩節並委本官優劣等第申奏文優者宜超二資注擬其次者以同類官注擬所以勵授毫之作亦不掩歷任之勞其或於理道全疎者以人戶少處州縣同類官中比擬仍准元勅業文者任徵引古今不業文者但據公理判斷可否不當罪在有司兼諸色選人或有元通家狀不實鄉里名號將來赴選者並令改正一一豎本貫屬鄉縣兼無出身一奏一除官等宜並不加選限從之

是月勅先條流見任州縣官及前資守選官所有歷任文書委所司點勘無違碍則准前收豎給與公憑任將來參選者訪聞諸色選人有今年合格者因請公憑从淹京闕若候本道請解卽須來歲授官多是甚貧誠爲可憫况已及選限固取本任文解不及前件選人今年合格已請得公憑者宜令吏部南曹准今冬選人例簡勘施行如是欠選者候選數足日准格取本任文解赴集

十二月大嘗丞孔知邵奏諸道行軍司馬副使兩使判官已下及團練軍事判官並請依考限欲滿一月前本處聞奏朝廷選替補授勅旨從之兼上佐官令



錄判司主簿等亦准此指揮或有丁憂及不赴任因事停官拋官兼身死並具月日申奏如不依指揮罪在本判官

二年正月吏部南曹奏前齊州臨邑縣令趙譔等十人納到歷任文書合給公憑勅旨其換給公憑仍令所司以綾紙收監取本行尚書侍郎列署出給其先已出給者宜候將來赴選之時依此重給

是月勅少尹上佐以二十五月爲限其府縣官宜准長定格以三十月爲限其行軍司馬節度副使判官等並元未定月限勅旨諸道行軍節度副使兩使判官已下賓僚及防禦副使判官推官軍事判官等若詢前代固有通規從知咸自於弓旌錄奏方頒於綸綍初筵備稱確畫斯陳朝廷近以旌賞勲勞均分員闕稍或便於任使不免須議勅除旣當委以裨贊所宜定其考限前件職員等宜令並以三十月爲限如是隨府不在此限

四月勅舉選人衆例是艱辛曾因兵火之餘多無勅甲不有特開之路皆爲永棄之人其失墜春闕冬集者宜令所司取本人狀當及第之時何人知舉同年及第人數幾何如實卽更勘本貫得同舉否授官者



亦先取狀當授官之時何人判銓與何人同官上任  
罷任何人交代仍勘歷任處州縣如實則別取有官  
三人保明施行

五月中書奏吏部南曹狀申准勅換給諸色官員告  
身公憑伏緣點簡選人歷任文書其間多有格後違  
礙事節若旋具姓名申覆伏恐漸積人多互起陳論  
交慮壅滯當曹不敢施行者中書據南曹所申事節  
逐件條流如後一件據申選人納到今任文書多於  
解繇及歷子內批書考第准天成四年四月二十一  
日勅新格已前卽許施行自新格已後亦多有解繇  
歷子內批豎考數本處元本給到考牒格前特許施  
行甚爲優假格後更聞違越須重條流今日已前有  
此色選人宜且與收監此後選人如有解繇及批得  
歷子分明無考牒者殿一選有得歷子無解繇考牒  
殿兩選如只有解繇考牒不批得歷子殿三選如無  
三件文書便同有過停官一件據申應諸色選人新  
格下後批歷子後時者五年後批者不在磨勘之限  
今有格前罷任及新格下後罷任者格下經六年七  
年方批入仕歷子或有全不批歷子只給到公憑今  
日已前有如此者特與磨勘施行此後纔罷任一月



內須批給得解繇歷子違過一月殿一選過三箇月不批給得者亦同有過停官一件據申應諸色承應出身及童子及第例是擡年及陷歲數兼幼補身名引驗之時多有差異者今日已前有此色選人並須引驗辨認兼召保官委是正身別無謬妄則與改正詣實年幾施行此後更有此色身名並同謬濫處分一件據申河北諸色官員納到告勅文書例稱本處無不較考只有解由河東河北及鳳翔已西不知選格須明告諭仍令吏部南曹各一本解繇考牒解狀式樣徧下逐處此後並須文書備足免誤選人如今

日後公然更有違越並准前殿選今日已前不在此例一件據申諸色前資官告身今任入仕歷子或批到上任月日或是有名假故批曆子處多無觀察使及刺史具銜押署只有錄事叅軍批署者逐處長吏自此後並須依格文押署如故違者本人殿兩選其今日已前違程式者且宜特與磨勘收監一件據申諸色官員歷官兩任至五任今任文書備足內有一任至兩任失墜前任解繇或考牒歷子又無公憑及稱元不給得卽別有公據自此但知認中興已來所授告身為定其已前或有歷任稱失墜如是傳授他



人有此糾告及所司點勘彰露並准累行勅命科罪今日已前人墜考牒解繇歷子如有公憑者亦與收暨又無公憑將來選時降資注官自此後選人更有失墜則須却於本處具所失因繇重具批給如違准前殿選一件據申選人有今任文書備足只歷子內批到上任月日卽別有解繇或公憑文書證據分明自今已後宜亦准前項指揮收監此後更有此色選人並同有過停官例處分右奉勅宜依吏部南曹具此分明曉告及徧下諸道州府應是選人各令知委如守官滿日未給得解繇歷子等文書隨處不得便令辭謝如逐州府輒有邀難不便出給罪在本判官并錄事叅軍

七月勅諸道奏薦州縣官各定員數今宜增益以廣搜揚使相先許一年薦三人今許薦五人不帶使相先許薦二人今許薦三人直屬京防禦團練使先許薦一人今許薦二人念應舉之流甚艱難於取事當及第之後尚迢遞於授官小而得簿尉者全稀老不爲令錄者極衆卽不得薦新罷任及諸格之人如未曾有官卽許奏初官已有官者當別比擬吏部南曹奏前守鄆州盧縣令李玘歷任內兩任秘書丞一任



國子毛詩博士雖前任有昇朝官伏緣今任官合准格五選集候選足日取解赴掌調勅旨州縣官帶侍御史殿中侍御史內供奉監察裏行及省銜者皆非正秩尚出銓曹况曾三度昇朝豈可一例守選所宜振發以勵操脩應州縣官內有曾在朝行及佐幕罷任後准前資朝官賓從例處分其帶省銜已上并內供奉裏行及諸已出選門者或降授令錄者罷任日並依出選門例處分不在更赴掌調便與除官兼州縣官其間書得十六考者准格敘加朝散階准出選門例處分如不書得十六考雖已過朝散階不在此

例

八月勅諸道奏薦州縣官前銜內有賜紫金魚袋先於長興元年有勅州縣官若循掌轍十六方得敘緋儻或已佩金章固難却爲令錄必若藉其才器則可別任職資文資官結銜內已有金紫尚不許薦爲州縣官其武職銀青階亦宜條理諸道詳文資賜紫例不得奏爲州縣官

是月詔百司職史應選授外官者考滿日並委本州申奏追還本司依舊執行公事

九月前溫縣令社同文獻時務長吏年七十已上者



請不除令錄其合格應選者請授散官勅旨耄年爲政蒞事或有昏蒙老成之人安知不可師範宜令銓司此後有全不任待者卽別以優散官資注擬

十一月勅闕員有限人數嘗多須以高低定其等級起今後兩使判官罷任後宜一年外與比擬書記支使防禦團練判官二年外與比擬兩使惟巡防禦團練推官軍事判官等三年後與比擬仍每遇除授量與改轉官資或職次其有殊嘗勤績者與議優昇若有文學智術超邁羣倫或爲衆所稱或良知迥舉察驗的實者不拘年月之限其才器卑低階緣得事者

宜量事於州縣中比擬若州縣官中有文學雄奧識畧優深亦量才於班行及諸道判官比擬任使况諸選人之內多是勤苦立身每於調集之時皆有等差選限准茲幕吏難使雷同所貴皆免堙沉遞承驅策三年正月勅守選之輩例是艱貧合格之時漸多衰老更添雜犯轉見憂嗟方當開泰之期宜軫單平之衆自今後合格選人歷任無違礙者並仰吏部南曹判成如文解差錯不合式樣罪在法解官吏兼貢舉之人辛勤頗甚每年隨計終日食貧須寬獎勸之門俾釋羈棲之歎今年落第舉人所司已納家狀者次



年便赴所司就試並免再取文解兼下納文解之時不在拘以三旬但十月內到者並與收受  
二月勅前資朝官及諸道節度觀察判官近勅罷任一周年後方許求官其出選門官雖准格例送名未定除官年限自此應出選門官亦宜罷任後周年方許擬議仍本官自於所司授狀磨勘申送中書門下九月勅朕大啓四門無遺片善繼有智能之士來陳利害之言是命擢量貴行酬獎須論條件以定等差應進策人等若是選人所進策內一件可行與減兩選兩件減四選三件已上便依資與官如無選可減

及所欠選數則少可行事件則多據等級更優與處分如是諸色舉人貢院自考試本業格式不在進策之限如有智謀宏遠文藝優長或一言可以興邦一事可以濟國是為奇傑難預品量待有獻投旋令擬議議者以為上封事言減選非也夫言策畧者必須智見非嘗所陳殊異大臣之所不及眾智之所不通有益政途謂之策畧今據鄙夫所陳率皆持政掌行之事何煩投匭而言人君賞其芻蕘賜束帛飲膳可也而遠撓銓綜之權啓姦吏賄略之門深不便也

四年二月中書奏諸道州縣官甚有闕員前資官皆拘選限其間有朝廷選擇侯伯薦揚得者無多餘難驟進或病跲於陋巷或老謝於窮途宜開振滯之門



雅合推恩之道今等第減選者一選者無選可減親  
公事得資考者宜優與處分不得資考者准格施行  
兩選三選者減一選四選五選者減兩選六選七選  
者減三選八選九選者減四選十選十一選者減五  
選十二選者減六選千牛進馬童子齋郎挽郎宜准  
元和處分勅旨嘗調之中無媒者眾省員之外有闕  
嘗多方隆遠大之規更顯激揚之理兼先赴南郊行  
事未授新命及一考前丁憂州縣官等起今後到關  
者宜付所司旋旋磨勘施行不得輒有停滯大朝恩  
命庶事規程該定制者各委所司頒特勅者不拘嘗

例資維新之風教示無黨之寰區 初馮道等商議以

格例銓注以至滯留而州縣吏員多以顏情差攝乃  
議減選補吏杜彼幸門殊不思九州既未混同十道  
半違聲教吏員多益州縣無添是時減選之勅既行  
議者大以為不可物論沸騰明年之後有諸色勸進  
人及山陵行事官兼每年黃衣選人相許數千皆援  
減選並合除官所司既無闕員羣吏只援新勅或論  
淹滯或訴阿私宰相將至內門則數百為羣環焉宣  
訴或言語不遜詰難往來騶吏不能止後竟追罷此  
勅

五月勅諸道馬步判官不得差攝官如交闕人須於  
前資正官判司簿尉中選性行平允者補授又詔應  
見任前資守選官等所有本朝及梁州出身歷任告  
身並仰送納委所在磨勘換給公憑只以中興已來



官告及近授文書敘理其諸色蔭補子孫如非虛假不計庶嫡並宜銓錄如實無子孫別立人繼嗣已補得身名者只許序蔭一人其不合敘使文書限百日內焚毀須絕此後更敢持合焚毀文書參選求仕其所犯之人并傳者並當極法應合得資蔭出身人並須依格令施行先是鴻臚卿柳英將齋郎文書賣與同姓人劉君則伏罪大理寺斷當大辟緣赦減死奪官終身不齒故有是詔

是月中書奏准長興元年二月二十一日南郊赦書節文州縣官在任日雪得冤獄許非時參選超資注官仍賜章服今詳勅命凡云冤獄者所司推鞠定罪不平迴曲作直已成案牘或經長史慮問或是家人訴冤重結推訊始見情實迴死爲生始名雪冤仍須元推官典招伏情罪本處簡案牘事節給與公憑更於考牒內監出候本官滿日便准近勅非時參選若活得一人超一資注官二人已上加章服已有章服加簡較官如在任除雪冤獄外限內徵科了絕減得一選已上或招添戶口至一分已上並許酬獎如加官至五品已上許奏聽勅旨如雖雪得冤獄徵科違限不了合殿選者亦待殿選滿日與敘雪冤之賞或



逃却戶口亦據降等叙官如本司小小刑獄未經別司縱能處斷不得援例從之

愍帝應順元年閏正月中書門下言以天成二年十二月詔曰長定格應文學出身人一任三考許入下縣令下州縣錄事參軍亦入中下州錄事參軍兩任四考許入中下縣令中州錄事參軍兩任五考許入中縣令上州錄事參軍兩任六考許入上縣令及緊州錄事參軍凡爲進取皆有因依或少年便授好官或暮齒不離卑任况孤平舉士纔年四十始得經學及第八年合選方受一官於初任之中多不成三考第二選漸而蹉跎有一生終不至令錄者若無改革何以發揚自此經學出身請一任兩考許入中下縣令下州錄事參軍詔曰參選之徒艱辛不一發身遲滯到老卑低宜優未達之倫顯示惟新之澤其經學出身一任兩考元勅入中下縣令下州錄事參軍起今後更許入下縣令中州下州錄事參軍一任三考者於人戶多處州縣如於近勅條內資叙無當者卽准格循資考入官其兩任四考者准三任五考例入官餘准格條處分不得起折

是月詔吏部三銓南北曹禮部貢院注擬考試依格



疾速發遣勿令虛有滯留

末帝清泰元年五月詔曰應勸進諸選人前京兆府武功縣令龐濤以下四百九十有四人方在京都遽茲際會既自勸進宜示獎勵其前資州縣官及黃衣選人近日緣少闕員難於減選候合格日各超一資注擬行事官亦於注官時優與處分長流人已歸本貫卽以勅書節文處分攝試官推巡令錄宜許比三傳出身判司衙推主簿比明經出身各守選限自今年始合格日與初官宗子未有出身者與出身有出身者同選人例處分給與憑據

七月詔應徽陵行事官各無遺闕已議獎勵比少闕員難於減選遂許合赴集日各與超資今又懇有披論宜特與減一選其今年合格者便委南曹磨勘送銓注擬來年合選者勒赴冬集所司磨勘無遺闕旋送銓免取文辭其去冬判成未得官者宜先注擬應前任正授實從亦宜減一年無年可減便與擬授先有長興四年三月二十二日勅普與減選今爲員闕數少並任施行其攝官職并御署人等並以元勅處分

八月詔應自鳳翔及汭路迎接隨從到京州縣等官



或昔經患難罄竭忠勞或遠奉乘輿奔馳扈從既各  
憑其銜署遂溥降於優恩爰示等差特行釐革所有  
自振武西京河中鳳翔已前銜署員僚或因無員闕  
權且補差或託彼薦論偶經任使不可悉謀援例便  
望授官將堙僥倖之源須立區分之限自八月三日  
後應所稱銜署官員除內有處分特行恩澤外其餘  
稱銜署並許逐攝同一任正官依期限赴選不得更  
令進狀及與施行

九月吏部三銓言所用循資格先經詳定然自次府  
司錄叅軍已下無品第入官處尋帖格式叅詳添入  
又以地卑不敢添注請差官詳議詔委元詳定格式  
官刑部員外郎孔莊大理少卿李延範殿中侍御史  
韋稅等議詳

十月中書侍郎平章事姚顛上言近宰臣盧文紀上  
章請條理選部臣聞事不師古匪說攸聞又曰仍舊  
貫何必改作此先王之格言也臣案六典吏部三銓  
尚書侍郎分典選部其格擇人有三實四才孟冬三  
旬集人有地里之差若循彼綱條依其格限人無濫  
進官得實才只自天成四年十月詔罷侍郎分銓只  
以尚書併領正官又闕多是他曹權差才力或有短



少遂致發遣疑滯團集遲留移省既失嘗規選人隔年披訴臣請却依六典分銓朝廷列職分司比期釐務置之闕地向表分憂望各委典銓於事爲宜詔曰姚顗所奏銓管實合規程不唯六典昭彰抑亦三銓整肅而長定格是聖朝重定條件甚精若令千載以無隳必使萬方而有則俾其復舊深洽羣情如聞循資格行用年深事條差舛必須詳正方免弊訛其分銓事宜依循資格宜令吏部三銓尚書郎南北曹給事中參詳其間條件如其舛誤卽釐革以聞

二年二月中書門下奏近日除官制未下多漏泄於外此後除改候盡下所司以正勅寫告進納如畫黃未下請不催索詔曰節度防禦團練使刺史行軍副使等事關急切除授官告若待畫下給卽留滯勒樞密院凡經由處不得漏泄其尋嘗除命從之

三月工部尚書判吏部尚書銓崔居儉奏今年選人內八十三人無闕注擬詞訴紛紜蓋因近勅減選人仕者多門雖可區分難抑詞理請下格式取四月後合用員闕發遣中書門下奏先以銓曹論員闕遂却置戶掾一員諸州一百五十員格式元送闕簿六百四十餘處後又許超折資序又堂帖令畿赤已上雖



擬議許開銓後除授不合預請用四月後員闕望於  
移省限內並須了絕不得更令選人有詞詔曰宜令  
從四月一日後至六月終員闕施行餘依中書所奏  
崔居儉多藝有士望是時帝起義時諸攀附入官者  
衆皆付銓三銓難其事故盧文紀奏用居儉典察其  
綜覈之失而近侍者素知其意而奏之故不從所奏

四月宰臣張廷節奏州縣官徵科賞罰列縣令錄事  
叅軍正官一年依限徵科了絕加階二年依限與試  
銜三年摠及限與服色如攝令錄一年內了絕仍攝  
二年三年內摠及限與真命內主簿一年二年如縣  
令條三年摠了別任使本判官一年加階二年改試  
銜三年轉官本曹官省限內了絕與試銜轉官諸節  
級三年內總了絕者與賞錢三十千其責罰依天成  
四年五月五日勅從之

是月中書門下以吏部三銓注擬大違條格帖門下  
省詰錄事強知謙云天成三年已前許超折一資至  
兩資或三資者不過三兩人天成三年後不許超折  
今銓注擬選人有自超一資至五資亦有三兩人超  
六資七資八資者中書奏自有選門只憑定格儻或  
踰越便舉條章亦有事繫從權理難固執先開容許  
後守條流所貴時暫施行免令隳紊今三銓所注選



人超折太多從來固不容許若重議改移便成淹滯今年且據所注押定將來別正條格從之

七月中書門下言自今年二月後諸州奏軍州判官九人行之擬新詳定勅文慮在外未知詔軍事判官宜令本州刺史自選擇舉奏初且除本職未得與官或與刺史連任相隨顯有勞能許本刺史以聞量事獎賞仍不許橫有奏薦其三月後九人且與施行是月御史中丞盧損言臣等先編聯制勅外有比非故實不便於時條件准天成元年七月及四年十一月勅應中外官除授不計品秩一例宣賜告身請派

舊制合賜外各令自出綾紙又天成元年八月勅除授旨授令錄皆令內殿辭謝臣等以令錄卑微不可內庭展謝請依舊制正衙辭謝又天成三年五月長興二年七月勅許節度使帶使相歲薦五人餘薦三人防禦團練使二人臣惟州縣員闕甚少若容薦舉則每年銓選何以注擬請特行釐革又長興二年八月勅州縣簿尉判司差充軍判官仍同一任自爾已來頗傷物論以爲不當請行止絕依舊令衙前選任詔曰令錄之任總六曹之紀轄係百里之慘舒惠養吾民可以親承顧問內殿辭謝可如舊制藩侯郡守



薦人或諳公事或有裨益不可全阻許依天成勅帶使相藩臣歲薦三人餘二人直屬京州羣防禦團練一人諸色官誥舉人春關冬集綾紙聞喜關宴所賜錢並仍舊官給餘從之

八月中書條理前資朝官太卿監五品升朝官西班將軍皆在任許滿二十五月如衝替已經二十月卽別任用少卿監舊制三任四任方入太卿監今後祇三任皆有限滿無殿責者如是特恩不在此限五品升朝官舊例三任四任方入少卿監今後祇三任須逐任月限滿無殿責若特恩不拘此例西班將軍罷任後一年許求官舊例三任四任方入大將軍今祇以三任爲限並須逐任滿月限無殿責或曾任金吾將軍刺史與上位比擬非此類或少年並居下位仍不得曾有殿責者特恩不拘此例三任大將軍方入上將軍並須每任滿月限無殿責者若曾領藩鎮任御史特勅不拘此例今後朝廷只除兩使判官其書記已下任藩府自辟朝應朝官除外職任無限者罷任後須守舊勅一年月限方許陳乞如未曾昇朝便居諸道賓從府罷或舊使未有所授特有表薦若簡較官是臺省三院之御卽與中下縣令簡較是大夫



中丞祕書少監郎中員外郎與請資初任昇朝官如簡較官是尚書掌侍祕書監左右庶子昇朝便與少卿監諸道賓從依州縣官例在任三十月限或罷官猶有一年之限或是衝替丁憂而罷已及二十月者並須更守前官蒲月限方許陳乞諸州防禦團練刺史判官推官並請本州自辟請中書不得除授合出選門官帶三院御史供奉裏行及省衝者罷任後一周年許陳乞諸州別駕資品高不除令錄仍守本官月限亦得替後一年方許乞官其長史司馬或因攝奏正比來未有官者並送名從之

十月中書門下奏長興二年四月五日詔朝臣居喪終制委御史臺具名申奏諸道賓從喪後宜行恩命州縣官纔授官及到任一考前丁憂服闋並與除授依長定格自有節文應州縣官新授及到任一考後丁憂服闋准格取文解南曹納磨勘申中書門下當與除擬不得經堂陳乞從之

三年四月詔曰近以內外臣僚出入迭處稍均勞逸免滯轉遷應兩使判官畿赤令長取郎中員外補闕拾遺三丞五博少列官僚選擇擢任一則俾藩方侯伯別耀賓階次則致朝列人臣備諳時政今後內有



已滿闕月限外或偶是缺員宜便依此施行  
晉高祖天福二年正月勅應京畿及諸州縣舊有唐  
朝諸帝陵并直源縣並不爲次赤却以畿甸緊望爲  
定其逐縣令不以陵臺結銜考滿日仍以出選門官  
例指揮隔任後據資品准格例施行

二月勅應諸道前任行軍副使等例從替罷久任京  
師每念滯淹嘗懷惻憫極欲疾速發遣穩便安排但  
以擬除一人須俟一缺授命者纔去得替者便來到  
闕旣專望渥恩在任又須終月限循環不已積滯轉  
多而况在京所費亦倍必想在外一年事力纔充在  
京數月支持比候闕員多稱委困當別行於條貫期  
各守於規程起今前件官員等如得替後且就家私  
穩便安居限一年後方得赴闕朝廷當據職資便與  
比擬或非時有闕與就便安排自然公私得濟出處  
合宜有員闕以安排無歲時之停滯事關悠久情在  
優矜各委遵承勿得踰越其先得替在京者宜令中  
書據見有員闕處量材安排仍降勅諸道各令知委  
四月勅應諸道前資州縣令官等明庭選士歷代通  
規各係職司共將掄擬顯有去留之式明分真濫之  
源今者州縣前資官員悉於中書陳狀來事却慮虛



陳銓管永無嘗調之人並在昂司難遏躁求之者去  
 歲以國朝創業州縣缺官思廣渥恩是從優異今則  
 彛倫攸敘庶政咸脩宜舉規程俾無侵越其今日已  
 前在中書陳狀諸色人等見點簡引驗如不欠少出  
 身立任文書及無踰濫者旋具奏擬宜令今日後諸  
 道前資州縣官等若是資考已出選門及一任除官  
 未入選門并一考前丁憂及活得冤獄者准元勅年  
 限滿日許經中書陳狀當與簡勘事理施行此外須  
 令並依前後勅格程限赴吏部叅選或有公材出眾  
 政績異嘗者臨時超擢不在此限

五月前守汴州浚儀縣主簿何光又進策二其一曰  
 竊見諸處邊郡小縣多是山鄉雖舊有勅正官滿時  
 不許差攝充替無卹遠地多越明規攝官既已到來  
 見任豈敢違拒况聞所差攝者太半是本州府使長  
 臨時與旋署虛銜強替見任正授官員其最不可者  
 頗有當年之內或兩度三度替移來者須逆去者須  
 送配從門內率自鄉中悉是權行誠非本分如斯得  
 倖豈肯力官非惟紊公當且害物自今後伏乞特行  
 明勅顯自新朝其邊郡縣官仰節度刺史或有見任  
 因事停罷卽許差曾入仕者權令撫綏仍又須候正



官到官不可以攝替攝官或經半載或過一年如能志遠脂膏道著清白招添得戶口徵督得賦租百里傳聲羣黎咸惠衆狀舉請卽仰奏聞特乞大朝便行真命如此則皇王恩遠赤子幸深免被煩苛漸期蘇息勅曰今後正官滿日宜令逐處長吏准元勅預前奏聞必在審擇能官不得朝差暮替如顯有過犯不在此限仍令曉示諸道其二曰切見諸道選人合格下解不出十月立定三旬此則嘗程向來舊制却是或有因解樣所誤式例稍虧字內點畫參差印處高下訛舛便乃駁犯致有艱難其如有七年八年選期千里萬里途路羈窮取士辛苦到京若稟錯不容乃滯塞無計自今後伏乞特行明勅顯布新規其黃衣選人只驗出身文書已有前任者據考牒及解錄曆子轉年得盡合格不虛便與判行小小不賜駁犯則天下感明時事易聖主恩寬不使吏徒得行奸計者勅曰參選之日考驗之間稍容易則必長奸欺若艱難則或成淹滯今後宜令所司點簡文書如有稟錯詳酌事理非藏奸隱倖者不要駁放

九月吏部銓奏長興四年五月五日勅應諸道州府都虞候司判官先指揮今於州縣前資之中簿尉判



司之內選差勾當二年行有廉謹理無黨偏卽委本道奏聞請行酬獎者近日馬步判司多是差攝官充馬步判官奏薦須於前資正官判司簿尉中精選明練公法性行端正者方可任使滿二周年後無遺闕者與減三選仍委本道州府一例給與公憑如只欠三選已下者仍便給與文解赴選今日已前有前資正官充馬步判官並准此所有諸道州府應今日已前已差攝試官充馬步判官勾當已及三年無遺闕者亦宜令本州府給與公憑仍便申奏更四年後給與文解赴選比擬初官其今日已前攝試官見充職有過一周年者宜令待滿二年日准上處分如未及一周年者宜令逐道州府勅到後便差別前資正官停替不在給與公憑者僞清泰二年三月二十四日勅停廢前資攝正官充馬步判官前件勅已經封鎖不行者勅僞清泰二年三月已前諸道州府所差馬步判官有勤績者宜令並准元勅赴吏部叅選不得更經中書陳狀十月勅選人試判兩道

三年正月勅舉選之流辛苦備歷或則耽書歲久或則守事年深小有違碍格條例是不知式樣今則方求公罷宜被皇恩所有選人等宜各令所司除元駿



放及落下事由外無違碍並與施行仍令所司徧下諸道起今後文解差錯過在發解州府官吏

八月勅御署官員等自前並於中書陳狀引驗文牒擬官承乏之官從權所任例逢興運咸被異恩其間慮有曾立事功或未親官業宜稍分於殿最將審驗於行藏免興濫進之譏用副當仁之選其御署官員宜令今後於銓司投狀銓司追引點簡歷任文書分明者申送中書門下以憑旋據逐人御署因由奏擬十二月勅以唐長興四年四月五日節文應州縣官纔授新命及到任一考前丁憂服闋日亦並與除官

者此後應一考前丁憂州縣官等服闋後准格便合赴選自因唐朝勅命送至中書除官自今後宜令吏部准格指揮仍赴所司

五年三月詔吏部三銓聽四時選擬官旋奏不在團甲之限

十月詔曰過格選人等早列官途合依選限或值戈鏗之隔越或緣貧病以淹延既礙舊條永為廢物適當闔劄宜憫湮沈可赴吏部南曹准格召保是正身者與降資注官

冊府元龜

銓選部



冊府元龜

巡按福建監察御史臣李嗣京大訂正

知甌寧縣事臣孫以敬叅閱

知建陽縣事臣黃國琦較釋

銓選部

六

條制第六

晉少帝天福八年正月詔顯陵行事及祔廟等行事  
官並宜加兩階減兩選理減外合格日免取文解便  
與注官過格者降一資為事勒停者許從勒停日理  
本官選數仍減與兩選合格日免取文解仍注邊遠



同類官

三月勅諸道州府令佐在任招携戶口比初到任交領數目外如出得百戶已上量添得租稅者縣令加一階減一選主簿減一選出二百戶已上者及添得租稅者縣令加兩階減兩選主簿減兩選出三百戶以上及添得租稅者縣令加兩階減兩選別與轉官主簿加兩階減兩選出四百戶至五百戶已上及添得租稅者縣令與加朝散大夫階超轉官資罷任後許非時叅選仍錄名送中書如已授朝散大夫及已出選門者卽別議獎勵主簿加三階其出剩不及一百戶者據戶口及添租稅數縣令加一階叅選日超一資注官主簿加一階

五月勅曰吏部已判成選人等訪聞人數絕多闕員甚少頗為淹注例是饑貧宜推振滯之恩用廣進身之路諸州府判掾見有員闕不少其見在黃衣選人等宜令注授前件官除三京鄴都掾曹外其餘竝許注擬候秩滿無遺闕者五選六選減一選七選八選減兩選九選十選減三選內有超資者再入官日卽依本資敘理河東管內及鄜延涇邠秦隴鳳等州管內闕員不少選人以家私不便多不伏官宜令所司



不拘超折注擬仍俟秩滿無遺闕者五選六選減三選七選八選減四選再入官日却依本資敘理所注前項州縣官等宜令銓司依判成次第注擬切在公當不得阿私仍不許選人通關仍付所司

六月尚書兵部侍郎呂琦奏臣竊見四時選人三銓待闕停滯已及於數百棲遲列困於累年南曹繫日申銓嘗有三十二十格式每月送闕不過五員七員竊慮闕員漸稀人數轉衆拋耕稼於鄉里忍窮餓於街坊名利之途人所難格朝夕之困事亦可矜若不改張恐未通濟欲請勒定月日南曹注納文解只據

見在判成待闕選人取殘闕及逐月新闕量人材優劣據員闕好弱許超折注擬如此卽歲暮至新春已來相次發遣應盡其將來選人卽依舊至來年十月下解南曹應期判成銓司准格注擬至次年選舉有正格勅用正規程從之仍勅取今年八月一日後往納文解其已判成許超折人將來參選却依本資注擬從之

開運二年正月吏部侍郎王易簡奏吏部流內銓諸司令史各主一司不相統攝苟有踰濫無所責成起今後望令本銓闕頭一人都簽署諸司案牘者勅旨



銓總之司提舉是務時臨注擬尤在精詳宜令三銓仔細看驗關牒或稍涉差謬卽據理科條將澄刈楚之風用誠侮文之吏

是月刑部侍郎趙遠奏臣伏覩長興四年五月二十三日勅州縣官在任日有覆推刑獄公事雪得冤獄活人命者准長興元年二月二十一日南郊赦書節文便許非時叅選特與超資注官仍賜章服者宜令諸道州府凡有雪活冤獄州縣官等依元勅點簡給付公憑本官自費赴刑部投狀委刑部據狀近取本道雪活公案叅驗如事理合得元勅便仰給付優牒

此蓋道弘激勸務絕罔欺在酬獎以甚優期刑殺而無濫臣詳元勅只言州縣官員所許加恩未該內外職掌臣又詳前後請給優牒人等文案若係雪冤屈本道尋合奏聞例過五年十年本人方來論請具却尋追文案勞擾公方於事難明於理未當伏惟皇帝陛下體堯仁而御寓敷舜德以臨民大闡化條克修刑政旁詢闕典用整宏綱功必賞而罪必誅善者進而能者激起今後但能雪活冤獄不限在朝職司亦乞量加旌賞應關諸道州縣官員雪活冤獄不虛委逐處長吏抄畧指實按節先具奏聞所付本人憑由



官滿到京便於刑部投狀不得隔越年歲方可論訴  
功勞庶內外以皆同使期程而有守廣停壽好生之  
德盡高低察獄之明者勅旨理寬申屈勞績可嘉內  
職外官課最無異苟能雪活何愆甄酬宜先錄公文  
直具聞奏或實官滿到闕投狀無致隔年底絕濫訛  
用分真僞宜依

三年四月吏部侍郎王易簡奏伏以選門格勅條件  
具存藩府官僚該詳蓋寡所以凡給文解莫曉規程  
以致選人自詣京都親求解樣往來既苦已堪憫傷  
傳寫偶差更當駁放伏見禮部貢院逐年先書版榜

高立省門用示舉人俾知狀樣臣欲請選人文解委  
南曹詳定解樣兼備錄長定格取解條例各下諸州  
如禮部貢院板樣書寫立在州縣門每遇選人取解  
之時各准條件遵行仍依板樣給解從之

十月勅今年四月二十五日釐革應前資州縣官一  
考前丁憂一任除官雪活冤獄及在任日招添得戶  
口稅錢曾授御署官進策官諸州馬步判官諸色選  
人等今後並須准勅格參選不得直經中書陳狀近  
日有諸色人依前紊亂紀綱披陳文狀欲以嚴行於  
懲戒先明示於指揮國家大啓銓曹高懸選格諸色



選人宜歸嘗調合赴所司稍立政能足可進退豈得  
罔循嘗制唯務僭求勅釐革而不遵帖告示而不退  
向路隅而陳接隨馬後以諛譁或稱罷秩家貧或訴  
任京日久朝廷須存公道難徇私懷若事可施行雖  
朝陳狀而夕得官未足言速既理有違碍雖歷祁寒  
而經暑雨不必言遲戚本自貽咎將誰執殊不知官  
不可乞勅不可違若無誠懲何以齊整應諸色選人  
等並須准近勅取解赴選其有招添得戶口增益得  
稅錢及靈活寃獄合該勅條酬獎者仰於所司投狀  
如有司不與公當區分顯有抑滯在經中書陳狀當  
與指揮此度分明告諭後諸色選人等如更不稟指  
揮依前妄陳文狀當送御史臺勘問必無輕恕仍付  
所司

漢高祖乾祐元年正月中書奏以諸道奏薦官吏多  
踰舊式今簡取後唐及晉朝事例開條曉示以爲定  
制者一准長興二年七月十二日節文諸道奏薦州  
縣官使相每年許薦三員今許薦五人不帶使相藩  
侯每年舊許薦二人今許薦三人防禦團練使每年  
舊許薦一人今許薦二人卽不得受人請託只得奏  
巡屬員闕不得薦於別處州府仍不得薦新罷任及



過格人其所薦人歷任文書仍隨表送中書門下未  
曾有官者當別比擬應諸道見任州縣官申奏考滿  
後未有替人本道或藉其幹能且令勾當一准長興  
三年五月十一日節文諸道應奏薦州縣官員如未  
有正官者只許奏授初官不得奏爲令錄一准長興  
四年八月節文應諸道藩鎮防禦團練使舊奏薦并  
前項州縣官等准勅許奏薦見在幕中攝職及見攝  
管內州縣官據合奏人數皆正所攝不許橫薦及不  
得薦外管前資州縣官一准天福四年七月七日節  
文應諸州防禦團練刺史奏薦攝試官充判官及推  
官巡官者自今後所奏薦攝試官充判官及推官巡  
官宜令精加選擇或未曾任官職及無出身稱攝試  
銜者不在奏舉之限一准天福十一年六月五日節  
文今後諸道藩鎮防禦團練刺史如本處幕中有闕  
准元勅合奏薦者卽得奏薦當與除授不得橫薦前  
資責從州縣官及諸色職員布於在朝及外管安排  
不得有違奏勅設官分職朝廷自有規程薦士延才  
州郡合存體式應諸道節度防禦團練刺史奏薦判  
官書記支使推官令錄簿尉等親人之官不易入幕  
之客尤難必取當仁庶聞幹事守臣奏薦朝廷選除



素有明文咸拘定制近年以來除人或虧允當薦士多昧選求體制既踰紊亂滋始遐邇將期於致理奏除宜在乎擇才况有舊章足爲嘗式其諸道行軍副使兩使判官竝不得奏薦委中書門下選除帶使相節度使許奏節度掌書記觀察支使節度推官不帶使相節度使只許奏節度掌書記節度推官其防禦團練判官刺史判官等聽奏仍須精選才能其唐朝晉朝前項條貫竝可舉行永爲規制所奏薦州縣官自有銓行不可侵越以勅內舊人數許奏使相三人不帶使相二人防禦團練刺史一人爲定仍付所司

隱帝乾祐元年七月吏部員外郎嘗准上言臣以國家選擇令佐或從銓注或是勅除立考課以按政能驗貪廉而行黜陟如斯條貫尚有闕遺近者諸道州府多署攝官以代正授旣不拘於考績唯掇斂於資財致使戶民轉爲蠹耗臣請示諸道州府長吏如今佐正官月限已滿除替未到不限時月切不得以攝官衝替須待正授替官卽令對面交割縣務然後本州使出給解由批書曆子如此則承真命者守文畏法求攝任者退亦悛心

二年正月勅睿陵及祔廟諸司職掌行事人等竝減



二年勞如欠一選及已合格者南曹磨勘送名中書其州縣前資官判成人及幕職京官等並減兩選仍令南曹點簡若別無違碍欠三選已上者給與減選公憑若欠兩選一選及已合今格限者所司具名申送中書門下其判成選人銓司越一資注擬

四月中書門下奏准吏部南曹鍊宿內選人中有契丹會同年號曆子解由考牒未審各令改就天福年號爲復別有指揮奏勅應是僞命文書不在施行之限者今緣有晉州受官契丹年給解由曆子若執格勅文慮有廢身名欲議酌中不至沉棄者凡州縣官

幕府官曾受契丹僞命者追文書毀廢者取唐朝晉朝出身文書參選本選外仍殿五選降三資注擬凡唐朝晉朝諸科及第人于契丹年號內出給冬集許追毀換給仍據新給年月日數理選從之

八月右拾遺高守瓊上言有國通規無先擢士論選既當綱紀必陳而縣令字人最親理道若宰大邑難用小才一同皆繫于慘舒百姓咸關于利病實賴勤恪以恤孤憐吏若不臧人當受弊近年銓司注擬藩府薦論只循資歷而行不以年顏爲念且少年宰邑鮮有廉勤不執公方惟貪娛樂以臣愚見凡朝廷選



親人之官年未三十請不授縣令少年授任必慮因循勅令錄之任責辦非輕用捨之間尤宜適中少小者未曾履歷則爲政必疎衰晚者已及耄昏則臨民多廢須期慎選以擢吏能起今後諸色選人年及七十者並宜注優散官年少未歷資考者不得任縣令十二月勅中書奏前資朝官近日併於中書陳狀稱准宣命指揮自外地發遣相次到京正當冬寒未有員闕旣難淹泊須議指揮其前資文武兩班朝官等只宜於西京及闕下任便安居候闕除授宜令御史臺曉示又中書條奏准天福八年四月一日勅條舉

前後勅文內一件准天福五年十月二十七日勅應州縣官書得十六考敘階至朝散大夫者并歷任內曾昇朝及兩使判官者准元勅一選集選期旣近理減尤難不得援嘗選人例妄乞減選每一任無遺闕者候再除官別與加恩其曾任節度觀察推官巡官防禦團練軍事判官并諸出選門官等如却授令錄者並依見任官選數赴集若在任有考課准格合減選者並與理減除此外今任合七選集者特與減一選八選已上與減兩選仍並合格日取解赴所司磨勘無違碍者卽錄名送中書勅審官之要必擇才能



與理同歸迭處中外約以選限固有條格邇來或自朝行或從賓職願為州縣自就便宜當求事之時冀得而不論卑位及既替之後敘資而却理前官須立規程以絕僥倖

是冬近臣奏前資朝官判官在外藩居止其間輕薄求利者能以詞說搖動藩臣乃下宣命但是前資朝官從事並來京中居止其求事者利其宣命遂雲集都下相與朋結三五為羣於宰臣樞密使馬前遮訴初楊邠甚怒出此釐革然而遮訴不已

周太祖廣順元年二月勅朕祇膺景命淹有中區每思順物之情從衆之欲將使炤臨之下咸遂寬舒仕宦之流自安進退往者時有拘忌人或滯留所在前資並遣赴闕輦轂之下多寄食儻舍之人歲月之間

動懷土念家之志宜循大體用革前規應諸道州府有前資朝官居住如未赴京不得發遣其行軍副使已下幕職州縣等官得替求官自有月限年月未滿一聽外居如非時詔徵不在此限但闕員有數入官者多苟無定規必生躁競凡爾進取知朕意焉

漢隱帝時楊邠以前資官在外地慮有游說藩方易萌姦妄故宣諭外州凡前資朝臣使府幕職不得外地居止須求京師尋宣諭只令兩京居止太祖知其不便故下此勅

是月勅自前朝廷除官銓司選授當其用闕皆棄舊規近聞所得官人或佗事所留或染疾淹駐始赴任者既過月限後之官者遂失期程以至相訟漸成非



次是致新官叅謝欲上舊官考秩未終待滿替移動逾時月凋殘一處新舊二官在迎送以爲勞必公私之失緒今後應諸道州府錄事叅軍判司縣令主簿等宜令本州府以到任月日旋具申奏及報吏部此後中書及銓司以到任月日用闕永爲定制其見任州縣官限勅到仰便具先到任月日一齊分析申奏及報吏部其有諸色事故及丁憂并請假十旬滿日亦仰旋具申奏兼報吏部其新受官准令式給程限外如不到本任叅上致本處無憑申奏到任月日便仰吏部同違程不上收闕使用其諸見闕亦不得差官攝權輒便隱留如違勅條罪在本判官錄事叅軍孔目官已下

是月吏部三銓奏去年冬南曹判成選人三百八十一人經十一月二十二日兵火散失磨勘了歷任文書或有送納文書未鈔及取到南曹失墜公憑銓司若依格磨勘恐選人訴論今欲只據南曹給到失墜公憑便與施行從之

五月勅朕祇荷上玄恭臨大寶慮一夫之不獲期四海之攸歸近知銓選人多州縣闕少或經年而空掩桂玉未授一官或欲歸而暗想鄉閭又遙千里以斯



去任虛歷歲時其間或妄乞官者多是踰違自稱淹滯或未合格者不遵條制顯紊公方宜行釐革之文以絕倖求之路宜令自今月十一日已前州縣前資官及諸色選人等曾經中書陳狀者竝送吏部南曹磨勘如今年冬合格無殿犯違礙者卽送中書除官未合格并諸色違礙格勅及曾殿黜得洗雪者並仰各守格勅敘理赴集其漢朝州縣爲徵科不了及擅用破逃戶停官人數並令赴吏部南曹投狀磨勘實是無過停替者本朝鮮由公憑及牒三司灼然過准格減一考前停官者可送名中書除官一考後兩考前停官者減一選兩考已上者上理本官選數竝取解赴集起今後應有前資州縣官并諸色選人等及曾經黜該恩得雪者竝仰各守勅格赴選不得妄有乞官如敢故違宜殿兩選將來降一資注擬如或本司不依格勅妄有滯留罪在所司當行典憲一則俾守規程之道一則稍除躁競之門免恣踰濫貴尊條制如是特恩不拘是例

是月勅朝廷設爵命官求賢取士或以資敘進或以科級昇至有白首窮經方階一第半生守選始遂一官是以國無幸民士無濫進近年州郡奏薦多無出



身前官或因權勢書題或是裏私請託既難阻意便授真恩遂使躁求微倖之徒爭遊捷徑辛苦孤寒之士盡泣窮途將期激濁揚清所宜循名責實凡百有位當體朕懷今後州府不得奏薦無前官及無出身人如有奇才異行越衆超羣亦許具名以聞便可隨表赴闕當令有司考試朕亦自更披詳斷其否臧俾之是黜庶使人不謬舉野無遺才冀廣得人以資從政

六月中書門下奏得司勳郎中許遜申權主判吏部格式選人皆稱值去年十一月內失墜告牒雖尋舊式有例簡行竊緣官員上任之日只憑告勅籤符罷秩之後卽藉解繇曆子既失官牒得以簡其勅甲若無解繇難知真偽欲請今後若無解繇曆子考牒者候牒本道州縣勘尋有何殿最候廻文與陳狀官員事理同卽依牒申銓取保再給憑繇貴無踰濫之人免有微求之倖從之

是月勅追尊四廟諸司寺監合差行事官宜令差補漢末七州停替州縣官充候行事了各與除官如行事官人數未足以前資州縣官已合格并過選者充仍歷勘官牒委無違碍方得差補又勅今年正月五



日恩赦前應諸色官員有過犯合追毀出身歷任官牒至今尚未追毀其本官敘理仍各依格勅處分  
八月吏部南曹磨勘勸進官點簡內有室長相次呈納到出身已來補牒優牒多奏補不依年限當曹先爲去年冬集選人年滿室長李溥張宗又爲奏補不依年限駁放後便值兵火失墜補牒優牒申中書門下取裁欲依判成選人失墜文書例出給公憑奏勅宜令所司各出給失墜文書公憑候參選日磨勘理本官選限外仍各殿兩選應乾祐六年已來及自今後如有齋郎奏補後年限滿令定冬集及推補室長時有違格勅不依年限者違一年殿兩選二年殿三選違二年已上者不在施行之限仍勅下後殿選餘竝准前後勅施行

九月勅朝廷命官分治州縣至於招安戶口增益稅租明立賞科以勸勤吏近朝釐革雖有勅文俱未適中難仍舊貫晉代則傷於容易啓僥倖之門漢朝則過於艱難妨進趨之路旣非允當須議改更宜令應州縣官所招添到戶口課績自今日已前罷任者並准天福八年三月十一日勅施行其漢乾祐三年七月二十五日勅不行起今後應罷縣令主簿招添到



戶口其一千戶已下縣每增添蒲二百戶者減一選  
三千戶已下縣每三百戶減一選五千戶已下縣每  
四百戶減一選萬戶已下縣每五百戶減一選并所  
有增添戶及租稅並須分明於曆子解由內錄都數  
若是減及三選已上更有增添及戶數者縣令與改  
服色已賜緋者與轉官其主簿與加階轉官

十月勅選部公事比置三銓所有員闕選人分在三  
處每至注擬之際資敘難得相當况又今年選人不  
多宜令三銓公事併爲一處委本司長官通判同商  
量可否施行所冀掄選得中銓綜有序其吏部尚書

銓見闕宜差禮部尚書王易權判

二年三月勅應京諸司職掌赴西京冊廟行事八十  
有六人宜令吏部南曹別驗出身歷任行事無遺闕  
曆子委無違碍與各減一選如有今年冬初合格又  
已過選者銓司注官日與加一階其不該選數已經  
補奏者減一年勞

十一月詔曰古者立封樹之制定喪葬之期著在典  
經是爲名教泊乎世俗衰薄風化陵遲親歿而多闕  
送終身後而便爲無主或羈束於仕宦或拘忌於陰  
陽旅櫬不歸遺骸何託但以先王垂訓孝子因心非



以厚葬爲賢只以稱家爲禮掃地而祭尚可以告虔  
負土成墳所貴乎盡力宜頒條令用警因循庶使九  
原絕抱恨之魂千古無不歸之骨應內外職官及選  
人等今後有父母祖父母亡沒未經遷葬其主家之  
長不得輒求仕進所由司亦不得申舉解送如是卑  
幼在下者不在此限其合赴舉選者或是葬事禮畢  
或是卑幼在下勒於所納家狀內具言不得罔冒宜  
令御史臺及逐處長吏本司長官所由司覺察申舉  
其中有兵戈阻滯或是朝廷特恩除拜起復追徵及  
內外管軍職員皆以金革從事並不拘此例

三年五月勅近日多有諸色出選門州縣官累經中  
書陳狀援引從前勅文乞除官事多中書先乾祐二  
年二月十日勅文以此難議施行今將已前勅文詳  
酌可否特與條貫庶無淹滯應前後出選門州縣官  
內有十六考敘朝散大夫階次赤令并歷任中會昇  
朝及兩使判官五府少尹罷任後一周年除官曾任  
兩藩營田判官書記支使防禦團練判官罷任後二  
周年與除官竝許經中書陳狀點簡不欠年限當與  
施行選期既定不得依掌選人例更理減選仍須分  
明批書曆子請給解由若是逃夫戶口降書考第其



顯有過犯必行殿降應諸色選人過犯三選已上及未成資考丁憂課績官無選可減者宜令自於吏部南曹投狀准格勅磨勘無違碍申送中書門下竝與除官其州縣官自恐虧損年限資序歸選門者亦聽自便如或曾任推巡軍事判官等竝諸色出選門官竝據見任官選數敘理取解赴集依格勅磨勘送名中書門下於銓司注擬前先次除官所有諸色掌選人皆自有選限合赴掌調今後不得妄有陳乞及不依格勅論理功課如違當行舉勘若是特恩除授及擢才委任不拘此例

十一月勅郊禮行事官竝差在京永任者充各據出身歷任仔細磨勘委無違碍方得差補如曾有殿犯除名免官勒停等人未經恩洗雪者不在收補之限若已取解及免取解赴選在外未來者不得著人承替如收補行事後將來赴選南曹磨勘別有違碍所補官司與本人竝當勘斷

是月勅天下縣邑素有等差歷年月以旣深或增損之不一其中有戶口雖衆地望則卑地里雖高而戶口至少每至調集不便銓衡及有久歷官途却授隘狹之縣纔昇仕進便臨繁庶之民宜立成規庶叶公



共應天下縣除赤縣畿縣次赤次畿外其餘三千戶已上為望縣二千戶已上為緊縣一千戶已上為緊縣五百戶已上為中縣不滿五百戶為中下縣選人資敘合入下縣者今許入中下縣宜令所司據今年天下縣戶口數定望緊上中下次第聞奏吏部格式據戶部今年諸州府所管縣分列戶口數目定合為望縣者六十四緊縣七十二上縣一百二十四中縣六十五中下縣九十七欲依所移銓曹從之

顯德元年正月赦文應祇奉郊廟職掌人直竝與恩澤其行事官已勘無違礙者候銓司移省後各與除官合來一年集者候將來授任仍竝加一階欠三選至五選者減一選欠六選已上減兩選幕職並與減一年如欠月限不及一年者便與除官仍轉官資其諸色選人駁放皆依格勅其間小小違礙若可以情恕者竝條奏以聞

世宗顯德二年正月詔在朝文資官曾歷藩郡賓職州縣官者宜令各舉堪為令錄者一人除官之日仍署舉主姓名若在官貪濁不公懦弱不理或職務廢闕或處斷乖違竝量事重輕連坐舉主

三年十月詔曰諸司職員皆係奏補當執役之際悉



藉公勤及任事之時尤資幹敏苟非慎擇漸至因循  
應諸司寺監今後收補職役人等並須人材俊利身  
言可採書札堪中自前行止委無訛濫勒本司關送  
吏部引驗人材較考筆札其中者更具引驗可否連  
所試書跡竝本州府不係色役迴文及正身引送中  
書後吏部具夾名聞奏候勅下勒本司補收餘從前  
後格勅處分每年只得一度奏補其諸司寺監舊額  
定人數仍令所司量公事繁省於未奏補人數內酌  
詳添減別爲定額

先是百司奏補官吏於事言筆札  
之間多不選擇以至有不能舉其

條目者勅出之後  
物議以爲允當

五年正月詔曰職官攸設數易則弊生政理所施久  
行則民信前典有三載考績之義昔賢垂三年報政  
之規將欲化民莫如師古諸道幕職州縣官依舊制  
以三十箇月爲滿起今年正月一日後所授官竝以  
三周年爲月限閏月不在其內每年常調選人及諸  
色求仕人取十月一日已前到京下納文解及陳乞  
文狀委所司依舊例磨勘注授至十二月上旬終竝  
須了畢便令赴官限二月終以前到任若違程仰本  
處不得放上且令舊官在任如是無故違程依格殿  
選其有故違程者須分明出給得所在憑由許至前



冬赴集今年赴任者不在此例其特勅除授及隨幕判官赴任不拘時月之限應授官人至滿日替人未到問宜令且守本官主當公事依舊請俸州府亦不得差署攝官替下如是遭喪停任身故假滿非時闕官之時只可差前資正官及有出身人承攝如逐處無正官及有出身人卽選清強人承攝仍依正官例支與俸錢具名奏聞

閏七月吏部流內銓狀申見行條件公事銓司先准格例南曹十一月未開宿判成選人後先具都數申銓銓司據狀便榜示選人引納京諸司職官使家狀及試判紙三度榜引得齊足方至十二月上旬內定日鑱銓者銓司若候南曹十月內開宿引納家狀慮恐遲滯今後纔南曹鑱宿後先榜示選人預納家狀其合保文狀使職官司使卽限開曹後兩日內赴銓送納須得齊足如限內不納到家狀保狀試紙名便具姓名落下不在續納之限據納到文狀至十月二十二日巳前鑱銓先准格例鑱銓後便榜示引驗正身告勅文書三引都九日如三度引不到者便落下銓司自今後鑱銓日便榜示選人次至日引驗正身及告勅文書限三日內三引畢如不到者便落下每



年南曹判成選人中多有託故不赴選司准格例伺候須及三引計九日不到者方始落下銓司今後有此色人逐引不到便據姓名落下先准格諸色選人三引畢後賫使印保狀赴銓并合保後縣令錄事參軍重引驗合保審其才術銓司欲三引後次日內重引驗令錄審其才術及合保如限內不到者便據姓名落下銓司引驗後本行准格勅及將銓狀歷任告勅文書限三日內點簡無違礙具名街關報試判注擬所有選人歷任省草於未注官已前相次脩寫帖送過院選人所合注使員闕鑱銓後便具狀申中書

門下乞降指揮應選人試判今欲鑱銓內預准勅於中書省請印到逐人試紙候點簡畢關報名街齊足次日便定日試判三場逐場次日申奏後限兩日內供納宣黃後次日乞降可否勅命銓司自前注擬諸色選人准格三注每一注內有不伏官者限三日內具狀通退三注都九日者銓司自今後第一第二注勝出後各限次日內具通官伏官文狀便具姓名落下第三注畢日開銓不在通官之限三注都五日准格銓司送省逐年二月二十五日送門下省畢三月十五日過官畢三月三十日進黃移省畢銓司三擬



畢後省甲案便於格式司逐在旋覆闕入官過院條  
寫省歷至十一月十四日已前牒送門下省畢銓司  
門下省但押定牒到取兩日祇候取判過堂次日乞  
降可否堂帖其黃甲限四月內修寫勾勘印署至十  
二月六日牒送門下省至十二月十九日進黃畢所  
有衙謝對駁元在格限外應行內諸司公事或有忤  
繫申銓取裁銓司便准勅格指揮如銓司難議裁酌  
卽申堂取裁

冊府元龜

冊府元龜

巡按福建監察御史臣李嗣京訂正

新建縣舉人臣戴國士參閱

知建陽縣事臣黃國琦較釋

銓選部 七

考課

設官分職以序上下程能黜否以正賞罰王者之大  
柄也故周禮太宰之職三歲大計羣吏之理而誅賞  
之又曰廢置以馭其吏斯皆考課之謂也是知明試  
以稽其功循名以覈其實使較比之典不可得而



賢愚之分不可得而亂斯二帝所以端拱而治三代所以直道而行者也漢魏而下制度詳究或斟酌前訓將以適時或講求通議於焉垂範至於總裁理要澄汰流品詢事底績咸可明徵稽古憲章於是乎在蓋夫又衆職熙百志使官脩其方而上無虛授者莫不由茲道也

帝舜曰咨汝二十有二人

禹垂益伯夷夔龍六人申命舊職四岳十二牧凡二

十二人特勅命之

欽哉惟時亮天工

各敬其職以相天事三能信立天下之功

載考績三考黜陟幽明

三年有成故以考功九歲則能否幽明有別黜退其幽者

升進其明者也

庶績咸熙分比三苗

考績法明衆功皆廣三苗幽闇君臣善否分比

流之不相從善惡明也

漢元帝建昭中京房為郎時西羌反日蝕又久青無

光數召見問房對曰古帝王以功舉賢則萬化成而

瑞應著末世以毀譽取人故功業廢而致災異宜令

百官各試其功災異可息詔使房作其事房奏考功

課吏法

令丞尉治一縣崇教化已犯法者輒選有盜賊滿三日不覺者則尉事也令覺之自除二

尉責其二率相准如此法

帝令公卿朝臣與房會議溫室皆以房

言為煩碎令上下相司不可許帝意鄉之

鄉讀時部

刺史奏事京師帝召見諸刺史令房曉以課事刺史

復以為不可惟御史大夫鄭弘光祿大夫周湛初言



不可從善之後帝令房上弟子曉知考功課吏事者欲試用之房上中郎任良姚平願以為刺史試考功

法臣得通籍殿中為奏事以防雍讀塞石顯五鹿充

宗皆疾房欲遠之建言宜試以房為郡守立議云帝然也

於是以房為魏郡太守秩八百石居得以考功法治

郡房自請願無屬刺史得除用他郡人自第吏千石

以下令長屬縣自歲竟乘傳奏事傳張天子許焉房

至郡坐與淮陽王舅張博通謀誅

後漢明帝永平九年四月詔令司隸較尉部刺史歲

上墨綬長吏視事三歲已上理狀尤異者各一人與

計偕上偕俱也所徵之人及尤不正理者亦以聞

順帝時梁國陳令華義數上書陳宜依古典考功黜

陟徵集名儒大定其制

魏太祖建安中為丞相倉曹屬劉廙書論治道曰昔

者周有亂臣十人有婦人焉九人而已孔子稱才難

不其然乎明賢者難得也况亂弊之後百姓凋盡士

之存者蓋亦無幾股肱大職及州都督司邊方重任

雖備其官亦未得人也此非選者之不用意蓋才匱

使之然耳况於長吏以下羣職小任能皆簡練備得

其人也其計莫如督之以法不爾而數轉易往來不



已送迎之煩不可勝計轉易之間輒有姦巧既於其事不省而爲政者亦以其不得久安之故知惠益不得成於已而苟且之可免於患皆將不念盡心於卹民而夢想於聲譽此非所以爲政之本意也今之所以爲黜陟者近頗以州郡之毀譽聽往來之浮言耳亦皆得其事實而課其能否也長吏之所以爲佳者奉法也憂公也卹民也此三事者或州郡有所不便往來者有所不安而長吏執之不已於治雖得計其聲譽未爲美闕而從人於治雖失計其聲譽必集也長吏皆知黜陟之在於此也亦何能不去本而就末哉以爲長吏皆宜使少久足自展歲課之能三年摠計乃加黜陟課之皆當以事不得依名事者皆以戶口率其墾田之多少及盜賊發興民之亡叛者爲得負之計如此行之則無能之吏脩名無益有能之人無名無損法之一行雖無部司之監姦譽妄毀可得而盡事上太祖甚善之

文帝黃初初爲尚書陳羣制九品格登用皆由於中正考之簿世然後授任  
明帝青龍中以盧毓爲吏部尚書前此諸葛誕鄧颺等馳名譽有四窓八達之誚帝疾之時舉中書郎詔



曰得其人與否在虛生耳選舉莫取有名名如畫地作餅不可啖也毓對曰名不足以致異人而可以得掌士掌士畏教慕善然後有名非所當疾也愚臣既不足以識異人又主者正以循名按實為識但當有以驗其後故古者敷奏以言明試以功今考績之法廢而以毀譽相進退故真偽混雜虛實相蒙帝納其言卽詔作考課法

景初中散騎掌侍劉劭以士人毀稱是非混雜莫辨邵受詔作都官考課劭上疏曰百官考課王政之大較然而歷代弗務是以治典闕而未補能否混而相蒙陛下以上聖之宏畧愍王綱之弛頽神慮內鑒明詔外發臣奉恩曠然得以啓據輒作都官考課七十二條又作說畧一篇臣學寡識淺誠不足以宣暢聖旨着定典制事下三府司空掾傅嘏難劭曰蓋聞帝制宏深聖道奧遠苟非其才則道不虛行神而明之存乎其人暨乎王畧虧頽而曠載罔綴微言既沒六籍泯玷何則道弘致遠而衆才莫晞也按劭考課論雖欲尋前代黜陟之文然其制度畧以闕亡書之存者惟有周典外建侯伯藩屏九服內立列司莞齊六職士有掌貴官有定則百揆均任四民殊業故考績



可理而黜陟易通也大魏繼百王之末承秦漢之烈  
制度之流靡所脩采自建安以來至於青龍神武撥  
亂肇基皇祚掃除凶逆芟夷遺寇旌旗卷舒日不暇  
給及經邦治戎權法竝用百官羣司軍國通任隨時  
之宜以應政機以古施今事雜義殊難得而通也所  
以然者制宜經遠或不切近法應時務不足垂後夫  
建官均職清理民物所以立本也循名考實糾勵成  
規所以治末也本綱未舉而造制未呈國畧不崇而  
考課是先懼不足以料賢愚之分精幽明之理也昔  
先王之擇才必本行於州閭講道於庠序行具而謂  
之賢道修則謂之能鄉老獻賢能于王王拜受之舉  
其賢者出使長之科其能者入使治之此先王收才  
之義也方今九州之民爰及京城未有六卿之舉其  
選才之職專任吏部案品狀則實才未必當任簿法  
則德行未爲敘如此則殿最之課未盡人才述綜王  
度敷贊國式體深義廣難得而詳也又司隸較尉崔  
林議曰按周官考課其文備矣自康王以下遂以陵  
遲此卽考課之法存乎其人也及漢之季其失又在  
乎佐吏之職不密哉方今軍旅或猥或卒備之以科  
條申之以內外增減無嘗固難一矣且萬目不張舉



其綱衆毛不整振其領臯陶仕虞伊尹臣殷不仁者遠矣五帝三王未必如一而各以治亂易曰易簡而天下之理得矣太祖隨宜設辟以遺來今不患不法古也以爲今之制度不惟疏濶惟在守一勿失而已若朝臣能任仲山甫之重式是百辟則孰敢不肅又散騎黃門侍郎杜恕以爲用不盡其人雖才且無益所存非所務所務非世要上疏曰書稱明試以功三考黜陟誠帝王之盛制使有能者當其官有功者受其祿譬猶鳥獲之舉千鈞良樂之選驥足也雖歷六代而考績之法不著閱七聖而課試之文不垂臣謹以爲其法可粗依其詳難備舉故也語曰世有亂人而無亂法若使法可專任則唐虞可不須稷契之佐殷周無貴伊呂之輔矣今奏考功者陳周漢之法爲綴京房之本旨可謂明考課之要矣於以崇揖讓之風興濟濟之治臣以爲未盡善也其欲使州郡考士必由四科皆有事効然後察舉試辟公府爲親民長吏輔以功次補郡守者或就增秩賜爵此最考課之急務也臣以爲便當顯其身用其言使其爲課州郡之法法具施行立必信之賞施必行之罰至於公卿及內職大臣亦當俱以其職考課之也古之三公坐



而論道內職大臣納言補闕無善不糾無過不舉且天下至大萬機至衆誠非一明所能徧炤故君爲元首臣作股肱明其一體相須而成也是以古人稱廊廟之材非一木之枝帝王之業非一士之畧由是言之焉有大臣守職辨課可以致雍熙者哉且布衣之交猶務信誓而蹈水火感知已而披肝膽狗聲名而立節義者况於束帶立朝致位卿相所務者非特匹夫之信所感者非徒知已之惠所徇者豈聲名而已乎諸蒙寵祿受重任者不徒欲舉明主於唐虞之上而已身亦欲廁稷契之列是以古人不患於念治之心不盡患於自任之意不足此誠人主使之然也唐虞之君委任稷契夔龍而責成功及其罪也殛鯀而放四凶今大臣親奉明詔給事目下其有夙夜在公恪勤特立當官不撓貴勢執平不阿所私危行危言以處朝廷者自明主所察也若尸祿以爲高拱嘿以爲智當官苟在於免負立朝不忘於容身潔行遜言以處朝廷者亦明主所察也誠使容身保位無放退之辜而盡節在公抱見疑之勢公義不脩而私議成俗雖仲尼爲謀猶不能盡一才又况於世俗之人乎今之學者師商韓而上法術競以儒家爲迂濶不周



世用此最風俗之流弊創業之所致謹也後考課竟不行

晉武帝泰始中河南尹杜預以京師王化之始自近及遠凡所施論務崇大體受詔爲黜陟之課其畧曰臣聞上古之政因循自然虛已委誠而信順之道應神感心通而天下之理得逮至淳樸漸散彰美顯惡設官分職以頒爵祿弘宣六典以詳考察然猶倚明哲之輔建忠貞之司使名不得越功而獨美功不得後名而獨隱皆疇咨博詢敷奏以言及至末世不能紀遠而求於密微疑諸心而信耳目疑耳目而信簡書簡書愈繁官方愈僞法令滋彰巧飾彌多昔漢之刺史亦歲終奏事不制算課而清濁粗舉魏氏考課卽京房之遺意其文可謂至密然由於累歲以違其體故歷代不能通也豈若申唐堯之舊去密就簡則簡而易從也夫宣盡物理神而明之存乎其人去人而任法則以傷理今科舉優劣莫若委任達官各考所統在官一年以後每歲言優者一人爲上第劣者一人爲下第因計偕以名聞如此六載王者摠集採按其六載處優舉者超用之六載處劣舉者奏免之其優多劣少者敘用之劣多優少者左遷之考課之



品所對不均誠有難易若以難取優以易而否王者固當準量輕重微加降殺不足復曲以法盡也已丑詔書以考課難成聽通薦例薦例之理卽亦取於風聲六年頓薦黜陟無漸又非古者三考之意也今每歲一考則積優以成陟累劣以取黜以士君子之心相處未有官故六年六黜清能六進否劣者也監司將亦隨而彈之若令上下公相容過此爲清議大類亦無取於黜陟也

五年詔曰古者歲書羣吏之能否三年而誅賞之諸令史前後但簡遺疎劣而無有勸進非黜陟之謂也其條勤能有稱尤異者歲以爲嘗吾將議其功勞惠帝元康中吏部尚書劉頌建九班之制欲令百官居職適遷考課能否明其賞罰賈郭專朝仕者欲速竟不施行

南齊東昏侯永元元年考課百司

後魏大武大延元年詔曰操持六柄王者所以統攝平政理訟公卿之所司存勸農平賦宰民之所專急盡力三時黔首之所克濟各脩其分課之有序今更不然何以爲治越職侵局綱紀紛亂上無定令民知何從自今以後亡匿避難羈旅他鄉皆當歸還舊居



不問前罪民相殺害牧守依法平決不聽私輒報復  
敢有報者誅及宗族鄰伍相助與同罪州郡不得妄  
遣吏卒煩擾民庶若有發調縣宰集鄉邑三考計貲  
定課哀多益寡九品混通不得縱富督貧避強侵弱  
覆簡能否覈其殿最列言屬州刺史明考優劣抑退  
奸吏升進貞良歲盡舉課上臺牧守荷治民之任當  
宣揚恩化奉順憲典與國同優直道正身肅居官次  
不亦善乎

孝文延興二年十二月詔曰書云三載考績三考黜  
陟幽明頃者以來官以勞昇未久而代牧守無恤民  
之心競爲聚斂送故迎新相屬於路非所以固民志  
隆治道也自今牧守溫仁清儉尅已奉公者可久於  
其任歲積有成遷位一級其有貧賤非道侵削黎庶  
者雖在官逋邇必加黜罰著之於令永爲彛准  
五年二月詔定考課明黜陟

大和十五年十一月考諸牧守

十八年春太子太保錄尚書事廣陵王羽奏外考令  
文每歲終州鎮列牧守治狀及至再考隨其品第以  
彰黜陟去十五年終在京百僚盡已經考爲三等此  
年便是三載雖外有成令而內令未班內外考察理



應同等臣輒推准外考以定京官治行詔曰雖內考未宣績已久著故明堂月令載公卿大夫論考屬官之典台職區分著三公尚書三載殿最之義此之考內已爲明矣但論考之事理在不輕問績之方應關朕聽輒爾輕發殊爲躁也每考之義應在年終旣云此年何得春初也今始維夏且待至秋帝顧謂羽曰考課之法上下二等可爲三品中等但爲一品所以然者上下是黜陟之科故旌絲髮之美中等守本事可大通帝又謂尚書等曰卿等在任年垂二周未嘗進一賢退一不肖此二事罪之大者謂羽曰汝居樞端之任在職以來功勤之績不聞於朝阿黨之音頻干朕聽今黜汝錄尚書廷尉但居特進太保自尚書令僕以下凡黜退三十餘人皆舉遺闕諸如此比黜官者令一年之後任官如初

九月壬申詔曰三載考績自古通經三考黜陟以彰能否今若待三考然待黜陟可黜者不足爲遲可進者大成賒緩是以朕今三載一考考卽黜陟欲令過滯無妨於賢者才能不擁於下位各令當曹考其優劣爲三等六品以下尚書重問五品已上朕將親與公卿論其善惡上上者選之天下者黜之中中者守



其本任壬午帝臨朝親加黜陟  
十九年十月詔諸州牧精品屬官考其得失為三等  
之科以聞將親覽而昇降焉

宣武初尚書令王肅奏考以顯能陟由績著昇明退  
闇於是乎在自百僚曠察四稔于茲請依舊式考簡  
能否從之

景明二年六月考諸州刺史加以黜陟

永平六年十二月詔曰進善退惡治之通規三載考

察政之明典正始二年以來于今未考功過難齊寧

無昇降從景明三年至永平四年通考以聞時員外  
官侍鎮

遠將軍劉摠立考課之科  
明黜降之法甚有條貫大保領太尉侍中高陽王

雍以帝頒考陟之法上表曰竊惟三載考績百王通

典今任事上中者三年昇一階散官上第者四載登

一級閑冗之官本非虛置或取賢能而進或因累勤

而舉如其無能不應忝茲高選或征官外戍遠使絕

域或催督逋縣察簡州鎮皆是散官以充劇使及於

考陟排同閑伍竊據散官之人非是皆劣稱事之輩

未必皆賢而考閑以多年課煩以少歲上垂天澤之

均下生不等之苦又尋景明之格無折考之文正始

之奏有與奪之級明參差之考非聖慈之心改典易



掌乃有司之意又尋考級之奏委於任事之手涉議  
科勤絕於散官之筆遂使在事者得展自勤之能散  
輩者獨絕披襟之所抑以上下之閑限以旨格之判  
致使近侍禁職抱檠屈之亂禁衛武夫懷不申之恨  
欲克平四海何以獲諸又散官在直一玷成尤御史  
憊失差毫卽坐徽體所逮未以事之閑憂節慶之賚  
不以祿位加賞罰殿之犯未殊任事考陟之機推年  
不等臣聞君舉必書書而不法後代何觀詩云王事  
靡盬不遑啓處又曰豈不懷歸畏此簡書依依楊柳  
以敘治兵之役霏霏雨雪又申振旅之勤若折往來  
日月便是採薇之詩廢杖杜之歌罷又任事之官吉  
凶請假定省掃拜動歷十旬或因患重請告動輒經  
歲征役在途勤泰百倍苦樂之勢非任事之倫在家  
私閑非理務之日論優語劇先宜折之武人攬上格  
者爲羽林次格者爲虎賁下格者爲直從或累紀征  
戍靡所不涉或帶甲連年負重千里或經戰損傷或  
年老衰竭今試以本格責其如初有爽於先退階奪  
級此便責以不襄理未通也又蕃使之入必抽朝彥  
或歷嶮千餘或履危萬里發有死亡之憂咸懷不返  
之戚寘骨奉忠以尸將命先朝賞格酬以爵品今朝



改式上及階勞折以代考有乖使望非所以獎勵皇  
華而敦崇四牡者也復尋正始之格汎後任事上中  
者三年昇一階汎前任事上中者六年進一級三年  
一考自古通經今以汎前六年昇一階簡無憊犯倍  
年成級以此推之明以汎代考新除一日同霑階榮  
下第之人因汎上涉上第之士由汎而退王臣又見  
簿尉資品本官流外刊諸明令行之已久然近爲里  
巷多盜以其威輕不肅欲進品清汎以厭姦宄甄琛  
啓云爲法者施而觀之不便則改竊謂斯言有可採  
用聖慈炤鑒更高宰尉之秩今考格始宣懷怨者臣  
竊觀之亦謂不可有光國典改之何難帝乃引雍共  
論時務徐州刺史蕭寶寅又論曰方今守令厥任非  
輕及考課悉以六載爲程旣而限滿代選復經六年  
而敘是則歲周十二年始得一階於東西兩省文武  
閑職公府散佐無事冗官或數旬方應一直或弦朔  
止於暫朝及其考日更得四年爲限是則一紀之內  
便登三級彼以實勞劇任而遷貴之路至難此以散  
位虛名而昇陟之方甚易何內外之相懸令厚薄之  
如其後尚書右僕射郭祚又奏曰謹按前後考格  
雖班天下如臣愚短猶有未悟今頓定職人遷轉由



復超越階級者卽須量折景明初考格五年者得一階半正始中故尚書中山王英奏考格被旨但可止滿三周爲限不得計殘年之勤又去年中以前二制不同奏請裁決旨云黜陟之體自依舊來嘗斷今未審舊來之旨爲從景明之斷爲從正始之限景明考法東西兩省文武閑官悉爲三等考同任事而前尚書盧昶奏上第之人三年轉半階今之考格復分爲九等前後不同參差無准詔曰考在上中者得汎以前有六年以上遷一階三年已上遷半階殘年悉除考在上下者得汎以前六年已上遷半階不滿者除其得汎以後考在上下者三年遷一階散官從盧昶所奏昶又奏言考察令公清獨著德績超倫而無負殿者爲上上一殿爲上中二殿爲上下累計八殿品降至九未審今諸曹府寺凡考在事公清然才非獨著績行稱務而德非超倫幹能粗可而守平堪任或人用小劣處官濟事并全無負殿之徒爲依何第景明三年以來至今十有一載准限而判三應昇退今旣通考未審爲十年之中通其殿最積以爲第隨前後年斷各自除其善惡而爲昇降且負注之章數成殿爲差此條以寡憊爲最多戾爲殿未審取何行是



寡憊何坐爲多戾結累品次復有幾等諸文按失裏應杖十者爲一負罪依律憊過隨負計十年之中三經四青赦前之罪不問輕重皆蒙宥免或爲御史所彈案驗未周遇赦復任者未審記殿復除以不詔曰獨著超倫及才備寡咎皆謂文武兼上上之極言耳自此已降猶有八等隨才爲次今文已具其積負累殿及守平得濟皆含在其中何容別疑也所云通考者據聽多年之言至於黜陟之體自依舊來年斷何足復請其罰贖已決之殿固非免限遇赦免罪唯記其殿者除之

延昌二年將大考百僚員外掌侍領三公郎崔鴻以考令於體例不通乃建議曰竊惟王者爲官求才使人以器黜陟幽明揚清激濁故績效能官才必稱位者朝昇夕進年歲數遷豈拘一階半級關以掌僚等位者哉二漢已降大和已前苟必官須此人人稱此職或超騰峻陟數歲而至公卿或長兼試守稱允而不遷進者披卷則人人如是舉日則朝貴皆然故能時收名士之譽國號豐賢之美竊見景明以來考格三年成一考一考轉一階貴賤內外萬有餘人自非犯罪不問賢愚莫不上中才與不肖比肩同轉雖有



善政如龔黃儒學如王鄭才史如班馬文章如張蔡  
得一分一寸必爲掌流所攀選曹亦抑爲一槩不曾  
甄別琴瑟不調改而更張雖明旨已行猶宜消息宜  
武不從

考明孝昌元年二月詔曰勸善黜惡經國茂典其令  
每歲一終郡守列令長刺史列守相以定考課辨其  
能否若有濫謬以考功失秉論

隋文帝開皇六年二月制刺史二佐每歲暮更入朝  
上考課盧昌衡爲徐州總管長史甚有能名吏部尚  
書蘇威考之曰德爲人表行爲士則論者以爲美談

仁壽中秦州總管錄事參軍房彥謙嘗因朝集時左  
僕射高穎定考課彥謙謂穎曰書稱三載考績黜陟  
幽明唐虞以降代有其法黜陟合理褒貶無虧便是  
進必得賢退皆不肖如或舛謬法乃虛設比見諸州  
考校執見不同進退多少參差不類况復愛憎肆意  
致乖平坦清介孤直未必高第卑諂巧官翻居上等  
直爲真僞混淆是非替亂宰貴既不精練斟酌取舍  
曾經驅使者多以蒙職復成未歷臺省者皆爲不知  
被退而又四方懸遠難可詳悉唯量人數半破半成  
徒計官員之少多莫顧善惡之衆寡欲求允當其道



無由明公鑒達幽微平心遇物今所考較必無阿枉  
脫有前件數事未審何以裁之惟願遠布耳目精加  
採訪褒秋毫之善貶纖介之惡非直有光至治亦足  
標獎賢能詞氣侃然觀者屬目穎爲之動容深見嗟  
賞因歷問河西隴右官人景行彥謙對之如響穎顧  
謂諸州摠管刺史曰與公言不如獨與秦州考使語  
後數日穎言於帝帝弗能用

煬帝大業二年七月制百官不得計考增級必有德  
行功能顯著者擢之

五年正月詔曰太守每歲上屬官景迹

是年爲潁川郡丞敬肅朝東都帝令司隸大夫薛道  
衡爲天下郡官之狀肅曰心如鐵石老而彌篤

唐高祖武德二年二月帝親閱羣臣考績以李綱孫  
伏伽爲上帝初受禪以舞人安叱奴爲散騎侍郎綱  
上疏論諫伏伽亦諫賞獻琵琶弓箭者及請擇正人  
爲太子諸正師友皆言詞激切故皆陟其考第以旌  
賞之

太宗貞觀元年二月詔刺史縣令已下官人若能使  
婚姻及時鰥寡數少量准戶口增多以進考第如其  
勸導乖方失於配耦准戶口減少以附殿失



三年尚書右僕射房玄齡及侍中王珪掌內外官考治書侍御史權萬紀奏其不平追按勘問王珪不伏舉按帝付侯君集推問秘書監魏徵奏稱必不可推鞠且玄齡王珪國家重臣俱以忠直任使其所考者既多或一人兩人不當終非有阿私若卽推繩此事更不可信任何以堪當重委假令錯繆有實未足虧損國家窮鞠若虛失委大臣之體且萬紀比來嘗在考堂必有乖違足得論正當時鑒見切無陳說身不得考方始糾彈徒發在上曠怒非是誠心爲國無益於上有損於下所惜傷於理體不敢有所阿爲遂釋不問

六年監察御史馬周上疏曰臣切見流內九品已上今有等第而自比年入多者不過中上未有得上下以上考者臣謂令設九等正考當今之官必不施之於異代也縱朝廷實無好人猶應於見任之內比較其尤善者以爲上第豈容朝廷之士遂無堪上下之考者朝廷獨知貶一惡人可以懲惡不知褒一善人足以勸善臣謂宜每年選天下政術尤最者一二人爲上下其次爲上中其次爲上下則中人以上可以自勸



十一年正月十三日勅散位一切以門蔭結階品然

後依勞進敘凡入仕之後遷代則以四考為限四考

中中進年勞一階每一考中上進一階一考上下進

二階五品已上非特恩刺史無進階之令唐制考課之法有德

義清慎公平恪勤各一善自近侍至於鎮防并據二

事日為之最凡二十七焉一最以上有四善為上上

一最以上有三善或無最而有四善為上中一最以

上有三善或無最而有二善為中上一最以上或庶最而有

善或無最而有二善為中上一最以上或庶最而有

一善為中中職事粗理善最弗聞為中下愛憎任情

處斷乖理為下上背公向私職務廢闕為下中居官

諂詐及貪濁有狀為下下若於善最之外別有可嘉

尚及罪雖成殿情狀可矜或雖不成殿而情狀可責

者省較之日皆聽考官臨事量定諸州縣官人撫育

有方戶口增益者各准見戶為十分論每加一分刺

史縣令各進考一等增戶口謂課丁率一丁同一戶

法增不課口者每五口同一丁例其有破除者得相

折其一戶不滿六千縣戶不滿五百者各准五千五

百戶法為分若撫養垂戶戶口減損者各准增戶法

亦每減一分降一等課謂及不課並准上文其勸課

田農能使豐阻者亦准見地分為十分論每加二分

各進考一等此謂永業口分之外別能墾起公私荒

田者其有不加勸課以致減損者課為永業口分之

內有荒廢者每損一分降考一等若數處有功並應

進考者並聽累加

如此處分從之

高宗上元二年大理寺丞狄仁傑考中上考使尚書

左僕射劉仁軌以新任不錄大理卿張文瓘稱獨知

理司之要仁軌大驚問公斷幾何獄文瓘曰歲竟凡

斷一萬七千八百人仁軌乃擢為上下考

三年金州刺史滕王元嬰頗縱驕逸動作無度高宗



與書戒之極爲至切又勅之曰朕以王骨肉至親不能致王於理今書王下下考以媿王心

開耀元年十一月二十三日詔縣令有聲績可稱先宜進考員外郎侍御史京兆河南判司及自餘清望官先於縣令內簡擇中宗神龍中御史中丞盧懷慎上疏曰臣聞孔子曰爲邦百年可以勝殘去殺又曰苟有用我者周月而已三年有成故書云三載考績較其功也子產賢者也其爲政尚累年而化成况其嘗材乎切見比來州縣官佐下車布政在任多者一二年少者三五月遽卽遷除不論考課或歷時未改

便傾耳而聽企踵而覩爭求冒進不顧廉恥亦何暇宣風布化求瘼恤人哉戶口流散百姓凋弊職爲此也何則人知吏之不久則不從其吏吏知遷之不遙又不盡其能偷安苟且脂韋而已又古之爲吏者長子孫倉氏庾氏卽其後也臣請都督刺史上佐兩畿縣令等在任未經四考不許言遷除察其課効尤異或錫以車裘或就加祿秩或降使臨問并璽書慰勉若公卿有闕則擢以勸能政績無聞祇犯貪暴者放

歸田里以明賞罰致理救弊莫過於此

劉秩爲左監門錄事參軍

論曰昔周公使伯禽理魯三年而後報政周公曰何遲伯禽曰變其禮易其俗難所以遲太公理於齊五



月而後報政周公曰何疾曰因其俗簡其禮易所以疾故孔子論之曰齊一變至於魯魯一變至於道由是而言勞不甚者理不極功不績者澤不深故堯舜三年而考績三考而黜陟所以能盡其智術也近古人情敦龐未淳乎堯舜禮正樂和未愈於虞夏官賢吏能未稱於殷周或一年而考或四考黜陟或比年而巡符或歲時便遷或旬月升擢令長今日既上明日部內有犯名義者卽坐之不其謬歟

玄宗開元三年正月五日勅內外官考未滿所司預補替人名爲守闕特宜禁斷縱後有闕所由不得令上

六月詔每年十月委當道按察使較量理行殿最從第一等至五等奏聞較考使乃吏部長官總詳覆諸州亦比類定爲五等奏聞上等爲最下等爲殿中間

二等以次定優劣改轉日憑爲升降縣令每年選舉人內准前條訪擇補置在任有術一任申使狀有兩請兼戶口復業帶上考者選日優與內官其使狀有一請兼帶上考者滿日不限選數聽集優與處分刺史第一等量與京官若要在州未可除改者紫微黃門簡勘聞奏當加優賞京官不曾任州縣官者不得擬爲臺省官吏部銓選委任尤重比雖守職務在循嘗旣限之以選勞或失之於求事選日拔擢一二千人不須限以資次必須究其聲實不得妄相汲引自古鄉舉里選實課人之淑慝其明經進士擢第者每



年委州長官訪察行業修謹書判可觀者三選聽集并諸色選人者若有鄉閭無景行及書判全弱選數縱深亦不在送限崇化致理必在得人獎善勸能義資師古皆有煩濫未聞釐革循名責實其道不行爲人擇官人蠹猶在旣復政理不可因循須加簡勘以正頽弊

四年四月七日詔選人旣得比銓注過謝了皆不及考遂使每一年選人卽虛破一年闕在於公私俱不利便自今已後官人初上年宜聽通計年終已來滿二百日許其成考仍進遷考例至來年考時併較永爲葺式

十一月詔曰撫字之道在於縣令不許出使多不得上考每年選補皆不就此官若不優矜何以勸獎其縣令在任戶口增益界內豐稔清勤著稱賦役均平者先與上考不在當州考額之限也

五年正月行幸東都勅行幸所經州宜令紫薇黃門察訪刺史上佐政術定作三等奏聞仍令於具負內簡上中下刺史上佐有稱職者條錄奏聞將隨才錄用

六年二月詔曰與我共理惟良二千石久於其政然



可化成承前以來頗多僥倖但因入考卽有改轉自  
今已後非灼然應黜陟者更無遷易敦此風俗革其  
苟且又舊例別駕皆是諸親近年以來頗多餘色先  
授者未能頓輟已後自循舊制去冬有因計入朝不  
可更令却往過考事了竝量事敘用  
十一年二月詔朱紫貴品皆據考勞人臣事君忠無  
二節至如泛階溥及義取半分豈獨清官徧得減考  
自今已後泛加階應入五品以十六考爲定入三品  
以三十考爲定其有明賢宿德及異迹殊狀雖不逢  
泛階或因遷改之次年考與節限同者咸以名聞仍  
爲永例

十四年御史大夫崔隱甫充較外官考事舊例皆委  
叅問經春未定隱甫召天下朝集使一時集省中一  
日較考便畢時人伏其敏斷

十七年三月左丞相張說知京官考特注其子中書  
舍人埒曰父教子忠古之善訓祈奚舉午義不務私  
至如潤色王言章施帝道載叅墳典例絕嘗功恭聞  
前烈尤難以任豈以嫌疑敢撓綱紀考以上下  
十八年詔京官考滿帶祿選有本司要籍奏留請不  
用闕者選數不須與成勞



二十二年八月詔曰朕憂於理人委在牧宰雖已分命仍未盡誠如聞刺史新除所蒞不過數月卽營入計無心在州政教闕如朝寄安在自今已後刺史到任皆不得當年入考若聲績稍著獎拔未遲何處不安自彰汲汲其縣令差使先亦禁斷比聞在遠猶自故違宜委諸道採訪申明處分勿使如此

二十五年十二月命諸道採訪使考課官人善績三年一奏永爲常式其兩任聲實相副者爲昇進名聞二十七年二月制曰古者三載考績黜陟幽明允叶大猷以勸天下比來諸道所通善狀但優仕進之輩與爲選調之資責實循名或乖古義自今日已後諸道使更不須通善狀每至三年朕當自擇使臣觀察風俗有清白政理著聞者當別擇用

二十八年三月一日詔曰先是內外六品已下應補授官四考滿待替爲滿是日制令以歲爲滿不待替縣令知倉庫供奉伎術及充綱領等不在此限至其年十二月十六日詔內外六品已下官依舊待替其無替者五考滿後停

天寶二年八月五日考功奏准考課令考前釐事不滿二百日不合成考者釐事謂都論在任日至考時



有二百日卽成考請假停務竝不合破日比來多不會令文以爲不入曹局卽不爲釐事因此破考臣等叅量但請俸祿卽同釐事請假不滿百日停務不至解免事雪却上其考竝不合破若有停務逾年不可更請祿料兼與成考勅旨從之

三年正月制曰凡諸郡縣仍令太守縣令勸課農桑先處分太守縣令在任有增減戶口成分者所由司量爲殿最自今已後太守縣令廉能勾當租庸每年加數成分者特賜一中上考如二載之內皆有成分所司錄奏超資與處分

八年正月二十三日勅所較內外官考准令京官正月三十日進單數二月三十日進挾名外官二月三十日進單數三月三十日進挾名自今已後竝了日一時挾名奏不須更進單數

六月七日吏部侍郎李彭年奏准例出身已來竝令簡覆中間已敘五品勘責皆有所憑今重簡尋恐爲煩擾如曾經勘責敘成者請從五品已後勘簡其五品已前但勘考數足卽爲進敘勅旨依

十二年十月詔曰循名責實所以激羣吏也懲惡勸善所以務至公也苟黜陟之非當何考課之足徵其



內外文武官員外同正員并判試不釐務者既無別效兼有多年比年因循或與進考據額既標節限緣此遂多踰越致令課最者見棄無功者獲昇獎勵之門殊非允當自今已後竝不在進考之例其內外官初効亦不在與限臺省官考各委長官比類才能功課褒昇不得一例申送俾僥競息心功能勵節十三載二月詔曰三載黜陟百王令典殿最之迹廉問攸歸欲更別遣使臣慮有煩擾今載宜委本道採訪使具官人善惡奏聞以申勸沮

麟李輔國考辭  
蕭宗乾元二年二月御製郭子儀李光弼苗晉卿李

代宗寶應元年十月吏部奏准今年五月詔州縣官自今已後宜令三考一替者今數州申解疑三考後爲復待替到爲復便勒停請處分者今望令已按三考官待替到如替人不到請較四考後停

三年正月考功奏請立京外察按京察連御史臺分察使外察連諸道觀察使各訪察官吏善惡其功過稍大事當奏聞者使司按成便奏每年九月三十日以前具狀報考功其功過雖小理堪懲勸者按成卽報考功至考較日叅驗事迹以爲殿最



閏月考功奏內外員外官等除合在定數外准勅竝任其所適既不入曹無憑簡考比來或有申者卽與見在同奏簡勘之時成破不一文案混雜條流未明臣等商量望請自今已後內外文武員外同正及試官除合在任外一切不在申較之限并聽從授日計考准中中例敘用從之

永泰元年正月詔曰刺史縣令與朕分憂凋瘵之人切須撫字一夫不獲情甚納隍有能招緝逃亡平均賦稅增多戶口廣闢田疇清節有聞課效尤著者宜委所在節度觀察具名聞奏卽令按覆超資擢授其有理無能政迹涉賊私必當重加貶奪永爲殿累中外寮吏各揚其職無或曠官克副朕意

大曆元年十一月詔曰國以人爲本人以農爲業頃由師旅征稅殷繁編戶流離田疇荒廢永言牧宰政切親人其刺史縣令宜以招緝戶口墾田多少用爲殿最每年終委本道觀察節度等使按覆奏聞如課績尤異當加超擢或政理無聞必寘科貶

八年十月勅中書舍人韋袞諫議大夫杜亞起居郎劉灣左補闕李翰考吏部選人判

十三年正月詔曰捉獲造僞及光火強盜等賊合上



考者本州府當申刑部

册府元龜

大正亞城母

册府元龜

巡按福建監察御史臣李嗣京訂正  
分守建南道左布政使臣胡維霖  
知建陽縣事臣黃國琦較釋

銓選部

考課第一

唐德宗建中二年六月門下侍郎平章事盧杞奏准  
六典中書舍人給事中充監中外官考使重其事也  
今者有知考使無監考使伏望依前置監中外官考  
使依奏



貞元元年九月以刑部尚書關播吏部侍郎班宏爲  
較內外官考使

十二月詔六品以下本州申中上考者納錢一千文  
市筆墨朱膠等者元置五分生利吏部奏見用有餘  
自今以後其外官考錢並請勒停依奏

二年九月考功奏較京官外官考使准舊例差定聞  
奏勅其較考使宜停其考課付所司准式較定  
三年五月詔以停減天下官員其停官計日成考兩  
考准舊成資准嘗式兩考以下至來年五月三十日  
處分

四年正月一日制戶口增加田疇廣闊者長吏加一  
階縣令減選優與處分其額內官勿更注擬見任者  
三考勒停

五年正月司勳員外郎判考功趙宗儒復行貶考之  
令自至德已來考績失實朝官刺史悉以中上考褒  
之善惡不別及是右司郎中獨孤良器殿中侍御史  
杜倫各以過犯免官尚書右丞裴郁御史中丞盧仝  
考之中上宗儒抗令又貶良器及倫考居中中又祕  
書少監鄭雲逵考其同官孫昌裔入上下宗儒覆按  
其考降入中上以雲逵褒進失中考之中以儆之又



刺史覈其課效考之中上者不過五十人餘貶入中  
中褒貶稍明人知誠懼帝善之遷考功郎中

六年六月三日考功奏准天寶七年六月勅內外官  
初考無赴上日末考不具得替便注破不在較限

是月又奏諸使下兼憲官及簡較郎官并諸色官充  
職掌者竝仰本使每年具在使功課兼具考第申省

十一月制守宰之任弊在數更自今刺史縣令以四  
考為限

七年八月考功奏准考課令諸司官皆據每年功過  
行能定其考第及准開元天寶以前勅朝官每司有

中上考亦有中中考自三十年來諸司竝一例申中  
上考且課績之義不令雷同事久因循恐廢朝典自

今以後諸司朝官皆須據每年功過行能仍比類格  
文定其昇降以書考第不得一例申中上考應諸司

長官書考不當三品已上具御牒上中書門下四品  
以下依格令各准所失輕重考

是月考功奏准諸司官皆據功過定其考等自至德  
後一切悉申中上考今請覆其能否以定昇降從之

自諫議大夫給事中郎官有書中中考者尚書左丞  
趙退翁言前薦果州刺史韋誕坐賊廢請降其考較



考使吏部尚書劉滋以退翁能言其過奏中上考  
十二月較外官考使奏准考課令三品以上及同中  
書門下平章事竝奏取裁注云親王及大都督亦同  
伏詳此文則職位崇重考績褒貶有司皆合上奏今  
緣諸州刺史大都督府長史及上中下都督都護等  
有帶節度觀察使者方鎮既崇名禮當異每歲考績  
亦請奏裁其非節度觀察州府長官有帶臺省官者  
請不在此限

八年七月右僕射崔寧書兵部侍郎劉迺上下考刑  
部侍郎兼京官較考使班宏正議曰今夷荒靖難專  
在節度尺籍伍符不較省司夫上多虛美之名不開  
趨競之路上行阿容下必朋黨因削去之迺謝之曰  
迺雖不敏敢掠一美以徼二罪乎

十月以刑部尚書劉滋爲較外官考使吏部侍郎杜  
黃裳爲較京官考使給事中李選宜監京官考中書  
舍人鄭珣瑜宜監外官考

九年七月制縣令以四考爲限無替者宜至五考  
十年二月刑部奏准建中元年正月十七日勅諸州  
府五品以上正員及額內上佐宜四考停其左降官  
不在此限者五品左降官既不許停祿料六品以下



未復資已經四考者未量移間其祿料伏望亦許准給勅下祿料宜准天寶六載七月十四日勅處分餘依嘗式

憲宗元和十四年十一月考功奏自今以後應注考狀但直言某色行能某色異政某色樹置某色勞效推斷某色獄糾舉某色事便書善惡不得更有虛美開言其中以下考亦各言事狀並不得失於褒貶如違據所失輕重准令降書考官考又奏自今以後其有政能卓異清苦絕倫者不在止於上下考限依奏又奏據寶應二年勅御史臺分察使及諸道觀察使訪察官吏善惡功過稍大事當奏聞者每年九月三十日具狀報考功功過雖小理當懲勸者按成卽報考功至較日叅驗事迹以爲殿最伏以近日功過都不牒報今後諸司不申報者州府本判官便與下考在京諸司追節級科處本判官較課日量事大小黜陟勅旨從之

穆宗元和十五年正月卽位十二月尚書考功員外郎權判郎中事李渤較定京官考請行昇黜上言曰宰臣蕭俛段文昌崔植等當陛下君臨之初首任宰相安危理亂決在此時况陛下思天下和平敬大臣



禮功故未有昵比左右侈蒲自賢之心而宰相之權  
宰相之事陛下以付之實宣化理千載一遇之時  
也此時若失恐更無時而俛等上不能推至公明誠  
陳先王道德以諧君心又不能正色匪躬振舉舊法  
復百司之本則教化不立矣臣聞政之廢興在於賞  
罰俛等作相已來未聞獎一人德義舉守官奉公者  
使天下在官之徒有所勸又不能黜一人職事不理  
持祿養交者使尸祿之徒有所懼如此則刑法不立  
矣邪正莫辨混然無章教化不行賞罰不設天下之  
事復何望哉一昨陛下畋遊幸驪山宰相與翰林學

士是陛下股肱心腹宜皆知之俛等不能先事未形  
忘軀懇諫而使陛下有忽諫之名流於史冊是陷君  
於過也孔子曰所謂大臣者以道事君不可則止若  
俛等言不行計不從須奉身疾退不宜尸素於化源  
進退矣也何所避辭其蕭俛段文昌崔植三人并翰  
林學士杜元穎等竝請賜考中下御史大夫李絳左  
散騎嘗侍張惟素右散騎嘗侍李益等諫幸驪山鄭  
覃等諫畋遊是皆恐陛下行幸道途漸遠自此恣情  
無度又思馬有銜縶不測之變風寒生疾之憂急奏  
無所詣國璽委婦人中幸之手絳等能率御史繼以



兩省官大諫於朝有懇激事君之禮可以誠無言者其李絳張惟素李益三人請賜上下考外特與遷官以彰陛下優忠賞諫之美其崔元畧冠供奉官之首合考上下緣與于翬上下考于翬以犯賊處死准令須絳請賜考中中大理卿許季同任使于翬韋道萍韋正牧皆以犯賊或左降或處死合考中下然頃陷劉闢之亂棄家歸朝忠節明著今宜以功補過請賜考中中少府監裴通職事脩舉合考中上以其請追封所生母而舍嫡母是明罔於君幽欺其先請賜考中下伏以昔者宰夫入寢擅飲師曠李調今愚臣守官請書宰相翰林學士下考上優聖運下振顏綱故臣懼不言之爲罪不懼言之爲罪也今其三品官考伏緣限在今月內進輒先具如前其四品已下官績具條流聞奏狀入留中不下未幾渤以墜馬傷足請告中書門下帖刑部郎中馮宿權判考功宿以宰臣及三品已下官故事內較遂別封以進翰林學士職君內署事莫得知請依尚書上考諫官御史亦請仍舊竝書中上考乃與李渤所奏異矣國朝考課令凡較考以一年善惡爲上下郎中較京官四品以下得隨事昇黜三品以上通名清望官每歲進名內定不



在有司渤雖欲振舉官業然事無故實又通舉佗年  
事以定褒貶不達者以爲朝廷盛事帝雖甚怒而宰  
相等引過救解然後得免焉尋出爲處州刺史  
長慶元年正月制自今郡守恪奉詔條清廉可紀四  
考與轉

李渤爲考功員外郎穆宗初書宰相等下考長慶元  
年五月貶渤爲處州刺史渤旣請書宰臣等下考時  
人以宰輔曠官不上疏陳列而越職釣奇非盡事君  
之道至是杜元穎等奏渤賣直沽名動多狂躁遂出  
之

文宗太和元年正月勅諸道節度觀察使去任日宜  
具交割狀仍限新人到任一月日分析聞奏并報中  
書門下據新舊狀磨勘闕奏以憑殿最

二年十月吏部侍郎楊嗣復李宗閔書員外楊虞卿  
考上下至是左僕射平章事王播判云據楊員外課  
績事有司准勅見今推窮竝未申奏其間得失須候  
聖裁遽此直書豈爲至敬所書考待進止

六年七月勅今後諸州五品長爲推知者推知正授  
通計六考蒲停其勒留官未滿六考停給課料者准  
此卻給



七年七月中書門下奏應諸州刺史除授序遷須憑  
顯效若非責實無以勸人近者受代歸朝皆望超擢  
在郡理績無繇盡知或自陳制置事條固難取信或  
別求本道薦狀多是徇情將明典章在覈名實伏請  
自今以後刺史得替待去郡一箇月後委知州上佐  
及錄事參軍各下諸縣取耆老百姓等狀如有興利  
除害惠及生人廉潔奉公肅清風教者各具事實申  
本道觀察使簡勘得實具以事條錄奏不得更爲文  
飾其文狀仍與觀察判官連署如事無可稱者不在  
薦限仍望委度支鹽鐵分巡院周訪察各申報本使  
錄事如除授後訪知所舉不實觀察判官分巡院及  
知州上佐等竝停見任一二年不得敘用如緣在郡  
贓私事發別議處分其觀察使奉取進止所與吏皆  
稟法人獲又安遷擢之時更無濫授制從之  
八月詔考課之法前王所重蓋以綜覈吏理勵精政  
途名實苟違將何沮勸宜准故事置內外知考使兼  
令中書舍人給事中各一人監考  
九月以吏部尚書令狐楚爲較內官考使中書舍人  
崔鄴爲監內官考使以兵部尚書王起爲較外官考  
使以給事中高銖爲監外官考使行舊典也



開成四年六月河陽節度使李執方奏管內縣令有  
纒經一考已替者失考績黜陟之義請無犯者留至  
三考從之

宣宗會昌六年五月制刺史交代之時非因災沴大  
郡走失七百戶已上小郡走失百戶已上者三年不  
得錄使兼不得更與理人官增加一千戶已上者與  
超資遷改仍令觀察使審勘詣實聞奏如涉虛妄本  
判官重加懲責

大中元年正月制曰守宰親人職當撫字三載考績  
著在格言貞元之中頗有明詔縣令五考方得改移  
近者因循都不遵守諸州或得三考畿府罕及二年  
以此字人若爲成政道途郡吏有迎送之勞鄉里庶  
民無蘇息之望自今須滿三十六箇月永爲嘗式  
六年七月考功奏近年諸州府及百司官長所書考  
第寮屬竝不得知昇黜之間莫辨當否自今以後書  
考後但請勒各牒於本司本州懸於本司本州之門  
三日其外縣官則當日下縣如有昇黜不當便任敷  
陳其考第須便改正然得申省如勘覆之後事無乖  
謬則論告之人亦必懲殿又准考課令凡官人申考  
狀不得過兩紙刺史縣令至於賦稅畢集判斷不滯



戶口無逃散田畝守嘗額差科均平廨宇修飾館驛如法道路開通如此之類皆是尋嘗職分不合計課自今已後但云所勾當嘗行公事竝無敗闕卽得准職分無失及開田招戶辨獄雪寃及新制置之事則任錄其事繇申上亦須簡要不得繁多又近年以來刺史皆自錄課績申省矜銜者則張皇其事謙退者則緘默不言自今以後其巡內刺史請竝委本道觀察使定其考第然後錄申本州不得自錄課績申省又州府申官人覆得寃獄書殊考者其元推官人多不懲殿或云書下考至時又不提舉請自今以後書

辨獄官人殊考日便須書元推官下考如元推官自以爲屈任經廉使及臺省陳論其官人先有殿犯官長斷云至書考日與下考者如至時不舉其本州判官當書下考其所申到下考省司較其所犯如與令式相符便較定申奏至勅下後竝須各牒州府又近日諸州府所申令錄課績至兩考三考以後并須重具從前功課申省以與褒昇省司或簡勘不精便有僥倖自今以後不得輒更具從前功績申上又近日諸州府所申考解皆不指言善最或漫稱考秩或廣說門資既恥令文實爲繁弊自今以後如有此色竝



請准令降其考第又准考課令在中上以上每進一等加祿一季中中者守本祿中下以上每退一等奪祿一季准令以此懲勸事在必行近年以來與奪幾廢或有申請之處則言無本色可支徒掛簿書竟無給與今案倉庫令支給糧祿皆以當處正倉兌無倉之處則申省隨近有處支給又無者聽以稅物及和糴屯收等物充令式昭然不合隳廢自今以後每省司較考畢符牒到州後仰當時便具升降與奪事繇申請如違令式不舉明者其所繇官請奪俸祿一季其已去任官進奪祿事竝請准令式處分又准考課

令官人因加戶內及勸田農并緣餘功進考者於後事若不實縱經恩宥其考皆從追改追改之事近皆不行自今以後竝請准令式處分其因此得官者仍請追奪又諸道所申考解從前十月二十五日到都省都省開拆郎官押尾後至十一月末方到本司開拆多時情故可見自今以後伏請淮南曹及禮部舉選解例直送當司開拆又從前以來應得考之人竝給考牒以為憑據近年考使容易給牒不一或一人考牒數處請給或數年之後方始請來自今以後較考勅下其得殊考及上考人省司便據人數一時與



修寫考牒請准吏部告身及禮部春官牒每人各出錢收贖其得殊考者出一千文上考者出五百文其錢便充寫考牒紙筆雜用以前件事條等或出於令文或附以近勅酌情揣事不至乖張謹竝條例進上伏乞宣付中書門下請更叅詳苟俾至公乞賜收采仍請三年一度准舉選格例修定頒下勅考功所條流較考功事頗謂詳悉唯一件難便允從近日俗尚矜能人少廉恥若榜門許其論告則自此必長紛爭當否之間固有公議其一件宜落下餘依奏

懿宗咸通四年正月大赦節文邦伯之任郡守之官比遣頒條當求共理近或不終年限非時多議替移其政未成在理難責自此委中書待其三考方可再遷免吏民迎送之勞表能否升降之道除煩就省無尚於斯

十四年考功員外郎王徽以舊例考簿上中下字朱書吏緣爲姦多有楷改請以黑書從之

昭宗天祐元年四月制刺史縣令有勸課農桑招復戶口一倍已上於前者委本道觀察使條件奏聞當加進陟如貪墮不理害及於人者速使停替

後唐明宗天成元年十月吏部侍郎盧文紀上言請



內外文武臣寮每歲有司明定考較將相乞廻御筆  
 以行黜陟流下中書門下商量宰臣奏請施行從之  
 是月尚書考功條奏格例如後一准考課令諸內外  
 文武官九品以上每年當司長官考其屬官應考者  
 皆具錄一年功過行能議其優劣定九等考第京官  
 九月三十日已前較定外官去京一千五百里內八  
 月三十日已前較定三千里內七月三十日已前較  
 定五千里內五月三十日已前較定七千里內三月  
 三十日已前較定萬里內正月三十日已前較定本  
 州定訖京官十月一日送簿外官朝集使送限十月  
 二十五日已前到京考後功過竝入來年無長官次  
 官考縣令已下及關鎮戍官岳瀆令竝州考津非隸  
 監者亦州考一准考課令諸每年考簿集日考司較  
 勘色別為簿具言功過京官三品已上及同中書門  
 下三品并平章事奏裁親王及五大都督府亦同四品已下及餘  
 外官竝使人量定聞奏上考下考奏單數仍畧狀進  
 中考竝單名錄奏一准考課令諸每年尚書省諸司  
 得州牧刺史縣令政有殊功異行及祥瑞災蝗戶口  
 賦役增減當界豐儉盜賊多少竝錄送考司一准考  
 課令諸官人景迹功過應附考者皆須實錄其前任



有犯私罪斷在今任者同見任法卽改任應計前任日爲考者功過竝附其狀不得過兩紙州縣長官須言戶口田地者不得過三紙注考正之最一最已上有四善爲上上一最已上有三善或無最而有四善爲上中一最已上有二善或無最而有三善爲上下一最已上有一善或無最而有二善爲中上一最已上或無最而有一善爲中中職事粗理善最不聞爲中下愛憎任情處斷乖理爲下上背公向私職務廢闕爲下中居官諂詐及貪濁有狀之類爲下下若於善最之外別有可嘉及罪雖成殿而情狀可矜或雖

不成殿而情狀可責者省較之日皆聽考官臨時量定一准考課令諸官人因加戶口及勸課農桑并緣餘功進考者於後事若不實縱經恩降皆從追改一准式較京官考限來年正月內外官考限二月內者所司至三月內申奏了畢伏以書較內外官考課逐年申送考簿各有程期近年已來諸道州府及在京諸司所送考解多是稽違自今後所申送考簿如違格限二十日不到其本判官并錄事叅軍伏請各罰一百直本典勾官請委本道科責如違一月日已上不申到者本判官伏請罰二百直錄事叅軍量殿一



選本典勾官請委本道重加懲斷在京諸司如違格  
限不關牒到者其本行人吏牒報御史臺請行追勘  
決責一准格應所使闕縣令計日成四考餘官計日  
成三考闕今後州縣官等竝許終三十箇月成三考  
自上官後至年終但滿一百八十日便與成頭考次  
二年卽須兩考滿足如頭考第二考全足卽許計日  
成尾考方與三十箇月事理合同如過月限無替人  
到准上條處分者伏以每年書較官員考課格限則  
顯有舊條授上則難爲定制但以每月之內皆有除  
移今准格且以六月內上爲准一應申較內外六品

已下赴選官員考課准格自上任後但滿一百八十  
日便與成頭考年終非書考時須至來年准格書較  
時併申兩考如六月已前直至正月到任者自上任  
日至較考時頭考日足卽考後功過竝入來年如至  
書較時頭考欠日未成資考亦至來年准格書較時  
併申兩考如六月已後至年終上者竝至准格日收  
計一考有剩日不在重使之限一應經考後合收次  
年以一周歲爲限如未滿一年停替者但及二百四  
十日與成如欠一日不在收計限一應收尾考但經  
考後至去任時得及二百日與成如欠日不在收計



限如過月限無替人到竝准上條處分一應申較內  
外赴選官員考課頭考須具到任年月日自上以來  
功過第二考須具經考已後課績不得重疊計功其  
末考須具得替年月日比類申降一應申較內外六  
品以下官員考第以去京地里遠近逐年書較申送  
考解各有程期今後應內外赴選官員考第既准格  
依限逐年比較卽不合更將州府及本司考牒爲據  
其有已前罷任官員不計年限考第未經省較者如  
有州府及本司考詞考牒全備者欲據在任年月日  
簡勘省司給與牒知如在任之時州府及本司向來  
元不曾較給牒只於牒繇曆子內批出考數者欲與  
簡勘解繇曆子內不豎過犯稱在任日并無公事遺  
闕證驗分明亦據在官年月日給與牒知如簡勘無  
憑者不在給牒之限其今年各准格赴集選人便合  
請給省較考牒直至南曹受納告亦給已竝許經所  
司投狀簡勘出給其考牒又准格須奏下當年內出  
給如隔年者不在行使之限如或實有事故年內請  
給故難請自今後當年奏下勅考許至來年內請給  
如更違格限請一年與殿一選如至三年外不請給  
者所司不在出給之限其已前較奏下內外赴選官



員考課其間有未曾請給考牒者竝合投狀請給以備選曹磨勘如將來選人今任考第依前故違格條不經省司勘較給牒及已曾奏較下勅考不曾給考牒者南曹不在簡勘判成之限一應申較內外官員考課文解須依格限到省如申發後其間或有非時事故停任省司無以得知請委本判官并錄事叅軍專切提舉其事繇申省以憑點簡錄奏一准故事較考舊條內外官員竝較之時諸道差朝集使應考內卽差中書舍人給事中監考伏自較勘不行往例全廢自今後省較之時伏請中書門下選差清望官兩員監較內外官員考課便同點簡申奏其合經過中書門下兩省准例各供宣黃請守舊規以爲永制一應繇較內外官寮考課如有過犯便降書下考如在任之日於嘗課之外別有異績可稱比之上下考如諸道州府及在京諸司固違格條不具錄在任事績功過依限比較申牒到省其本判官并錄事叅軍及在京諸司本行竝請准前殿罰一應諸司諸色流外職掌人等准令本司量其行能功過立四等考第而勉進之今狀請准新定格內條件逐年依限投狀各具在職功過書較考第簡勘錄奏應諸司令史及勒



留官丁憂不計有官無官竝一百日後舉追如願終喪不在追限除丁憂年一考不附奏次年便許選數赴集其丁憂人仍牒考功及南曹終喪者計三年憂諸色選人使上考減選其下考竝合殿選竝注令錄銓曹勘驗只憑考功報簡多有差錯今請每年考功申較上考及下考勅下後請具單名牒門下省及申三銓關報南曹以憑勘會竝須九月已前報畢勅旨從之

三年四月祠部郎中王承弁請明書兩班考課顯示懲勸時兩班考績虛有其名皆以恪勤匪懈清慎明著爲詞久無其實承弁雖奏終不改定  
長興四年五月中書奏准天成元年五月二十七日勅諸使府兩稅徵科詳斷刑獄較官吏考課合是觀察判官專判其一州諸縣徵官糾轄提舉合是錄事參軍本職今後觀察判官錄事參軍較量所屬州縣官吏據每年徵科程限刑獄斷遣戶口增減據州縣申報子細磨勘詣實然後於本官牒內據事件收豎如官吏考課一一事實其判官錄事參軍候考滿日竝與酬獎別加職任如考課不實亦行殿罰如有水旱災傷處許奏聽勅旨從之



末帝清泰二年四月宰臣張延朗奏州縣官徵科賞罰例縣令錄事叅軍正官一年依限徵科了絕加階二年依限與試銜三年摠及限與服色如攝令一年內了絕仍攝二年三年內摠及限與真命主簿一年二年如縣令條三年摠了別任使本判官一年加階二年改試銜三年轉官本曹官省限內了絕與試銜轉官諸節級三年內摠了絕與賞錢三十千其賞罰依天成四年五月五日勅從之

九月尚書考功上言今年五月中翰林學士程遜所上封事內請自宰相百執事外鎮節度使刺史應係公事官逐年書考較其優劣以前件考課究尋臺閣深遠歲年若議興行宜憑往制具繇中書門下宰臣判設官分職各有所司本司自合將條格故實詳叅更簡尋遠勅條奏定爲悠久緣本司公事遂簡尋唐書六典會要考課令書考第從之

三年五月右街使兼判尚書考功郝瓊上言去年五月詔中外官員自宰臣節度使已下並逐年書考課計官員千餘當司人吏四人二人赴官又公用不足乞依三銓例當司歸司官逐月交賜紙筆糧錢詔考功人吏兩人依三銓例給及春冬衣兩分諸司不得



為例

晉高祖天福二年正月勅外官內官陳力實關於共  
理或出或處藉才難執於嘗規近觀朝臣偶除外任  
三年替罷之後再來擬官之時不計新職之勤勞唯  
循舊官之資歷比藉幹濟翻成滯淹宜別立於規繩  
貴各期於激勵宜今後應朝臣中有藉材特除外任  
者秩滿無遺闕將來擬官之時在外一任同在朝一  
任昇進其就便自求外職及不是特達選任者不在  
此限

六年五月詔曰王者行考績之文重為政之本若存  
功課自有旌酬或伏鉞守方著安民之術或剖符刺  
部彰恤物之仁凡著政聲悉聞朝聽邇者數州百姓  
舉留本部長官遂涉道途徑趨京闕皆陳善治竝述  
公清或指使而方來或感激而自至勞煩行役妨廢  
耕耘言念苦辛倍深軫憫今後岳牧善政委倅二官  
條件奏陳必當旌別勤勞審詳課最如不愆於名實  
固無恡於渥恩

少帝開運元年八月詔曰向者朝廷無事經費尚多  
今則師旅方興支贍尤廣必資國力以濟軍須近以  
四海災傷頻年饑饉賦租減少筦權虧懸帑藏不充



公私重困今歲三時不害百穀用成所在流民漸聞  
歸業商旅之人稍衆山澤之利咸通郡邑徵科自然  
容易務場課額必有增盈較量之間斷可知矣牧宰  
之任選擢非輕至於阜俗康民豐財益國乃爲本職  
固合用心苟能一一躬親孜孜臨蒞必絕滯凝之事  
兼除僥倖之門副我憂勤顯爾政績將求課最須設  
科條况藩侯郡守等皆是良臣各膺重委盡傾誠設  
以奉國朝式當倚注之時宜示勸懲之道應天下諸  
州各以係省錢穀秋夏徵科爲帳籍一季一奏一年  
賦稅及限更委在任一年次年又不稽逋聽三周筆  
爲滿三年皆得辦事卽與別議陟遷如或纔到任所  
課績不前亦當卽時罷替其間災沴之地須明具數  
陳審其虛真別有處分於戲朕纘承大業于茲三年  
虔奉基局不敢失墜兢兢業業若履春冰小信未孚  
咎徵斯降旱蝗相繼連歲爲災兵革未寧四方多事  
下慙黔首仰愧蒼穹所賴將相公卿元戎郡守或先  
朝宿舊或當代英賢送往事居始終如一分憂共治  
誠節彌堅倚賴旣深傾輸亦至必能爲國盡忠臨事  
公勤不更假於指縱固自知其陳力凡百有位宜體  
朕懷



漢隱帝乾祐二年太子中允侯仁寶上言諸州府長吏勸課農桑隨戶人力勝栽蒔桑棗小戶歲十本至二十本中戶三十至四十大戶五十至一百如能廣栽不限本數種訖本縣令佐親省之計數得替時交與受代者仍於曆子內批書省司以爲考課

三年七月勅親人之任務在安民經國之規必資徵賦至於招添戶口增長稅租減選加階優有處分勸能行賞顯降勅文邇來論課績者甚多較虛實則未當外州批上曆子南曹磨勘解繇空收招到編民莫見新添稅額盖有拆居耕種各立戶名或是避稅逃移併未歸業所以虛添農戶無益官租考課涉名未盡其善宜令吏部南曹自今後及已前應有令佐招添點簡出戶口據數須本處戶合徵稅賦物數目於解繇曆子內一一開坐批書方得准天福八年三月十日勅條施行如不合前後勅例不在施行之限周太祖廣順二年十二月二十八日勅節文其有省較考牒如是奏下後滿三年不請給者宜令考功准先降勅文不在出給之限

三年三月十四日勅起今後諸州府更有供申考簿違格限申到者本判官并錄事叅軍各罰五十直其



錄事叅軍仍殿一選本勾押官典委本州并行科斷如違程限一月已上不申到者仍令尚書考功催促候供申到考帳依例施行所有科罰准前處分若是較考過時卽與次年依格奏較

是月尚書考功上言當司所納諸道考課文帳准格每年十月二十五日已前考帳到京如違格限本處官吏各行殿罰其鳳翔府自廣順元年十月九度移文爲考帳全不詳認格條遂申中書門下請勸令鳳翔府稱違格限二十餘日已決罰官典申到考帳當司准格違限不叙勅鳳翔考帳違限本府各以科徵

其考帳省司特與考較起今後諸州府更有違限者本判官錄事叅軍各罰五十直錄事叅軍殿中選典押本處科斷仍令省司依時催促若較考過時卽與次年較奏餘依前後格勅指揮又勅州縣官或特勅除授或非時有故停任員闕除官到任者緣赴任不拘期限申發考帳之時但滿一周年便與依例書較一考申省如書較時少欠月日卽與次年附帳申較不得漏落考第姓名如或有違罪本道書考官吏顯德五年閏七月尚書考功奏奉新勅起今年正月一日後授官竝以三周年爲月限閏月不在其內者



當司所書較內外六品下赴選官員考第今後以一  
周年較成一考如欠日不在計限滿三周年較成三  
考如考滿後未有替人在任更一周年與成第四考  
如欠日不在計限兼逐年須具到任年月日自上已  
來課績功過第二考須具經考後課績不得重疊計  
功其未考須具得替年月日比類升降自今年正月  
一日已前授官到任者欲准格例三十箇月書較三  
考今年正月一日後來授官到任者准新勅三周年  
爲月限每一周年書較一考閏月不在其內所有諸  
道州府較考申發考帳及當司較奏各依前後格勅

施行應諸司諸色流內出身人等准格並須待附申  
考近年不經奏考便至參選頗啓倖門應在司見役  
人等自今後逐年起六月初一日後正身於所司投  
狀請申較勞考省司據狀却牒本司勘會補奏年月  
日勅甲頭姓名見掌案分公事牒報省司將元狀簡  
勘同卽與准例申較仍自此後須逐年九月已前較  
奏了畢不在更與隔年併書之限其考牒本無綾紙  
書寫勅例今後每年奏下逐人給省牒一紙使大張  
紙書不在使綾紙及併年都給限據省較勅之日有  
公事在外差出不虛卽本司雜事須具在職功過及



出外事繇牒報考功不得有妨逐年書較如不與申  
牒其雜事令史量情科決仍殿一選如無故自不經  
省投狀請奏較不在論訴之限者當司緣新勅促期  
限慮恐較考遲違今後應合較考人請起自五月一  
日正身投狀限十日畢至七月三十日已前較奏  
畢餘依元格施行從之

人等

朱張平

蘇行勳

冊府元龜

巡按福建監察御史臣李嗣京訂正

知長樂縣事臣夏允彝參閱

知建陽縣事臣黃國琦較釋

銓選部

公望 平直 振舉

公望

銓衡劇地總覈九流所以辯進官材切贊邦治降自  
漢人委授彌重莫不妙選明識登用能臣故有負高  
亮之姿振清正之望鑒擇髦儁動叶於至公抑退浮



華靡私於貴勢俾時材各適其用天下共稱其平詩云靖恭爾位好是正直其是之謂與魏賈詡為尚書典選舉多選舊名以為令僕論者以此多詡

崔琰字季珪清忠高亮雅識經遠端方直道正色於朝魏氏初載委授銓衡總齊清人十有餘年文武羣才多所明拔朝廷歸高天下稱平

毛玠字孝先太祖為丞相玠為東曹掾與崔琰並典選舉用皆清正之士雖於時有盛名而行不繇本者終莫得進務以儉率人繇是天下之士莫不以廉節

自勵雖貴寵之臣輿服不敢過度太祖歎曰用人如此使天下人自治吾復何為哉文帝為五官將親自詣玠屬所親眷玠答曰老臣以能守職幸得免矣今所說人非遷次是以不敢奉命大軍還鄴議所并省

玠請謁不行時人憚之咸欲省東曹乃共白曰舊西曹為上東曹為次宜省東曹太祖知其情令曰日出於東月盛於東凡人言方亦復先東何以省東曹玠

遷右軍師魏國初建拜尚書僕射復典選舉先賢行狀曰玠雅亮公正在官清恪其典選舉拔貞實斥華偽進遜行抑阿黨諸宰官治民功績不著而私財豐足者皆免黜停廢久不選用于時四海翕然莫不勵行至乃長吏還者垢面羸衣裳乘柴車軍吏入府朝服徒行



人擬壺飡之潔家象濯纓之操貴者無穢欲之累賤者絕姦貨之求吏潔於上俗移於下民到于今稱之  
袁侃歷選部郎中號為清平

晉李重與李毅同為吏部郎時王戎為尚書重以清尚見稱毅淹通有智識雖二人操異然俱處要職戎以識會代之各得其所

李喬為吏部清慎選舉號為廉平

阮放字思度為黃門侍郎選吏部郎在銓管任甚有稱績

盧欽為尚書僕射領吏部舉必以材稱為廉平  
周馥遷吏部郎選舉精密論望益美

蔡克字子尼為東曹掾素有格量及居選官苟進之徒望風畏憚

宋王惠為吳興太守少帝即位以蔡廓為吏部尚書不肯拜乃以惠代焉惠被召即拜未嘗接客人有與書求官者得轉聚置閣上及去職其封如初曠談者以廓之不拜惠之即拜雖事異而意同也

謝莊代顏竣為吏部尚書竣留心選舉自強不息任遇既隆奏無不可而容貌嚴毅莊風姿甚美賓客喧訴嘗懽笑答之竟多不行時人為之語曰顏竣嗔而與人官謝莊笑而不與人官



梁徐勉為吏部尚書勉居選官彝倫有序嘗與門人

夜集客有虞曷求詹事五官勉正色答云今夕止可

談風月不宜及公事故時人嘗服其無私又云勉為尚書僕射

爰自小選迄于此職嘗參掌衡石甚得上心

到漑掌吏部尚書時何敬容以吏參選事有不允漑

輒相執敬容謂人曰到漑尚有餘臭遂學作貴人敬

容日方貴寵人皆下之漑許之如初漑祖彥之初擔

糞自給故世以為譏云

王泰為都官尚書能接人士士多懷慕每願其薦選

官頃之為吏部尚書衣冠傾屬

王亮為吏部郎銓序著稱

後魏崔亮為給事黃門侍郎仍兼吏部郎領青州大

中正亮自參選事垂將十年廉慎明決為尚書郭祚

所委每云非崔郎中選事不辨辨

北齊楊愔為給事黃門侍郎兼吏部郎中武定末以

望實之美起拜吏部尚書加侍中衛將軍侍學典選

如故

辛術為吏部尚書遷鄴以後大選之職知名者數四

互有得失未能盡美文襄帝少年高朗所弊也疎袁

叔德沉密謹厚所傷者細楊愔風流辯給取士失於



浮華唯術性尚貞明取士以才器循名責實新舊參  
舉管庫必擢門伐不遺考之前後銓衡在術最爲折  
衷其爲當時所稱舉如此

後周鄭孝穆魏大統中爲散騎嘗侍時文帝東討除  
大丞相府右長史封金鄉縣男軍次潼關命孝穆與  
左長史孫儉司馬楊寬尚書蘇亮諮議劉孟良等分  
掌衆務仍令孝穆引接關東歸附人士并品藻才行  
而任用之撫納銓敘咸得其宜

薛端爲吏部尚書端久處選曹雅有人倫之鑒其所  
擢用咸得其才

隋高構仁壽初爲吏部侍郎以公事免煬帝立召令  
復位時爲吏部者多以不稱去職唯構最有能名前  
後典選之官皆出其下又云牛弘爲吏部尚書高構  
爲侍郎最爲稱職

陸彥師開皇初爲吏部侍郎時承周制官無清濁彥  
師在職凡所任人頗甄別於士庶論者美之

唐杜如晦爲吏部尚書尋爲右僕射仍掌選事引用  
賢良甚獲當時之譽

劉林甫貞觀初爲吏部侍郎初隋代赴選者以十一  
月爲始至春卽停選限所促選司多不究悉時選人



漸衆林甫奏請四時聽選隨到注擬當時甚以爲便時天下初定州府及詔使多有赤牒授官至是停省盡來赴集將萬餘人林甫隨才銓擢咸得其宜時人以林甫典選比隋之高孝基

李安期前後三典選部頗爲當時所稱

楊纂爲吏部侍郎銓敘人倫稱爲允當

高季輔爲吏部侍郎凡所銓綜時稱允愜

裴行儉高宗朝爲吏部侍郎與敬玄馬載同時典選十餘年甚有能名時人稱焉

李敬玄爲司列少常伯典選累年銓綜有序天下稱

其能

姚璿武后時爲天官侍郎善選補于今稱之

盧從愿睿宗初爲吏部侍郎以中宗之後選司頗失綱紀從愿精心循理大稱平允其有冒名僞選及虛增功狀之類皆能摘發其事典選六年前後無及之者初高宗時行儉馬載爲吏部最爲稱職及是從愿與李朝隱同時典選亦有美譽時人稱曰吏部前有裴馬後有盧李

韋沆爲邢部尚書頻年典較京外官考使前後咸稱允當



宋璟為吏部侍郎同中書門下三品玄宗在春官又兼右庶子先是外戚及諸公主等干涉朝政請託滋甚崔湜鄭愔等相次典選皆為權門所制九流失敘迎用兩年員闕注擬不足更置比冬選人大為士庶所歎至是璟大革前弊取捨平允銓綜尤是有敘李林甫為吏部侍郎天下昇平每歲選人填委林甫脩廢舉直甄別流品時議以為稱職改黃門侍郎徐浩為都官郎中掌選嶺南以廉平稱于部為北部郎中嘗署考第於吏部以公當稱劉滋為吏部侍郎有經學善持論性廉潔劾理嫉惡嘗掌選多所發擿更代詐偽者尤畏之

韋弘景為吏部侍郎銓祿平允權邪憚其嚴勁不敢干以非

崔郾為吏部員外郎銓敘之美為時所稱後唐韋寂為水部員外郎判南曹移浚儀令累選吏部郎中復判南曹吏畏其明

平直

夫政之敗繇官之邪前典之深戒也若夫式敘流品銓管人才漢魏以還實重其任乃有善於其職不懈其位為官擇人抑華崇本清濁有別名實以覈寒素



無下品之歎浮薄杜私謁之選不以親疎而易意不  
爲勢力之所奪介然不撓處事惟允考言底績抱公  
滅私才能適用怨亦不作繇是當時號爲得士天下  
無有滯才茲所謂邦之司直德服衆望守公率職之  
善者歟

後漢魯恭爲光祿勳選舉清平京師貴戚莫能枉其  
正

陳蕃爲光祿勳與五官中郎將黃琬共典選舉不偏  
權富而爲勢家郎所譖訴坐免歸

趙戩爲尚書典選董卓數欲有所私授戩輒堅拒不  
聽言色強厲卓怒召欲殺之衆人悚慄而戩辭貌自  
若卓悔謝釋之

魏諸葛誕爲吏部人有所屬託輒顯其言而承用之  
後有當否則公議其得失以爲褒貶自是羣僚莫不  
慎其所舉

晉荀顛爲尚書時顛甥陳泰卒顛代泰爲僕射領吏  
部顛承泰後加之淑慎綜核名實風俗澄正  
李密犍爲人爲州大中正性方直不曲意勢位後失  
荀勗張華指左遷漢中太守諸生多以爲寃  
李重爲吏部郎詢朝衆而斥華競存公平而塞私謁



是以羣才罔不畢舉  
劉毅爲青州大中正銓正人流清濁區別其所彈貶  
自親貴者始

張輔爲御史中丞梁州中正刺史楊欣有姊喪未經  
旬車騎長史韓預強聘其女爲妻輔貶預以清風俗  
論者稱之

江灌爲吏部郎時尚書謝奕銓敘不允灌每執正不  
從

王彪之爲吏部尚書時簡文以會稽王輔政有命用  
秣陵令典安遠補句容令殿中侍御史奚朗補湘東  
郡彪之執不從曰秣陵令三品縣耳殿下昔用安遠  
談者紛然句容近畿三品佳邑豈可處卜術之人無  
才用者邪湘東雖復遠小所用未有朗比談者謂頗  
兼卜術得進殿下若超用寒悴當令人才可拔朗等  
凡器實未足充此選

王蘊爲吏部郎性平和不抑寒素每一官缺求者十  
輩蘊無所是非時會稽王輔政蘊輒連狀白之曰某  
人有地某人有才務存進達各隨其方故不得者無  
怨焉

宋王球爲吏部尚書接客甚希不視求官書疏而銓



衡有序朝野稱之

庾炳之爲吏部郎時王僧達舉兄錫不協訴家貧求郡太祖欲以爲秦郡炳之曰王弘子旣不宜作秦郡僧達亦不堪蒞民乃止

王琨爲吏部郎吏曹選局貴要多所屬請琨自公卿下至士大夫例爲用兩門生江夏王義恭嘗屬琨用二人後復屬遣琨答不許

江湛爲吏部尚書在選職頗有刻覈之譏而公平無私不受請謁論者以此稱焉

王僧綽爲吏部郎叅掌大選究識流品諳悉人物拔才舉能咸得其分

南齊陸慧曉爲吏部郎曹中有都令史歷政以來諮執選事慧曉任已獨行未嘗與語帝遣左右單景雋以事請問慧曉謂景雋曰六十之年不復能諮都令史爲吏部郎也帝若謂身不堪便當拂衣而退帝甚憚之

梁張充爲吏部尚書居選稱爲平允

王泰爲中書侍郎歷給事黃門侍郎竝掌吏部郎事俄而卽真自過江吏部郎不復典大選令史以下小人求競者輻輳前後少能稱職泰爲之通關求吏先



至者卽補不爲貴賤請屬易意天下稱平  
王僧孺爲尚書吏部郎叅大選請謁不行  
何敬容爲吏部尚書銓序明審號爲稱職

褚翔居小選公清不爲請屬易意號爲平允

陳徐凌天祿初爲吏部尚書以梁末以來選授多失  
其所於是提舉綱維綜覈名實時有冒進求官誼競  
不已者凜乃爲宣示之曰自古吏部尚書者品藻人  
倫簡其才能彙其門胄遂其大小量其官爵梁元帝  
承侯景之凶荒王太尉接荊州之禍敗爾時喪亂無  
復典章故使官方窮此紛雜永定時聖朝草創干戈

未息亦無條序府庫空虛賞賜懸乏白銀難得黃札  
易營權以官階代於錢絹義存撫接無計多少致令  
員外嘗侍路上比肩諮議叅軍市中無數豈是朝章  
應其如此今衣冠禮樂日富年華何可猶作舊意非  
所望也所見諸君多踰本分猶言大屈未喻高懷若  
問梁朝朱領軍昇亦爲卿相此不踰其本分耶此是  
天子所拔非關選序梁武帝云世間人言有目色我  
特不目色范悌宋文帝亦云豈無運命每有好官缺  
輒憶羊玄保此則清顯職不繇選也秦有車府令趙  
高直至丞相漢有高廟令田千秋亦爲丞相此復可



爲例耶旣忝衡流應須粉墨所望諸賢深明鄙意自是衆咸服焉時論比之毛玠

後魏任城王澄爲吏部尚書及車駕北巡留澄銓簡舊例自公侯以下訖以選臣動有萬數冗散無事澄品爲三等量其優劣盡其能否之用咸無怨者

元順爲吏部尚書時三公曹令史朱暉素事錄事尚書事高陽王雍雍欲以爲廷尉評頻煩託順順不爲用雍遂下命用之順投於地雍聞之大怒昧爽坐都廳召尚書及丞郎畢集欲待順至於衆挫之順日高方至雍攘袂撫几而言曰身天子之子天子之弟天子之叔天子之相四海之內親尊無二元順何人以身成命拔棄於地須鬚鬢俱張仰面看屋僨氣奔湧長歎而不言久之搖一白羽扇徐而謂雍曰高祖遷宅中土剗定九流官方清濁軌儀萬古而朱暉小人身爲省吏何令爲廷尉清官殿下旣先皇同氣且遵成旨日有短垣而復踰之雍曰身爲丞相錄尚書如何不用一人爲官順曰庖人雖不理庖尸祝不越樽俎而代之未聞有別旨令殿下叅選事順又厲聲曰殿下必如是順當依事以聞雍遂笑而言曰豈可以朱暉小人便相忿恨遂起呼順入室與之極飲順之



毅不撓皆此類也

陸侯為給事中典選部蘭臺事當官而行無所屈撓封軌渤海人宣武帝時為考功郎中本郡中正渤海太守崔林入為吏部郎以凡考事于軌軌曰法者天下之平不可以舊君故虧之也休歎其守正  
韋崇為司州及河南邑中正崇頻尹衡品以平直見稱

楊懿為選部給事中有公平之譽

宋弁字義和廣平人為黃門侍郎兼司徒左長史為本州大中正弁先與度支尚書李彪州里迭相祇好結管鮑之交而以寒地處之殊不欲微相優假彪不以為恨及郭祚為吏部彪與子志求官祚仍以舊地處之彪以位經嘗伯又兼尚書謂祚應以貴遊拔之深用忿怨形於言色時論以此譏祚祚每曰爾與義和至交豈能饒爾而怨我乎  
一云郭祚為吏部所用者皆量才稱職時人以

李叔虎渤海人為國子博士本國中正攝樂陵中正性清直甚有公平之稱

北齊趙彥深為尚書令凡諸選舉先令銓定提獎人物皆以行業為先輕薄之徒弗之齒也



辛術爲吏部尚書文宣嘗令術選百員官參選者二  
三千人術題目士子人無謗讟其所旌擢後亦皆致  
通顯

陽休之爲吏部尚書多識故事諳悉民族凡所選用  
莫不才地俱允

後周薛端爲吏部郎中自居選曹先盡賢能貴遊子  
弟才劣行薄者未嘗升擢之每啓文帝云設官分職  
本康時務苟非其人不如曠職帝深然之

隋盧愷爲周小吏部染工上士王神歡者嘗以賂自  
進冢宰宇文護擢爲計部下大夫愷諫曰古者登高  
能賦可爲大夫求賢審官理須詳慎今神歡出自染  
工更無殊異徒以家富自通遂與縉紳竝列實恐維  
鶻之刺間之外境護竟寢其事

韋世康爲吏部尚書選用平允請託不行出爲襄州  
刺史歷安州信州總管入朝復拜吏部尚書前後十  
餘年間多所進拔朝廷稱爲廉平

高構爲吏部侍郎時人以構好劇談頗謂輕薄然其  
內懷方雅特爲吏部尚書牛弘所重後以老病解職  
時弘典選凡將有所擢用輒遣人就第問其可否  
牛弘爲吏部尚書其選舉先德行而後文才務在審



慎所進用多稱職  
唐高士廉貞觀年為吏部尚書獎鑒人倫雅諳姓氏  
凡所署用莫不人地俱允

韋承慶自天授以來三掌天官選事銓授平允海內  
稱之

高季輔為吏部侍郎凡所銓敘時稱允當

崔玄暉為天官侍郎介然自守絕於請謁為執政者  
所忌轉文昌左丞選司令史乃設齋自慶武太后聞  
之復拜為天官侍郎

劉竒為吏部侍郎注張文成司馬鎰為監察御史二

人因申屠瑒以謝之竒正色曰舉賢本自無私二君

何為見謝

楊真為吏部侍郎前後典選十餘載銓叙人倫稱允當  
吉頊為吏部侍郎陸象先本名景初為揚州叅軍秩

滿調選頊擢授雒陽尉時象先父元方亦為吏部固  
辭不敢當頊曰為官擇人至公之道陸景初才望高  
雅非嘗流所及實不以吏部之子妄推薦也竟奏授

之

姜晦為吏部侍郎性聰悟識理體舊制吏曹舍宇悉  
布棘以防令史與選人交通及晦領選事盡除之大  
開銓門示無所禁私引致者晦輒知之召問莫不首



伏初朝廷以晦改革前規咸以爲不可竟銓綜得所  
賄賂不行舉朝歎伏

席豫爲吏部侍郎玄宗謂之曰以卿前爲考功職事  
平允故有此授豫典選六年有令譽

韋陟爲吏部侍郎嘗病選人冒名接脚闕員旣少取  
士良難正調者被擠僞集者冒進陟剛腸嫉惡風彩  
嚴正選人疑其有瑕者陟按聲盤詰無不首伏每歲  
皆賸得數百員闕以待淹滯嘗謂所親曰使陟知銓  
衡一二年則無人可選矣又有一致仕官敘五品陟  
判之曰青氈展慶竝不立班朱紱承榮無宜臥拜時  
人推其強直

韋見素爲吏部侍郎在職公平選士美之

苗晉卿爲吏部侍郎拔異舉廢時稱平允

楊綰爲吏部侍郎歷典舉選精覈人物以公平稱

奚陟爲刑部侍郎知吏部選事銓綜平允有能名遷

吏部侍郎所蒞之官時以爲稱職

裴洎爲吏部考功二員外郎時吏部侍郎鄭珣瑜請

洎考調判珣堅守不爲時力所奪考覈皆務才實

楊於陵爲吏部員外郎判南曹時宰相有密親調習

文書不如式於陵持而不與物論大歸之遷右司郎



中後爲吏部侍郎凡四周歲簡察奸吏調補平允至今人稱之  
崔郾爲吏部員外奸吏不敢欺孤寒無援者未嘗留滯銓敘之美爲時所稱  
孔緯昭宗時爲吏部侍郎居選曹動循格令權要有所託私書盈几不之省執政怒之改太嘗卿  
晉史圭爲吏部侍郎分知銓事而圭素廉守太著公平時有前樂城浩令者年踰七十不能拜起有重臣達意且令與官圭不允其請人甚嘉之

入其振舉

振廢滯拔英雋有司之職也故刈其翹楚形之於風什揚彼側陋著之於典訓乃有雅望著於紳紱精識善其人倫處選士之曹當持衡之重唯善所在靡遺於葑菲類能而使必適於轅輪得其辨論之方盡諸藻鑒之美繇是棫樸之詩載作邁軸之歎不與者焉後漢許靖爲尚書郎典選舉董卓秉政以漢陽周處爲吏部尚書與靖共謀議進退天下之士沙汰穢濁顯拔幽滯進用穎川荀爽韓融陳紀等爲公卿郡守拜尚書韓馥爲冀州牧侍中劉岱爲兗州刺史穎川張咨爲南陽太守陳留孔伉爲豫州刺史東郡張邈



爲陳留太守

吳李肅字傳恭爲選部尚書選舉號爲得才史賧以  
晉山濤武帝時爲吏部尚書前後選用周徧內外而  
竝得其才濤再居選職十有餘年每一官缺輒啓擬  
數人詔旨有所向然後顯奏隨帝意所欲爲先故帝  
之所用或非舉首衆情不察以濤輕重任意或讚之  
於帝故帝手詔戒濤曰夫用人惟才不遺疎遠單賤  
天下便化矣而濤行之自若一年之後衆情乃寢濤  
所奏甄拔人物各爲題目時稱山公啓事嵇紹以父  
得罪靖居私門濤啓武帝曰康誥有言父子罪不相  
及嵇紹賢侔卻缺宜加旌命請爲祕書郎帝謂濤曰  
如卿所言乃堪爲丞何但郎也乃發詔徵之起家爲  
祕書丞又胡原練習兵馬濤稱其才堪邊任舉爲太  
尉長史

李重爲吏部郎務抑華競不通私謁特留心隱逸錄  
是羣才畢舉拔用北海西郭湯瑯邪劉珩燕國霍原  
馮翊吉謀等爲祕書郎及諸王文學故海內莫不歸  
心時燕國中正劉沉舉霍原爲寒素司徒府不從沉  
又抗詣中書奏原而中書復下司徒叅論左長史荀  
組以謂寒素者當謂門寒身素無世祿之資原爲列



侯顯佩金紫先爲人間通流之士晚乃務學少長異業年踰始立草野之譽未洽德禮無聞不應寒素之目重奏曰按如癸酉詔書廉讓宜崇浮競宜黜其有履謙寒素靖恭求已者應有以先之如詔書之旨以二品繫資或失廉退之士故開寒素以明尚德之舉司徒總御人倫實掌邦教當務峻準評以一風流然古之厲行高尚之士或栖身巖穴或隱迹丘園或克已復禮或耄期稱道出處默語惟義所在未可以少長異操用疑其所守之美而遠同始終之責非所謂儼人必於其倫之義也誠當考之邦黨之倫審之於任舉之主沉爲中正親執銓衡陳原隱居求志篤古好學學不爲利行不要名絕跡窮山韞韜道藝外無希世之容內全遜逸之節行成名立摺紳慕之委質受業者千里而應有孫孟之風嚴鄭之操始舉原先諮侍中領中書監華前州大中正後將軍嬰河南尹軼去三年諸州還朝幽州刺史許猛特以原名聞擬之西河求加徵聘如沉所列州黨之議旣舉又刺史班詔表薦如此而猶謂草野之譽未洽德禮無聞舍所徵簡之實而無明理正辭以奪沉所執且應二品非所求備但願定志窮山脩述儒道義在可嘉若遂



抑替將負幽邦之望傷敦德之教如詔書所求之旨應爲二品詔從之

劉沉字道真燕國薊人太保衛瓘辟爲掾領本邑大中正敦儒道愛賢能進霍原爲二品及申理張華皆辭旨明峻爲當時所稱

王濟太原中都人與同郡張楚友善爲本州大中正訪問邑人品狀至楚濟曰此人非卿所能目吾自爲之乃狀楚曰天才英博亮拔不群

何攀居心平允蒞官整肅愛樂人物敦儒貴才爲梁益二州中正引致遺滯巴西陳壽聞又犍爲費立皆西州名士竝被鄉閭所謗清議十餘年攀申明曲直咸免冤濫

韓康伯爲吏部尚書初與吳隱之隣居隱之母死康伯母每聞隱之哭聲必輟殮投杼爲之悲泣謂康伯曰若君銓衡當舉此輩人及康伯爲吏部隱之遂階清級

宋沈演之爲吏部尚書性好舉才尤濟屈滯王僧綽爲吏部郎參掌大選究諸流品人物拔舉賢能咸得其分

南齊張岱爲吏部尚書武帝爲撫軍岱選東陽太守



王績爲長史呈選牒太祖笑謂岱曰此素望也

梁張緒仕宋爲吏部郎參掌大選後廢帝元徽初東宮罷選曹擬舍人王儉格外記室緒以儉人地兼美宜轉祕書丞從之

王瞻爲吏部尚書瞻性率亮居選所舉其意多行劉之遴年十五舉茂才任昉見而異之瞻掌候任昉值之遴在昉坐昉謂瞻曰此南陽劉之遴學優未仕水鏡所宜甄擢瞻卽調爲太學博士

蕭子顯爲吏部尚書謝蘭丁父憂毀瘠骨立服闋後子顯表其至行擢爲王府法曹行參

張纘爲吏部尚書初纘爲吳興太守時陸雲公好學有才思先製大伯廟碑纘罷郡經途讀集文歎曰今之蔡伯喈也至都掌選言之於高祖召兼尚書儀曹郎又王勵爲河東王功曹史王出鎮京口勵將隨之藩纘時典選舉勵造纘言別纘嘉其風采乃曰王生才地豈可遊於外府乎奏爲太子洗馬遷中書舍人纘居選其後門寒素有一介皆見引拔不爲貴要屈意人士翕然稱之

後魏李冲爲吏部尚書典選房景伯少喪父以孝聞家貧傭書自給養母甚謹尚書盧淵稱之於冲冲拔



為奉朝請司空祭酒

崔休為吏部郎中遷散騎嘗侍權兼選任休愛才好

士多所拔擢

李韶為吏部尚書時張普惠為步兵較尉免官故事

免官者三載之後降一階而敘若才優擢授不拘此

限孝明熙平中韶奏普惠有文有學依才優之例宜

特顯敘勅除寧遠將軍司空倉曹參軍朝議以不降

階為榮

北齊楊遵彥為吏部尚書銓衡甚慎選舉秀才擢第

罕有甲科任城王湝為定州刺史舉李德林秀才德

林射策五條考皆為上授殿中將軍既是西省散員

非其所好謝病還都廢帝乾明初彥遵奏追德林入

議曹

唐張銳為吏部侍郎高祖謂之曰今年選人之內豈

無才用者卿可簡試將來欲縻之好爵於是銳以張

行成張知運等數人應命時人以為知人

高季輔為吏部尚書韋思謙弱冠舉進士累補應城

令及歲滿預選思謙在官頗有公事懲殿舊制多不

進官季輔曰自居選部今始得此一人豈以小疵而

棄大德特超授監察御史繇是稍知名



李敬玄為司列少嘗伯選人有杭州叅軍徐大玄者  
 初在任時同僚有張惠犯賊至死大玄哀其母老乃  
 詣獄自陳與吏同受賊惠數既少遂得減死大玄亦  
 坐免官不調十餘年敬玄大嗟賞之擢授鄭州司功  
 叅軍太玄繇是知名後官至祕書少監以德行爲時  
 所重者以爲敬玄能舉善也  
一云敬玄爲吏部侍郎  
 咸亨二年有楊炤王勃  
 盧炤鄰駱賓王並以文  
 章見稱敬玄咸爲延譽  
 裴行儉咸亨初爲吏部侍郎典選十餘年甚有能名  
 自掌選及爲大總管凡遇賢俊無不甄採  
 鄭杲則天聖曆中爲吏部郎注韓思復爲太嘗博士

元希聲爲京兆士曹嘗謂人曰今年掌選得韓元二  
 子則吏部不負朝廷矣

王丘玄宗開元中爲吏部侍郎拔擢山陰尉孫逖桃  
 林尉張鏡微湖城丞張晉明進士王冷然李昂等不  
 數年登禮闈掌綸誥焉

崔琳爲吏部侍郎判銓日收選人盧怡裴敦復于孺  
 卿等十數人無何皆入臺省

衛次公爲吏部侍郎選人有李績者徐有功之孫名  
 在黜中次公召而問之曰子之祖先勲在王府豈限  
 常格故優秩而遣之



振舉

冊府元龜

冊府元龜

巡按福建監察御史臣李嗣京 訂正

知閩縣事 臣曹鼎臣參閱

知建陽縣事 臣黃國琦較釋

銓選部

不稱 謬濫 貪賄

不稱

天官之職銓管是司稽周禮理典之制舉魏氏官人  
之法必資公方之器藻鑿之能所以總百官而式九  
流也乃有性質凝滯才識駑下不能執守與時浮沉

冊府元龜 銓選部

卷之六十三



多所懷私徇於情託無裁斷之用失品藻之方以高簡而自矜惟酣醉以爲適繇是輪轅失序衡鑑不明興非據之譏負敗官之咎豈獨貽其身禍亦乃紊於國經布於簡書可以爲恥

魏時苗鉅鹿人爲大官令領其郡中正定九品至於敘人才不能寬天然紀人之短雖在久遠蓄之不置晉王戎爲吏部尚書以晉室方亂慕遽伯玉之爲人與時舒卷無蹇諤之節自經典選未嘗進寒素退虛名但與時浮沉而已

畢卓爲吏部郎嘗飲酒廢職

梁王亮仕齊爲吏部尚書建武末尚書右僕射江祐管朝政多所進拔爲士子肆亮自以身居選部每持異議始亮未爲吏部郎時以祐齊明帝之內弟故深友祐祐爲之延譽益爲帝所器重至是與祐昵之如初及祐遇誅羣小放命凡所除拜悉繇內寵亮更弗能止外若詳審內無明鑒其所選用示資次而已當世不謂爲能

任昉爲吏部郎中叅掌大選君職不稱尋轉御史中丞

蕭子顯爲吏部尚書性凝簡負才氣見九流賓客不



與交言但舉扇一揮而已衣冠竊恨之  
陳到字仲舉為左僕射叅掌選事仲舉既無學術朝  
章非所長選舉引用皆出自表樞性疎簡不涉世務  
與朝市無所親狎但聚財酣飲而已

後魏任城王澄為吏部尚書孝文曰王者不降佐於  
蒼昊皆拔才而用之朕失於舉人任許一羣婦人革  
竒事當更銓簡耳任城在省為舉天下綱維為當署  
事而已澄曰臣實署事而已孝文曰如此便令史足  
矣何待任城

李神雋為吏部尚書意向風流情在推引人物而不  
能守正奉公無多聲譽有鉅鹿人李炎上書言神雋  
之失天柱將軍爾朱榮曾聞補人為曲陽縣令神雋  
以階懸不用榮聞大怒謂神雋自樹親黨排抑勲人  
神雋懼啓求解官

宋弁為黃門郎司徒左長史時大選內外羣官弁定  
四海士族弁專叅銓量之任事多稱旨然好言人之  
陰短高門大族意所不便者弁因毀之至於舊族倫  
滯人非可忘者又申達之又為本州大中正姓族多  
所降抑頗為時人所非  
東魏龔掌山王疑孝靜時為尚書令攝選部疑雖居



重任隨時而已

北齊赫連子悅為都官尚書以本官兼吏部子悅在官惟以清勤自守既無學術又闕風儀人倫清鑒去之彌遠一旦居銓衡之首大招物議繇是除太嘗卿卒

袁韋脩為吏部尚書初馮子琮以僕射攝選婚嫁相尋韋脩嘗非笑之語人云馮公營婚日不暇給及自居選曹亦不免時論蓋地勢使然

寇猛為武衛將軍自以上谷寇氏得補燕州大中正而不能甄別士庶也

隋盧愷為禮部尚書權吏部尚書時預選者甚多愷即授官皆作色而遣之

唐溫彥博太宗時為吏部郎中知選事意在沙汰多所擯抑而退者不伏囂訟盈庭彥博惟騁辭辯與之相詰終日喧擾為識者所嗤

戴胄為民部尚書兼簡較吏部尚書及在銓衡抑文雅而獎法吏不適輪轅之用

楊纂為吏部侍郎抑文雅進黠吏觀時任數為時論所譏

唐皎為吏部侍郎當引人銓問何方便穩或云其家



在蜀乃注與吳復有云親老先任江南卽唱之隴右  
論者莫能測其意

楊師道爲吏部尚書師道貴公之子四海人物未能  
委練所署用多非其才而深抑勢貴及其親黨將以  
避嫌然亦無藻鑑之譽從征高麗及師還人有言其  
非典選之才乃轉工部尚書師道乞爲太嘗卿從之  
楊思玄高宗時爲司列少嘗伯恃外戚貴待選流多  
不以禮而排斥之爲選者夏侯彪所訟而御史中丞  
郎餘慶彈奏免官

魏克已爲吏部侍郎銓路喧譁大爲冬集人援引指

摘貶爲太子中允

鄧玄挺爲吏部侍郎旣不稱職甚爲時談所鄙又時  
患消渴病選人因目爲鄧渴作鄧渴詩榜衢路自有  
唐已來掌選之失未有如玄挺者坐此左遷澧州刺  
史遷晉州刺史召拜麟臺少監重爲天官侍郎其失  
有甚於前

韋待賈爲吏部尚書素無才術志識凡下出自武官  
而驟居選部凡所銓綜多爲朝野所嗤鄙

許子儒爲吏部侍郎性無藻鑑所視銓綜皆委令史  
緱直謂曰汝乎配也



後唐崔貽孫爲吏部侍郎性好于人喜得小惠天官任重昏耄罔知瞽目將瞑猶以所欲託於選人銓管難虛遂除禮部尚書致仕

謬濫

論材定官存於周制興廉舉孝著於漢典得人有益律之褒濫進有絀爵之罰故天下慎法莫敢謬舉魏晉以降其道駁喪條教所頒旣殊於古銓選所屬復罕其人靡能平心守正量才揆職繇是用捨徇意詞辯飾非或觀時而任數或爲朋而受賂俾夫補授夫次資格差謬多所抑損或成紛訴至有附會權勢觀狎姦民上不能資朝廷之聰明下則積山林之怨憤是使古道不復來者喟然

漢王勳成帝時襲封卬城侯坐選舉不以實免魏何晏爲尚書主選舉其宿與之有舊者多被拔擢梁王亮爲吏部尚書拘資次而已當代謂爲不能後魏李韶爲吏部尚書在選曹不能平心守正通容而已議者貶之

崔亮爲吏部尚書時羽林軍新害張彝之後靈太后令武官得依資入選官員旣少應選者多前尚書李韶循嘗擢人百姓大爲嗟怨亮乃奏爲格制不問士



之賢愚專以停解日月爲斷雖復官須此人停日後者終於不得庸才下品年月久者灼然先用沉滯者皆稱其能亮外甥司空諮議劉景安書規亮曰殷周以鄉塾貢士兩漢繇州郡薦才魏晉因循又置中正諦觀在昔莫不審舉雖未盡美足應十收六七而朝廷貢秀才止求其文不取其理察孝廉惟論章句不及治道立中正不考人才行業空辨氏姓高下至於取士之途不溥沙汰之理未精而舅屬當銓衡宜須改張易調如之何反爲停年格以限之天下士子誰復脩厲名行哉亮答書曰汝所言乃有深致吾秉時僥倖得爲吏部尚書當其壯也尚不如人况今朽老而居帝難之任葺思用賢舉直以報明主之恩盡忠竭力不爲貽後之累昨爲此格有繇而然今已爲汝所恠千載之後誰知我哉可靜念吾言當爲汝論之吾兼正六爲吏部郎三爲尚書銓衡所宜頗知之矣但古今不同時宜須異何者昔有中正品其才第上之尚書尚書據狀量人授職此乃與天下羣賢共爵人也吾謂當爾之時無遺才無濫舉矣而汝猶云十收六七况今日之選專歸尚書以一人之鑒炤察天下劉毅所云一吏部郎中而欲究竟人物何異以管



闕天而求其博哉今勳人甚多又羽林入選武夫崛起不解書詩唯可曠弩前驅指蹤捕噬而已忽令垂組軒求其烹鮮之効未曾操刀而使剗割又武人至多官員至少不可用博設令十人共一官猶無官可授况一人望一官可繇可不怨哉吾近面執不宜使武人入選請賜其爵厚其祿既不見從是以權立此格限以停年耳昔子產鑄刑書以救弊叔向譏之以正法向異汝以古禮難權宜哉仲尼云德我者春秋罪我者亦春秋吾之此指其繇是也但令當來君子知吾意焉後甄琛元脩義城陽王徽相繼為吏部尚書利其便已踵而行之自是賢愚同貫涇渭無別魏之失人從亮始也

楊愔超拜吏部尚書典選二十餘年獎擢人倫以為已任然取士多以言貌時致謗言以為愔之用人似貧士市瓜取其大者愔聞不以屑意

馮子琮為右僕射仍攝選子琮微有識鑒及位望轉隆宿心頓改擢引非類以為深交縱其子弟官位不

依倫次又專營婚媾歷選上門例以官爵許之旬日

便驗唐戴自貞觀中檢校吏部尚書在銓衡抑文雅而獎浮

楊集自觀中為吏部侍郎典銓補出入十年銓叙人物倫稱為允許子儒則天時為天官侍郎不以藻鏡為意有令史

戴胃楊集卷二條  
補在許子儒前

然而抑文雅進銓選觀時任類頗為時論所鄙



句直是其腹心每注官多委令下筆子儒但高枕而

臥語勾直云平配繇是補授失次無復綱紀道路喧

然以為口實是時則天臨朝引見風俗使舉人無賢愚咸加擢用高者試鳳閣舍人給事中

次或試員外郎侍御史補闕拾遺較書郎故時人為之謔曰補闕連車載拾遺平斗量杷椎侍御史腕脫

較書郎試官之起自茲始

宋遙玄宗時與苗晉卿俱為吏部侍郎天寶二年貶

遙為武當郡太守晉卿為安康郡太守是時海內晏

平選人萬計委有司考覈書判詔重其事兼命他司

考之務求其實遙與晉卿苟媚朝廷又無廉潔之操

取舍淪濫甚為當時所醜有張奭者御史中丞倚之

子不辯菽麥假手為判時升甲科會下第者嘗為薊

令以其事白于范陽節度使安祿山祿山恩寵崇盛

謁請無時因具奏之帝乃大集登科人御花萼樓親

試升第者十無一二焉奭手持試紙竟日不下一字

時謂之曳白帝大怒遙晉卿既受責乃貶倚為淮陽

郡太守詔曰庭闈之間不能訓子選調之際乃以託

人時士子皆以為戲笑或託於詩賦諷刺考判官禮

部郎中裴肫起居舍人張烜監察御史宋昱左拾遺

孟朝皆貶官嶺外

韋陟天寶中為吏部侍郎陟風神高遠以門地自負



時以選賢拔能爲已任博采浮薄不徇於行屢以此失人出爲襄陽太守

楊國忠天寶中以便僻取宰相欲其能事皆出於已猶兼吏部尚書故事吏部置三銓尚書侍郎分掌選事三注三唱自春及夏纔終其事國忠使猾吏於私第暗定官員集百僚於尚書省對注唱一日令畢以誇神速資格差謬無復倫序乃令其所昵京兆尹鮮于仲通中書舍人竇華侍御史鄭昂之徵賂於選人於尚書省門立碑以頌已之德

崔渙肅宗至德初爲黃門侍郎平章事時未復京師舉選路絕詔渙充江淮選補使以收遺逸渙選士或於聽受又爲下吏所鬻濫進者非一以不稱職聞乃罷知政事爲王傅

徐浩代宗朝爲吏部侍郎坐以妄第冒選俾侍郎辭邕注授京尉爲御史大夫李栖筠所彈奏坐貶明州別駕

令狐峘大曆中爲刑部員外判吏部南曹時劉晏爲尚書楊炎爲侍郎峘以晏舉分闕必擇其善者與晏而以惡者與炎

劉滋爲刑部尚書德宗貞元九年御史中丞韋貞伯



劾奏吏部貞元七年冬以京兆府踰濫解選已授官  
摠六十六人或不到京銓試懸受官告又按選格  
銓狀選人自書試日書跡不同卽駁放殿選違格文  
者不復驗及降資不盡或與注官伏以承前選曹乖  
謬未有如此遂使衣冠以貧乏待闕奸濫以賄賂成  
名非陛下求才審官之意繇是滋以前任吏部尚書  
及吏部侍郎杜黃裳皆削一階  
陳歸貞元中爲考功員外郎克嶺南選補使選人流  
放注官美惡違背令文唯意出入復供求無厭郵傳  
患之監察御史韓泰奏劾其罪配流恩州

權德輿貞元中爲吏部侍郎吏誤用官闕改守太子  
賓客

鄭綱文宗時爲吏部尚書丁公著爲工部侍郎知選  
事太和二年閏三月己亥都省奏落下吏部三銓甲  
內今春注超資官凡六十七人勅都省所執是格銓  
司所引是例互相陳列頗以紛紜所貴清而能通亦  
猶議事以制今選期已過方此爭論選人可哀難更  
停滯其三銓已授官都省落下竝依舊注與重團奏  
仍限五日內畢其中如官超一資半資比格令已令  
據稍優者至後選日量事降折尚書侍郎注擬不一



致令都省以此與詞鄭綱丁公著各罰一季俸東銓所落人數較少楊嗣復罰兩月俸其今年選格仍分明標出近例有可行者收入格不可者於格內書破則所司有文可守選人無路僥求時尚書左丞韋弘景以吏部注擬不公選多超資授官糾按其事落下勅申吏部引例以爲據選人輩又惜官已成道路沸騰日接宰相喧訴遂降此勅

楊虞卿爲吏部員外郎太和二年十二月御史臺奏准勅推勘踰濫官都六十五人應取受錢物僞出告身籤符賣鑿空僞官令赴任南曹令史李賓等六人

及賣鑿空僞官人許稜等共取受錢都一萬六千七百四十貫文又據李賓等款稱去年三月已後商量斂錢三千貫文與吏部員外郎楊虞卿廳典溫亮囑求楊虞卿不舉勘濫官事得楊虞卿狀虞卿跡忝郎署爲明天子舉僞捕奸幸無差謬今李賓之輩結黨構虛而云商量斂率甚明用此致尤誰則無罪據李賓款本與溫亮錢物囑求虞卿不舉踰濫官者若虞卿遂不舉勘則小吏卜射計行今虞卿簡舉僞官牒臺推勘於公事足以自明緣溫亮在宅外居住於李賓處取受虞卿無繇得知簡下不明伏候嚴責勅李



竇等八人竝偽造印符構賣巨蠹推窮盡法伏斷死刑宜付京兆府各決痛杖一頓處死馬羽卿等一十人引致梯媒合成奸計各決六十配流嶺外楊虞卿勾舉雖則盡心簡下終是無術親吏逃逸賊狀未明量罰兩月俸料踰濫官六十五人內已付所司者速令詳斷見勘具申奏其賊及偽印等竝付所司准法處分

後唐明宗長興元年七月吏部南曹奏磨勘南郊行事官前守濮州范縣主簿李範是同光元年不納告身人數准勅終身不齒今又冒名於四方館行事前

河南府長水縣主簿趙知遠使兄為父蔭行事者勅旨李範已該恩赦特放罪收納文書趙知遠以兄為父未之前聞既遇郊禋特從恩宥出身歷任文書付所司焚毀放罪勒歸鄉貫本道長吏與改昭稜奏聞

貪賄

彌綸治典銓綜多士周官冢宰之職也若乃端已以居位潔身以率下旌別淑慝澄汰流品使朝有多士國無幸人斯可謂官修其方矣若乃名浮於實言不顧行黷貨以自穢瘝官而靡懼冒黜幽之典貽敗類之咎歷代而下實繁有徒論而次之用戒於後



宋庾炳之字仲文爲吏部尚書領選既不緝衆論又頗通貨賄用少府卿劉道錫爲廣州刺史道錫至鎮餉白檀牽車炳之性好潔嘗自乘馬或以白文帝帝見問曰道錫餉卿小車裝飾甚麗有之乎炳之懼起謝

梁劉孝綽爲吏部郎在職頗通賊貨爲從弟尚書左丞覽所劾奏免官

何敬容爲左僕射叅掌大選通苞苴餉餽無賄則畧不交語

後魏李宣茂孝文時爲司空府司馬兼定州大中正坐受郡中鄉人財貨爲御史所劾除名爲民

楊尼爲國子祭酒兼幽州中正後除平北府長史帶漁陽太守未拜坐爲中正時受鄉人貨免官

元暉常山王遵之孫宣武時爲吏部尚書納貨用官皆有定價大郡二千疋次郡一千疋下郡五百疋其餘授職各有差天下號曰市曹

皇甫瑒孝明時爲吏部郎性貪婪多所受納鬻賣官吏皆有定價

元修義汝陰王天錫之子爲吏部尚書在銓衡唯事貨賄授官大小皆有定價時中散大夫高居者有旨



先敘上黨郡缺居遂求之修義私已許人抑居不與  
居大言不遜修義命左右牽曳之居對大眾呼天唱  
賊人問居曰白日公庭安得有賊居指修義曰此座  
上者違天子明詔物多者得官京師白劫此非大賊  
乎修義失色居行罵而出後欲邀車駕論修義罪狀  
左僕射蕭寶寅論之乃止

元世雋任城王澄之孫出帝時為吏部尚書居選曹  
不能厲心多所受納為中尉所彈坐免官  
北齊段孝言為吏部尚書既無深鑿又待物不平抽  
擢之徒非賄則舊

右僕射仍攝選子  
瑤微有幾鑿及位望  
專隆宿心賴政權引  
非類以為深交縱其  
子弟官位不依倫次  
又專迎婚媾厝選上  
門例官爵許之自日  
便驗

以上補馮子琮修後  
庚子五月反林志

馮子琮後主時為吏部尚書其妻胡太后妹也侍親  
放縱請謁公行賄貨填積守宰除授先定錢帛多少  
然後奏聞其所通致事無不允子琮亦不禁制後遷  
唐鄭元毓高祖時為選部郎中以贓犯處極刑  
李義府高宗時為司列太嘗伯本無藻鏡才恬武后  
之勢專以賣官為事補授失次人多怨言  
李元恭中宗時以大理少卿為長寧安樂二公主所  
引用令知吏部侍郎分往東都掌選事亦以贓汗聞  
於天下故時人為之語曰長寧安樂竝狂顛既教翻  
地亦翻天賣弄大家猶未足便使元恭來取錢



鄭愔諂事武三思及韋氏悖逆庶人歷選吏部侍郎  
愔掌選專以賣官爲務人多怨讟時京師大旱爲之  
語曰殺鄭愔天必陰其爲人所惡如此

崔湜爲中書舍人與鄭愔同掌選賣官鬻獄一時巨  
蠹並爲御史所彈中宗勅所司以理勘問勿加窮迫  
繇是希旨無所發明然猶斷愔配流嶺南湜貶江州  
司馬而更授湜襄州刺史愔江州司馬

李彭年玄宗時爲吏部侍郎坐贓伏罪詔曰彭年幸  
以資序累登清貫委之銓綜任以權衡不能徇公滅  
私持平守直而乃貪財敗類黷貨無厭旣玷清朝有

肩法度頃令推鞠皆自款承據其罪名合當殊死但  
以陽和布令善貸好生特舍嚴刑俾從流竄宜除名  
長流嶺南臨賀郡仍卽差綱馳驛領送朕以爲制理  
之本期返淳風庶叶至公期於不犯永言議罪良用  
憮然且陳力就列本於正已從事劾官義存守法爲  
惡者與衆共棄務善者以才必升凡百庶僚深宜自  
勉立身之道可不慎歟彭年先朝宰臣慎遠之孫也  
以吏才知名掌選七年好聚財無廉潔之操而善接  
待選人惟黷貨無厭人多怨之至是睢陽太守路齊  
暉之子曰畿納絹千疋求官爲選人所發詔下有司



許鞠彭年引紙稱伏賊狀狼籍遠近恥之咸以為戒  
陳歸德宗時為考功員外郎充嶺南選補使選人流  
放注官美惡違背令文以意出入復供求無厭郵傳  
患之監察御史韓泰奏劾得罪配流恩州

主執舍獄既與盜竄宜創各  
一 罪與用

胃志喪與令誅讎皆自茲承對其罪各合當務至

冊府元龜

巡按福建監察御史臣李嗣京 訂正

知甌寧縣事 臣孫以敬 參閱

知建陽縣事 臣黃國琦 較釋

貢舉部

總序

三代貢舉之制始于卿大夫其升于司徒曰秀士升  
于太學曰俊士升于司馬曰進士然則卿大夫暨于  
司馬皆貢舉之官也秦之制無聞焉漢高祖始詔御  
史中執法下郡守勸勉賢者詣相國府署行義年文



帝詔諸侯王公卿郡守舉賢填能直言極諫者元帝  
又詔丞相御史舉質樸敦厚遜讓有行又詔列侯舉  
茂才又舊儀刺史二千石察舉茂才尤異此則漢之  
諸侯王丞相御史九卿列侯刺史郡守皆有舉士之  
制而丞相之府實司其事武帝令太嘗籍博士弟子  
有秀才異等輒以名聞又光祿勳銓第郎吏歲舉秀  
才廉吏此則太嘗光祿勳別有舉士之制也至成帝  
初置尚書嘗侍曹主公卿又置二千石曹掌郡國二  
千石則尚書主選舉之始也後漢三公將軍光祿勳  
廷尉司農中二千石司隸州牧歲舉茂才廉吏郡國  
歲舉孝廉三公上尚書輒勞其舉將又大學試明經  
弟子此與西漢之制畧同其後改嘗侍曹爲吏曹亦  
曰選部又公府西曹主府吏置用東曹主二千石長  
吏選除于時選舉之制於郡國屬功曹於公府屬東  
西曹於尚書屬吏部而尚書令僕總之魏司空陳羣  
以爲天臺選用不悉人才每郡擇有鑒照者除爲中  
正目狀人才澄汰九品又置州都總其事應璩所謂  
百郡立中正九州置都士又吳亦有大公平若魏之  
州都而蜀無聞焉晉宣帝除九品州置大中正大中  
正之職掌訪問鄉邑考績德行以定上格下格選平



正無禮力貶清議晉令大小中正爲內官聽月二會議上東門外州及郡國亦舉孝廉秀才其在天臺則吏部州則別駕西曹郡國則功曹主其事宋齊亦如之而宋文帝不欲重權在下故分置二吏部尚書以散其權梁無中正天監中州置州望郡置郡宗鄉置鄉豪各一人專典搜薦無復膏梁寒素之隔普通七年又詔州郡歲舉人敬帝復令諸州各置中正選舉皆中正押上然後量試不然則否陳亦如之後魏州郡皆有中正掌選舉每以季月與吏部銓擇可否其秀才對策居中上表敘之崔浩爲冀州大中正薦冀

定相幽并五州士數十人各起家爲郡守自太和以前精選中正德高鄉國者充之其邊州小郡人物單眇者則併附佗州其在僻陋則闕而不置當時稱爲簡當頗曰得人及宣武孝明之時州無大小必置中正旣不可悉得其人故有蕃落庸鄙操銓覈之權而選敘頽紊正始初乃罷諸郡中正而吏部之職皆如往制北齊選舉亦沿後魏凡州縣皆置中正中書策秀才集書策貢士考功策廉良天子嘗服乘輿坐朝堂中楹秀孝各以班草對字有脫誤者呼起立席後事有濫劣者飲墨水一升文理孟浪者奪席脫容刀



考昭帝孝建二年詔內外執事官每三年之內各舉一人居白屋巾褐未釋亦舉之後周初蘇綽爲六詔書其四曰擢賢良懲魏齊之失罷門資之制其所察舉頗加精慎武帝平齊詔山東縣舉明經幹理宣帝亦詔州舉高才博學者爲秀才郡舉經明行修者爲孝廉依六官之制建吏部中大夫掌選舉小吏部下大夫一人以貳之隋開皇七年制諸州歲貢士十八年又詔京官五品已上總管刺史以主行修謹清平幹濟二科舉人皆吏部主之初漢魏之郡佐史皆刺史二千石辟署北齊多繇中用故州郡辟士之權移於朝廷後周復遵古制及隋皆歸吏部故朝廷貢舉之制盛矣唐循隋制諸郡貢士嘗貢之科有秀才有明經有進士有明法有明書有明筭自京師崇文館國子監郡縣皆有學焉每歲仲冬國子郡縣課試其成者長吏會屬僚設賓主陳俎豆備管弦牲用少牢行鄉飲酒歌鹿鳴之詩徵耆艾敘少長而觀焉就餞而與計偕其不在學而舉者謂之鄉貢至尙書省始繇戶部集閱而關於考功課試可者爲第武德舊制以考功郎中監試貢舉貞觀已後則考功員外郎專掌之武后載初元年策問貢舉人于雒城殿前試



貢舉人自此而始長安二年又教人習武藝每歲如明經進士之法行鄉飲酒之禮送于兵部明皇開元二十四年制令禮部侍郎專掌貢舉初因考功員外李昂詆訶進士李權文章大爲權所凌訐朝議以郎官地輕故移於禮部又詔應試進士等唱第訖其所試送中書門下詳覆是年始置禮部貢舉印其後禮部侍郎闕人亦以佗官主之謂之權知貢舉其知貢舉者皆朝廷美選二十九年京師又置宗玄館諸州置道學生有差道學生謂之道舉課試與明經同先是掌貢舉官親族皆於禮部差郎官考試有及第者尚書覆定及第者仍別奏謂之奏移送吏部令考功員外試縛侍郎覆定及第者仍別奏謂之別頭舉人代宗永泰元年始置兩都貢舉禮部侍郎官號皆以兩都爲名每歲兩地別所及第至大曆十一年停東都貢舉德宗貞觀十六年又罷別頭舉人文宗太和元年又權於東都置貢舉又有制詔舉人皆標其目而搜揚知之志烈秋霜詞殫文律抱器懷能茂才異等才膺管樂道侔伊召賢良方正軍謀宏遠明於體用達於吏理之類始於顯慶盛於開元貞元皆試於殿廷乘輿親臨觀之試已糊其名於中考之策高者



特授美官其次與出身又有吏部科目曰宏詞拔萃  
平判官皆吏部主之又有三禮三傳三史五經九經  
開元禮等科有官階出身者吏部主之白身者禮部  
主之其吏部科目禮部貢舉皆各有考官大抵銓選  
屬吏部貢舉屬禮部崇文館生屬門下省國子學生  
屬國子監州府鄉貢屬長官職司在功曹司功五代  
因之夫以賢爲寶得士者昌聖賢之談邦國之制也  
貢舉之設王政攸先方冊所傳舊章不墜或有公直  
以馳譽精識以知名不徇乎朋家咸求乎藝實故能  
若水鑒之皦衡石之平增臺閣之輝副文儒之望亦  
有昧於遠體拘乎小節或鄭雅而靡辨或涇渭而共  
流以公器而徇私恩採虛聲而損至學俾白駒以興  
刺使嘉魚而絕詠斯爲蠹政良足憤惋今乃絕善惡  
之迹著得失之效用爲勸沮以示方來凡貢舉部七  
門

條制第一

夫鄉舉里選辨論官材蓋成周之制也所以洽烝髦  
之詠成思皇之美藹藹而多吉士焉及諸侯力政家  
邦異俗斂才之道闕而無聞漢室龍興首議聘士其  
後增設科目詳延英彥至乃限郡國以所舉之數威



守相以蔽賢之罰馳單車以博訪詔有位以薦能計  
借續食既優其待遇署職補吏復著於品式課試之  
典亦增損之有殊年族之制固因革之斯異稽於前  
志咸用論次以為貢籍故事云

周官大司徒職教萬民而賓興之一曰六德二曰六  
行三曰六藝詩書禮樂謂之四術四術既修九年大  
成凡士之有善鄉先論士之秀者升諸司徒曰選士  
司徒論選士之秀者而升諸學曰俊士既升而不征  
者曰造士大樂正論造士之秀升諸司馬曰進士司  
馬論進士之賢者及鄉老郡吏以賢能之書皆獻於

王登於天府藏於祖廟內史書其二而行焉

書其二謂寫其

副在其職也則鄉老卿大夫舉賢能而賓其禮司徒  
教三物而興諸學司馬辨官材以定其論太宰詔廢  
置而持其柄內史贊予奪而二於中司士掌其版而  
知其數論定然後官之任定然後爵之位定然後祿  
之蓋擇材取士如此之詳也

漢高帝十一年二月下詔曰賢士大夫既與我定有  
天下而不與吾共安利之可乎有肯從我遊者吾能  
尊顯之以布告天下御史中執法下郡守其有稱意  
明德者必身勸為之駕

有賢者郡守身自往勸遣詣勉令至京師駕車遣之



相國府署行義年行狀年紀也有而弗言覺免年老癯病

勿遣

惠帝四年正月詔舉人孝悌力田者復其身

武帝建元元年十月詔天下舉賢良方正直言極諫

之士其理申商韓非蘇秦張儀之言亂國政皆罷之

申商韓非刑名之學蘇張縱橫之說竝不用也

元光元年十一月舉賢良董仲舒對策請令諸侯列

卿郡守二千石各擇其吏人之賢者歲貢各二人以

給宿衛且以觀大臣之能所貢賢者有賞不肖者有

罰夫如是諸侯吏二千石皆盡心於求賢天下之士

可得而官使也授之以官以使其材也無以日月為功實試賢

能為上量材而授官錄德而定位錄謂存錄也則廉恥殊

路賢不肖異處矣帝因是令郡國舉孝廉各一人孝者

善事父母者也廉謂清潔有廉隅者也

五年詔徵吏民有明當代之務習先聖之術者縣次

續食令與計儻計者上計簿使也郡國每歲遣詣京師上之儻者俱也令所徵之人與上

計者俱來而縣次給之食也

元朔元年十一月詔曰公卿大夫所使總方畧一統

類廣教化美風俗也夫本仁祖義褒德錄賢勸善刑

暴五帝三王所繇昌也朕夙興夜寐嘉與宇內之士



臻於斯路故旅耆老

加惠於耆老之人若賓旅也

復孝敬選豪俊

講文學稽叅政事祈進民心深詔執事興廉舉孝庶

幾成風紹休聖緒夫十室之邑必有忠信三人竝行

厥有我師今或至闔郡而不薦一人是化不下究而

積行君子壅於上聞也二千石官長紀綱人倫將何

以佐朕燭幽隱勸元元厲蒸庶崇鄉黨之訓哉且進

賢受上賞蔽賢蒙顯戮古之道也其與中二千石禮

官博士議不舉者罪有司奏議曰古者諸侯貢士一

適謂之好德再適謂之賢賢或適謂之有功乃加九

錫不貢士一則黜爵再則黜地三而黜爵地畢矣夫

附下罔上者死附上罔下者刑與聞國政而無益於

民者斥在上位而不能進賢者退此所以勸善黜惡

也今詔書昭先帝聖緒令二千石舉孝廉所以化元

元移風易俗也不舉孝不奉詔當以不敬論不察廉

不勝任也當免奏可

凡郡國之官非傅相其他既自置置又調屬僚及部人賢者舉

為秀才廉吏而貢於王庭多拜為郎居三署無嘗員或至千人屬光祿勳故鄉較牧守居閑待詔或郡國

貢選公車徵起悉在焉光祿勳復於三署中銓第即吏歲舉秀才廉吏出為佗官以補缺員

五年六月公孫弘以儒術為丞相天下之學士靡然

向風時太嘗孔臧等議曰請為博士官置弟子五十

人復其身太嘗擇民年十八以上儀狀端正者補博



士弟子郡國縣道邑有好文學敬長上肅政教順鄉里出入不悖所聞令相長丞上屬所二千石謹察可者與計偕詣太嘗得受業如弟子一歲皆課能通一藝以上補文學掌故缺其高第可以為郎中太嘗籍奏即有秀才異等輒以名聞其不事學若下材及不能通一藝罷之而請諸能稱焉

孝昭始元初遣故廷尉三平等五人前為此官今不居官皆謂之故持節行郡國舉賢良

後漢光武十二年詔三公舉茂才各一人監御史司隸州收歲舉茂才各一人

章帝建初元年詔曰夫鄉舉里選必累功勞今刺史

守相不明真偽茂才孝廉歲以百數漢曰秀才後漢避光武諱故曰

茂才魏復曰秀才既非能者而當授之政事甚無謂也每尋

前代舉人貢士或起猷畷不繫閑閱敷奏以言則文章可採明試以功則理有異迹文質彬彬朕甚嘉之

始復用前漢丞相故事以四科辟士武帝因董仲舒之言立制故事

在丞相府今復用之第一科補西曹南閣祭酒二科補儀曹三科補四辟八表四科補賊曹凡所

舉士先試之以職乃得充選其德行尤異不宜試職者疏於佗狀舉非其人兼不舉者罪

和帝時大郡口五六十萬舉孝廉二人小郡二十萬



并有蠻夷者亦舉二人帝以為不均下公卿會議司徒丁鴻司空劉方上言凡口率之科宜有偕品蠻夷雜錯不得為數自今郡國率二十萬口歲舉孝廉一人四十萬二人六十萬三人八十萬四人百萬五人百二十萬六人不滿二十萬二歲一人不滿十萬三歲一人帝從之又制緣邊郡口十萬以上歲舉孝廉一人不滿十萬二歲舉一人五萬以下三歲一人永元十四年司空徐防上疏曰臣以為博士及甲乙試策宜從其家章句開五十難以試之解釋多者為上第引文明者為高說若不依先師義有相伐伐謂自相

攻伐也

皆正以為非五經各取上第六人論語不宜射

策雖所失或以差可矯革

東觀記防上疏曰試論語本文章句粗通度物以射

策與令學者務本有所一心專精師門思核經意事得其實道得其真於此弘廣經術尊崇聖業有益於化雖從來以大經衰微學問 詔書下公卿皆從防言塞淺誠宜反本以矯其失

安帝永初二年九月詔居鄉里有廉清孝順之稱才

任理人者國相歲移名與計偕上尚書公府通調令

得外補

順帝永建六年七月以太學新成試明經下第者補

弟子增甲乙科員各十人除郡國耆濡九十人補舍

人



九月初令郡國舉孝廉限年四十以上諸生通章句  
 文史能賤奏乃得應選其有茂才異行若顏淵子奇  
 不拘年齒時尚書左雄上言郡國孝廉古之貢士則  
 宰民宣協風教若有面牆則無所施用孔子曰四十  
 不惑禮稱強仕請自今孝廉年不滿四十不得察舉  
 皆先詣公府諸生試家法文吏課賤奏副之端門練  
 其虛實以觀異能以美風俗有不承科令者正其罪  
 法若有茂才異行若顏淵子奇自可不拘年齒帝從  
 之於是班下郡國又云尚書僕射胡廣以雄議改察  
 舉之制限年四十以上儒者試經  
 學文吏試章奏與尚書史敞郭虔奏駁曰選舉因才  
 無拘定制漢承周秦兼覽殷夏祖德師經參雜伯軌  
 聖主賢臣世以制理貢舉之制莫或因革今以一臣  
 之言刻奏舊章利便未明衆心莫厭愚以為可宣下  
 百官參其同異帝不從尚書令黃瓊又以雄所上孝廉之選專  
 用儒學文吏於取士之義猶有所遺乃奏增孝弟及  
 能從政者為四科事竟施行

桓帝建和元年詔諸學生年十六以上比郡國明經  
 試次第上名高第十五人上第十六人為郎中中第  
 十七名為太子舍人下第十七人為王家郎  
 永壽二年詔復課試諸生補郎舍人其後復制學生  
 滿二歲試通二經者補文學掌故其不能通二經者  
 須後試復隨輩試試通一經者亦得為文學掌故考



滿二歲試能通三經者擢其高第為太子舍人其不得第者後試復隨輩試第復高者亦得為太子舍人已為太子舍人滿二歲能通四經者擢其高第為郎中其不得第者後試復隨輩試第復高者亦得為郎中滿二歲試能通五經者擢其高第補吏隨才而用其不得第者後試復高亦得補吏

魏文帝黃初二年正月初令郡國口滿十萬者歲察孝廉一人其有秀異無拘戶口三府議舉孝廉本以德行不復限以試經

司徒華歆以為喪亂以來六籍墜廢當務存立以崇王道夫制法者所以經盛衰今聽孝廉不以經試恐學業遂從此而廢若有秀異可特徵用患於無其人可患不得哉帝從其言又魏郡潁川典農中郎將裴

潛奏通貢舉比之郡國繇是農官進仕路泰

三年正月詔曰今之計考古之貢士也十室之邑必有忠信若限年然後取士是呂尚周晉不顯於前世也其令郡國所選勿拘老幼儒通經術吏達文法到皆試用有司糾正不以實者

明帝太和四年二月詔曰世之質文隨教而變兵亂以來經學廢絕後生進趣不繇典謨豈訓導未洽將進用者不以德顯乎其郎吏學通一經才任牧民博士課試擢其高第者亟一用其浮華不務道本者皆罷退之



晉元帝初制揚州歲舉二人諸州各一人先是以兵亂務存慰悅遠方孝秀到不策試普皆除署至是帝申明舊制皆令試經有不中舉者制刺史太守免官大典三年秀孝多不敢行其有到者竝託疾帝欲除署孝廉而秀才如前制尚書郎孔坦奏議曰臣聞經邦建國教學爲先移風崇化莫尚斯矣古者且耕且學三年而通一經以平康之世猶假漸漬積以日月自喪亂以來十有餘年干戈載揚俎豆禮戢家廢講誦國闕庠序率爾責試竊以爲疑然宣下以來涉歷三載累遇慶會遂未一試揚州諸郡接近京都懼累其君父多不敢行其遠州邊郡掩誣朝廷冀於不試冒昧來赴既到審試遂不敢會臣愚以不會與不行其爲闕也同若當徧加除署是爲肅法奉憲者失分僥倖投射者得官頽風傷教懼於是始夫王言如絲其出如綸臨事改制示短天下人聽有感臣竊惜之愚以王命無二憲制宜信去年察舉一皆試策如不能試言不拘到遣歸不署又秀才雖以試策亦記問經義苟所未學實難闡通不足復曲碎乖例違舊造異謂因其不會徐更革制可申明前下崇修學較普延五年以展講習鈞法齊訓示人軌則夫信之與法



為政之綱施之家室猶弗可二况經國之典而可翫

黷乎帝納焉聽孝廉申至七年秀才如故

宋制丹陽吳郡會稽吳興四郡歲舉二人餘郡各一

人凡州秀才郡孝廉至皆策試天子或親臨之及公

卿所舉皆屬于吏部序才銓用凡舉得失各有賞罰

失者其人宜加禁錮年月多少隨辜議制

晉末諸州郡所遺秀

才孝廉多非其人高祖作相表天子申明舊制依舊策試

文帝元嘉中限年三十而仕

孝武卽位仕者不復拘老幼

明帝泰始三年都令史駱宰議策秀孝格五問竝得

為上四三為中二為下一不合與第尚書郎謝超宗

議以為片辭折獄十言挫衆魯史褒貶孔論興言皆

無俟繁而後秉裁夫表事之淵析理之會豈必委牘

方切治道非患對不盡問患以嘗文弗奇必使一通

峻正寧劣五通而嘗與其俱奇一亦宜採詔從宰議

南齊習宋代限年之制然而鄉舉里選不覈才德其

所進取以官婚曹籍為先遂令甲族以二十登仕後

門以三十試吏故有有增年矯貌以圖進者其時士

人皆厚結姻援奔馳造請浸以成俗

和帝時梁高祖為相上表曰聞中間立格甲族以三



十登仕後門以過立試吏求之愚懷抑有未達何者  
設官分職惟才是務若限歲登朝必增年就官故貌  
實幼童籍已踰立滓穢名教於斯爲甚炤依表施行  
梁初無中正制年二十有五方得人仕  
天監四年正月詔曰今九流嘗選年未三十不通一  
經不得解褐若有才同甘顏勿限年次  
五年正月詔曰在昔周漢取士方國頃代彫訛幽仄  
罕被人孤地絕用隔聽覽士操淪胥因茲靡勸豈其  
嶽瀆縱靈偏有厚薄實繇知與不知用與不用耳朕  
以菲德君此兆民而兼明廣炤屈於當戶飛耳長目  
不及四方永言愧懷無忘旦夕凡諸郡國舊族邦內  
無在朝位選官搜括使郡有一人

七年二月詔於州郡縣置州望郡宗鄉豪各一人專  
掌搜薦

八年五月詔曰學以從政殷勤往哲祿在其中抑亦  
前事朕思闡治綱每敦儒術輔閭闔館造次以之故  
負褒成風甲科間出方當置諸周行飾以青紫其有  
能通一經始末無倦者策貫之後選可量加敘錄雖  
復牛監羊肆寒品後門竝隨才試吏勿有遺隔  
陳依梁制凡年未三十不得入仕唯經學生策試得



第諸州迎主簿西曹左奏及嘗爲挽郎得未壯而仕諸郡惟正王爲丹陽尹經迎得出身者亦然庶姓尹則否有高才異行殊勲別降恩旨敘用者不在嘗例後魏孝文延興二年六月詔頃者州郡選貢多不以實碩人所以窮處幽仄鄙夫所以超分妄進豈所謂旌賢樹德者也近年貢舉尤爲猥濫自今年貢舉所遣皆須盡州郡之高才極鄉閭之俊選

太和十五年八月詔諸州舉秀孝先盡才學

宣武詔庶族子弟年未十五不聽入仕

封軌爲考功郎中奏請遣四門博士明經學者簡試

諸州學生詔從之

孝明熙平元年初聽秀才對策第居中上敘之

莊帝初詔求德行文藝政事強直者縣令郡守刺史皆敘其志業且以表聞待三人以上縣令太守刺史賞一階舉非其人者黜一階

北齊選舉多沿後魏之制其課試之法中書策秀才集書策考貢士考功郎中策廉良天子嘗服乘輿出生於朝堂中楹秀孝各以班草對字有脫誤者呼起立席後書有濫劣者飲墨水一升文理孟浪者奪席脫容刀



後周文帝霸府時蘇綽為六條詔書其四曰擢賢良  
 綽深思本始懲魏齊之失罷門資之制其所察頗加  
 精慎  
 武帝建德六年七月詔山東諸州舉有才者上縣六  
 人中縣五人下縣四人赴行在所共論政理得失  
 九月詔東土諸州儒生明一經已上並舉送那郡以  
 禮發遣  
 宣帝宣政元年八月詔制九條宣下郡州其八曰州  
 舉高才博學者為秀才郡舉經明行修者為孝廉上  
 州上郡歲三人下州下郡歲一人

隋文帝開皇七年正月制諸州歲貢三人  
 十六年六月制工商不得進仕

十八年八月詔京官五品以上及總管刺史並以志  
 行脩謹清平幹濟二科舉人

唐貢士之法多循隋制上郡歲三人中郡二人下郡  
 一人有才能者無嘗數其嘗貢之科有秀才有明經  
 有進士有明法有書有算自京師郡縣皆有學焉每  
 歲仲冬郡縣館監課試其成者長吏會屬僚設賓主  
 陳俎豆備管弦性用少牢行鄉飲酒禮歌鹿鳴之詩  
 徵耆艾敘少長而觀焉既餞而與計偕其不在館學



州府志 條制一 卷之六 百三十九

而舉者謂之鄉貢舊令諸郡雖一二三人之限而實無嘗數到尚書省給繇戶部集閱而關於考功課試可者為第初秀才科第最高試方畧策五條有上上中上下中上凡四等貞觀中有舉而不第者坐其州長繇是廢絕自是士族所趨嚮惟明經進士二科而已其初止試策

貞觀八年詔加進士試讀經史一部開元二十四年以後復有秀才

舉其時以進士漸難而秀才本科無貼經及雜文之限反易於進士主司以其科廢久不欲收獎應者多落之三十年來無登第者至天寶初禮部侍郎韋陟始奏請有堪此舉者乃令官長時考其嘗年舉送者

九年五月二十日勅自今已後明經兼習周禮若儀禮者於本色內量減一選

高宗上元二年正月勅明經加試老子策二條進士加試帖三條

儀鳳三年五月勅自今已後道經孝經並為上經貢舉人並須兼通其餘經及論語任依嘗式

調露三年四月劉思立除考功員外郎先時進士但試策而已思立以其膚淺奏請帖經及試雜文自後

因以為嘗

永隆二年八月詔曰學者立身之本文者經國之資



豈可假以虛名必須徵其實效如聞明經射策不讀  
正經抄撮義條纔有數卷進士不尋史傳惟誦舊策  
共相模擬本無實才所司考試之日曾不簡練因循  
舊例以分數為限至於不辨章句未涉文者以人數  
未充皆聽及第其中亦有明經學業該深者惟許通  
六進士文理華瞻者竟無甲科銓綜藝能遂無優劣  
試官又加顏面或容假手更相囑請莫憚糾繩繇是  
僥倖路開文儒漸廢興廉舉孝因此失人簡賢任能  
無方可致自今已後考功試人明經試帖取十帖得  
六已上者進士試雜文兩首識文律者然後竝令試

策仍嚴加捉搦必材藝灼然合昇高第者竝即依令  
其明法并書算貢舉人亦量准此例即為嘗式

永淳二年三月初令應詔舉人竝試策三道即為永  
例

則天載初元年二月十四日試貢舉人于雒城殿前  
數日畢殿前試人自茲始也

長壽二年二月令貢舉人習則天所撰臣軌停通老  
子道德經

十月左拾遺劉承慶上疏曰伏見比年已來天下諸  
州所貢物至元日皆陳在御前惟貢人獨於朝堂拜



列但孝廉秀異國之英才既隨方物以充歲貢宜同  
珍幣列見王庭豈得金帛羽毛昇於玉陛之下賢良  
文學棄彼金門之外恐所謂貴財而賤義重物而輕  
人甚不副陛下好道之心尊賢之意伏請貢舉人至  
元日引見列在方物之前以播充庭之禮從之

長安二年正月初令天下諸州有練習武藝者每年  
准明經進士例舉送

中宗神龍二年二月制貢舉人停習臣軌依舊習老  
子

玄宗開元六年二月詔曰我國家敦古質斷浮豔禮

樂詩書是弘文德綺羅珠翠浮華弊風必使情見於  
詞不用言浮於行比來選人試判舉人對策剖析案  
牘敷陳奏議多不切事宜廣張華飾何大雅之不足  
而小能之是術自今已後不得更然

七年三月詔曰孝經者德教所先自頃已來獨宗鄭  
氏孔氏遺旨今則無聞又子夏易傳近無習者輔嗣  
注者亦甚甄明諸家所傳互有得失獨據一說能無  
短長其令儒官詳定所長令明經者習讀若將理等  
亦可兼行其習易者兼帖子夏易傳共爲一部亦詳  
其可否奏聞



五月太子左庶子劉子玄奏孝經註請廢鄭依孔老子注請停河上公行王輔嗣易傳非子夏所造禮部奏議請准令式孝經鄭註與孔傳依舊俱行子夏易傳無益後學不可將帖正經詔曰朕以全經道喪大義久乖淳感之性浸微流遁之原未息是用旁求廢簡遠及缺文欲使發揮異說同歸善道永惟一致之用以開百行之端間者諸儒所傳頗乖通義敦孔學者異鄭門之息滅尚今文者指古傳爲誣僞豈朝廷竝列書府以廣儒術之心乎况孔鄭大宗固多殊趣諸生會議會無所由而推求小疵其細已甚聚訟之訛人無則焉其何鄭二家可令仍舊行用王孔所註傳習者希宜存繼絕之典頗加獎飾子夏傳逸篇旣廣前令帖易者停

八年七月國子司業李元瓘上言三禮三傳及毛詩尚書周易等竝聖賢微旨生徒教業必事資經遠則斯道不墜今明經所習務在出身戒以禮記文少人皆諳讀周禮經邦之軌則儀禮莊敬之楷模公羊穀梁歷代宗習今兩監及州縣以獨學無友四經殆絕旣事資訓誘不可因循其學生望請各量配作業并貢人預試之日習周禮儀禮公羊穀梁竝請帖十通



五許其入策以此開勸卽望四海均習九經該備從之

十六年十二月二十四日國子祭酒楊瑒奏今之舉明經者主司不詳其術作之意每至帖試必取年頭年月孤經絕句自今已後考試者盡帖平文以存大典又曰今之明經習左氏者十無一二恐左氏之學廢又周禮儀禮公羊穀梁亦請量加優獎遂下制明經習左氏及通周禮等四經者出身免任散官

十七年三月國子祭酒楊瑒上言曰伏聞承前之例每年應舉嘗有千數及第兩監不過一二十人臣恐

三千學徒虛費官廩兩監博士濫靡天祿臣竊見入仕諸色出身每歲向二千餘人方於明經進士多十餘倍自然服勤道業之士不及胥吏以之效官豈識先王之禮義陛下設學較務以勸進之有司爲限約務以黜退之臣之微誠實所未曉今監司課試十已退其八九至及第十又不收一二若長以此爲限恐儒風漸墜小道將興若以出身人多應須諸色都減豈在獨抑明經進士也帝然之

二十一年御注老子成詔天下每歲貢士減尚書論語策而加老子焉



九  
條制一  
卷之六  
三十一  
二十二年三月詔曰博學多才道術醫藥舉人等先  
令所司表薦兼自聞達勅限以滿須加考試博學多  
才舉人限今來四月內集道術醫藥舉人限閏三月  
內集其博學科試明三經兩史已上帖試稍通者多  
才科試經國商畧大策三道并試雜文三道取其詞  
氣高者道術醫藥舉取藝業優長試練有效者宜令  
所繇依節限處分

二十三年十月詔曰文學政事必在考言孝悌力田  
必須審行頃從一槩何謂四科其孝悌力田舉人宜  
各自疏比來事迹爲鄉閭所委者朕當案覆別有處  
分

二十四年三月詔曰每歲舉人求士之本專典其事  
寧不重歟頃年以來惟考功郎所職位輕務重名實  
不倫欲盡委長官又銓選猥積且六官之列體骨是  
同况宗伯掌禮宜主賓薦自今已後每歲諸色舉人  
及齋郎等簡試竝於禮部集旣衆務煩雜仍委侍郎  
專知

二十五年正月詔曰致理興化必在得賢強識博聞  
可以從政且今之明經進士則古之孝廉秀才近日  
以來殊乖本意進士以聲韻爲學多昧古今明經以



帖誦爲功罕窮旨趣安得爲敦本復古經明行修以此登科非選士取賢之道也其明經自今已後每經宜帖十取通五已上免舊試一帖仍案問大義十條取通六已上免試經策十條令答時務策三首取粗有文性者與及第其進士宜停小經准明經例帖大經十帖取通四已上然後准例試雜文及策考通與及第其明經中有明五經以上試無不通者進士中兼有精通一史能試策十條得六已上者委所司奏聽進止其應試進士等唱第訖具所試雜文及策送中書門下詳覆其所問明經大義日仍須對同舉人

考試庶能否共知取舍無媿有功者達可不勉與

此詔

因侍郎姚奕奏也

二十六年正月丁丑制曰古者鄉有序黨有塾將以弘長儒教誘進學徒化人成俗率繇於是斯道久廢朕用憫焉宜令天下州縣每一鄉之內里別各置學仍擇師資令其教授其諸州鄉貢明經進士每年引見訖更令國子監謁先師所司設食學官等爲之開講質問疑義且公侯之緒皆稟義方學禮聞詩不應失墜容其微倖是長慢游如聞比來弘文崇文學生緣是貴胄子孫多有不專經業便與及第深謂不然



自今已後宜一依令式試

壬辰詔曰孝悌力田風化之本苟有其實未必求名  
比年將同舉人考試詞策便與及第以嘗為科是開  
僥倖之門殊乖敦勸之意自今已後不得更然其兼  
著狀迹殊尤者委所繇長官時以名薦朕當別有處  
分更不須隨考使例申送

二十九年正月於京師置崇玄館諸州置道學生徒

有差

京都各百人諸州無嘗員習老莊  
文列謂之四子蔭第與國子監同謂之道舉舉

送課試與明經同凡舉司課試之法帖經者以所習  
經掩其兩端中間惟開一行裁紙為帖凡帖三子隨

時增損可否不一或得四得五得六者為通

後舉人積多故

其法益難務欲落之至有帖孤章絕句疑似參互者  
以惑之甚者或上抵其注下餘一二字使尋之難知  
謂之例援既甚難矣而舉人則有注聯孤絕索幽隱  
為詩賦而誦習之不過十數篇則難者悉詳矣其於  
平文大義或多牆面焉

冊府元龜



冊府元龜 條制一

冊府

冊府元龜

巡按福建監察御史臣李嗣京 訂正

新建縣舉人 臣戴國士參閱

知建陽縣事 臣黃國琦較釋

貢舉部 二

條制第二

唐天寶元年四月詔曰化之原者曰道道之用者為德其義至大非聖人孰能章之昔有周季年代與道喪我列祖玄元皇帝乃發明妙本汲引生靈遂著玄經五千言用救時弊義高象繫理貫希夷非百氏之



能儔豈六經之所擬承前習業人等以其卷數非多列在小經之目微言與旨稱謂殊乖自今已後天下應舉除崇玄學生外自餘所試道德經宜並停仍令所司更詳擇一小經代之其道經爲上經德經爲下經庶乎道尊德貴是崇是奉凡在遐邇知朕意焉

五月中書門下奏兩京及諸郡崇玄學生等准開元二十九年正月制前件人合習道德及南華通玄冲虛等四經又准天寶元年二月制改庚桑子爲洞靈真經准諸條補崇玄學亦合習讀伏准後制合通五經其洞靈真經人間少本臣近令諸觀尋訪道士全

無習者本既無廣業實難成并通玄冲虛二經亦恐文字不定玄教方闡學者宜精其洞靈等三經望付所司各寫十本較定訖付諸道採訪使頒行其貢舉司及兩京崇玄學生亦望各付一本今冬崇玄學人望且准開元二十九年正月諸條考試其洞靈真經請待業成後准式從之

二年三月十六日制崇玄生試及帖冊各減一條三年業成始依嘗式

七載五月詔曰道教之設淳化之源必在弘闡以敦風俗頃列四經之科將冠九流之首雖及門求進頗



有其人而韻與窮微罕聞達者豈專精難就為勸獎  
未弘天下諸色人中有通明道德經及南華等四經  
任於所在自舉各委長官考試申送其崇玄生出身  
自今以後每至選宜減於嘗例以為留放

十一載七月舉人帖及口試並宜對眾考定便唱通  
否

十二月勅禮部舉人比來試人頗非允當帖經首尾  
不出前後復取者也之乎頗相類之處下帖為弊已  
久須是釐革禮部起請每帖前後各出一行相類之  
處並不須帖是載禮部侍郎楊浚始開為三行  
不得帖斷

絕疑似明經所試一大經及孝經論語爾雅帖各有  
之言也

差帖既通而口問之一經問十義得六者為通而後

試策凡三條三試皆通者為第進士所試一大經及

爾雅舊制帖一小經并註開元二十五帖既通而後

試文試賦各一篇文通而後試策凡五條三試皆通

者為第經策全通為甲策道四帖通四帖以上為乙

策道三帖通三以下及策雖全通而帖經文  
不通四或帖經雖通四以  
上而策不通四皆為不第  
明法試律令各十帖試册

共十條律七條全通為甲通八以上為乙自七以下

為不第書者試說文字林凡十帖說文六帖試無嘗

限皆通者為第算者試九章海島孫子五曹張丘建



夏侯陽周髀五經綴術緝古帖各有差 九章九帖五經等七部各

一帖綴術六帖緝古四帖 兼試問大義皆通者為第凡眾科有能

兼學則加超獎不在嘗限案今科第秀才與明經同為四等進士與明法同為二等然秀才之科久廢而明經雖有甲乙丙丁四科進士有甲乙二科自武德以來明經惟有丙丁第進士惟乙科而已先試之期命舉人謁于先師有司卜日宿張於國學宰輔以下皆會而觀焉博集羣議講論而退禮部關試之日皆嚴設兵衛薦棘圍之搜索衣服譏訶出入以防假濫焉其進士大抵千人得第者一二明經倍之得第者

十一二其制誥舉人不有掌科皆標其目而搜揚之

試之日或在殿庭天子親臨觀之試已糊其名於中

考之文册高者特授以美官其次與出身開元以後

四海晏清士無賢不肖恥不以文章達其應詔而舉

者多則二千人少猶不減千人所收百纔有一

十二載七月詔天下舉人不得充鄉試皆須補國子

學生及郡縣學生然聽舉四門俊士停

十三載十月御含元殿親試博通墳典洞曉玄經詞

藻宏麗軍謀出眾等舉人命有司供食既暮而罷其

詞藻宏麗問策外更試詩賦各一首制舉試詩賦自



此始也  
是月道舉停習道德經加周易宜以來載為始  
十四載二月弘文館學生自今以後宜依國子監學生例帖試明經進士帖經並減半雜文及策皆須粗通仍永為嘗式

肅宗至德元年已後依前鄉貢

乾元元年四月詔曰國子監學生明經法帖策口試各十並通四已上進士通三與及第鄉貢明經准嘗式州縣學生放歸營農待賊平之後任依嘗式  
代宗寶應二年六月禮部侍郎楊綰上疏曰國之選

士必資賢良蓋孝友純備言行敦實居嘗育德動不違仁體忠信之資履謙恭之操藏器則未嘗自伐虛心而所應必誠夫如是故能率已從政化人鎮俗者也自叔葉澆詐茲道浸微爭尚文詞互相矜衒馬卿浮薄竟不周於時用趙壹虛誕終取擯於鄉閭自時厥後其道彌盛不思實行皆徇空名敗俗傷風備載前史古人比文章於鄭衛蓋有繇也近煬帝始制進士之科當時猶試策而已至高宗朝劉思立為考工員外郎又奏進士加雜文明經加帖從此積弊轉而成俗幼能就學皆誦當代之詩長而博文不越諸家



之集邇相黨與用致虛聲六經則未嘗開卷三史則皆同挂壁况復徵以孔門之道責其君子之儒者哉祖習既浮奔競爲尚矜能者曾無愧色勇進者但欲凌人以毀黷爲嘗談以向背爲已任投刺干謁驅馳於要津露才揚已宜騰於當代古之賢良方正豈有如此者乎朝之公卿以此待士家之長老以此垂訓欲其返敦朴懷禮讓守忠信識廉隅何可得也譬之於水其流已濁若不澄本何當復清方今聖德御天再寧寰宇四海之內顛顛向化皆延頸舉踵思聖朝之理也不以此時而理之則太平之制又乖矣凡國

之大柄莫先擇士自古哲后皆側席待賢今之取人令投牒自應殊非經國之體也欲望請依古制令縣令察孝廉審知在鄉閭有孝友信義廉恥之行加以經業才堪策試者以孝廉爲名薦之於州刺史當以禮待之試其所通之學其堪者送名於省自縣至省不得令舉人輒自陳牒比來有到狀保辨試牒等一切並停其所習經取左傳公羊穀梁禮記周禮儀禮尚書毛詩周易任通一經務取深達與旨旁通諸家之義試日差諸司官有儒學者對問每經問義十條問畢對策三道其策皆問古今理體及當時要務取



堪行用者其經義并策全通爲上第望付吏部便與  
官其經通八策通二爲中第與出身下第者罷歸其  
明經比試帖經殊非古義皆誦帖括與圖僥倖近有  
道舉亦非理國之體望請與明經進士並停其國子  
監人亦請准此如有行業不著所繇妄相推薦請量  
加貶黜所與數年之間人倫一變旣歸實學當識大  
猷居家者必修德業從政者皆修廉恥浮競自止敦  
龐自勸教人之本實在茲焉事若施行卽別立條制  
詔委左右丞相諸司侍郎御史大夫中丞給舍同議  
奏聞給事中李樞筠尚書左丞賈至京兆尹兼御史

大夫嚴武各奏議狀與綰同賈至議曰謹案夏之政  
尚忠殷之政尚敬周之政尚文文與忠敬皆統人之  
行也且謚號述行美於文文與則忠敬存焉是故前  
代以文取士本行文也繇詞以觀行則及詞也宣父  
稱顏子不遷怒不貳過謂之好學至乎修春秋則游  
夏之徒不能措一詞不亦明乎聞者禮部取人有乖  
斯義易曰觀乎人文以化成天下關雎之義曰先王  
以是經夫婦成孝敬厚人倫美教化移風俗蓋王政  
之所繇廢興也故延陵聽詩知諸侯之存亡今試學  
者以帖字爲精通不窮旨義豈能知遷怒二過之道



乎考文者以聲病爲是非惟擇浮艷豈能知移風易俗化天下之事乎是以上失其源而下襲其流波蕩不知所止先王之道莫能行也夫先王之道消則小人之道長小人之道長則亂臣賊子繇是生焉臣弑其君子弑其父非一朝一夕之故其所繇來者漸矣漸者何謂忠信之凌頹恥尚之失所未學之馳騁儒道之不舉四者皆繇取士之失也夫一國之士繫一人之本謂之風贊揚其風卿大夫也卿大夫何嘗不出于士乎今取士試之小道而不以遠者大者使于祿之徒趨馳末術是誘道之差也夫以蝸蚓之餌雜垂滄海而望吞舟之至不亦難乎所以食垂餌者皆小魚就科試者皆小藝四人之業士最關於風化近代趨士靡然向風致使祿山一呼而四海震蕩思明再亂而十年不復向使禮讓之道弘仁義之風著則忠臣孝子比屋可封逆節不得而萌也人心不得而搖也且夏有天下四百載禹之道喪而殷始興焉殷有天下六百祀湯之法棄而周始興焉周有天下八百年文武之政廢而秦始并焉觀三代之選士任賢皆取實行故能風俗淳一運祚長遠秦坑儒士二代而亡漢興雜三代之政弘四科之舉西京始振經術



之學東都終持名節之行至有外戚竊位強臣擅權  
弱主外立母后專政而社稷不隕終彼四百豈非學  
行扇化於鄉里哉厥後文章道弊尚於浮侈取士術  
異苟濟一時自魏至隋四百餘載三光分景九州阻  
域竊號僭位德義不脩是以子孫速顛享國咸促今  
國家革魏晉梁隋之弊承夏商周漢之業四隩旣宅  
九州攸同覆燾亭育合德天地安有捨皇王舉士之  
道從亂代取人之術此公卿大夫之恥也揚綰所奏  
實爲正論然自典午覆敗中原版蕩戎狄亂華衣冠  
遷徙南北分裂人多僞處聖朝一平區宇尚復因循

版圖則張閭井未設士居鄉土百無一二因緣官族  
所在耕桑地望繫數百年之外而身皆東西南北之  
人焉今欲依制鄉舉里選猶恐取士之未盡也請兼  
廣學較以弘訓誘今兩京有大學州縣有小學兵革  
一動生徒流離儒臣師氏祿廩無向貢士不稱行實  
胄子何嘗講習獨禮部每歲擢甲乙之第謂弘獎擢  
不亦謬歟祇足長浮薄之風啓僥倖之門矣其國子  
博士等望加員數厚其祿秩選通儒碩生間居其職  
十道大郡量大學館令博士出外兼領郡官召置生  
徒依乎故事保桑梓者鄉里舉焉在流寓者庠序推



焉朝而行之夕見其利如此則青青不復興刺擾擾  
繇其歸本矣人倫之始王化之先不過是也李廙等  
議與至協文多不載宰臣等奏以舉人舊業已成難  
於速改其今歲舉人望且許應舊舉來歲卽依新格  
廣德元年七月禮部侍郎楊綰上貢舉條目曰孝廉  
舉人請取精通一經每經問義二十條皆須旁通諸  
義深識微言試策三道每日問一道問古今理體取  
堪行用者經義及策全通爲上第望付吏部便與官  
義通七策通二爲中第與出身下第者罷之論語考  
經聖人深旨孟子儒門之達者望兼習此三者爲一

經其試如上先取在家有孝義廉恥謙恭之行好學  
不倦精通經義并堪對策者縣令徵於鄉里送名於  
州刺史與曹官對試以其通者送省旣是貢士刺史  
縣令不得以部人待之加其禮數隨朝集使以十月  
二十五日到省其鄉飲酒及至上都朝見并謁先師  
并依舊式又以寇難之故衣冠多去故鄉所居必聞  
才行斯在望許所在州縣且舉所諳知者秀才舉人  
准舊格惟試方畧策五條望令精通五經每經准孝  
廉例問義二十條對策五條每日試一道全通爲上  
第送中書門下超與處分十條通七策通四爲中第



送吏部與官下者罷之又國子監舉人亦請每歲本業博士推擇才行送名與祭酒依鄉貢例試通者送省舉人自縣至州皆不得輒自陳牒比來有到狀保辨停牒等請僉停明法舉人望付刑部考試疏入帝問翰林學士或以進士明經行來頗久不可頓令改業遂勅與舊法兼行

是月勅弘文崇文兩館生皆以資廕補充所習經業務須精熟楷書字體皆得正樣通七者與出身不通者罷之

二年五月罷歲貢孝悌力田及童子科從禮部侍郎揚綰奏也綰以孝悌之行宜有實狀童子越衆不在嘗科同之歲貢恐成僥倖之路

永泰元年始置兩都貢舉禮部侍郎官號皆以知兩都爲名每歲兩地別放及第

大曆三年四月復置童子科舉每歲本貫申送禮部同明經考試取十歲以下習一經兼論語孝經每卷誦文十科全通者與官通七已上者與出身仍每年冬本貫申送禮部同明經舉人例考試訖聞奏

十年五月詔今年諸色舉人並赴上都集

先是禮部侍郎賈至

以時艱歲歉舉人赴省者衆權奏兩都分理時禮部侍郎嘗奏以貢舉人合謁見異於選人並合上都集



冊解元新條制二

卷之六十四

舉舊章也是後不置東都貢舉

是月勅停童子科舉

德宗建中二年二月中書門下奏准制崇玄館學生

試日減策一道者其崇玄館附學官見任者既同行

事例合霑恩惟策一道不可更減大義兩條從之

六月勅孝廉科宜停

二年十月中書舍人趙贊權知貢舉先時進士試詩

賦各一篇時務策五道明經策三道贊奏以箴論表

贊代詩賦仍各試策三道應口問大義明經人明經

之目義以為先比來相承惟務習帖至於義理少有

能通經術寢衰莫不繇此今若頓取大義恐全少其

人欲且因循又無以勸學請約舉司舊例稍示考義

之難承前問義不形文字落第之後喧競者多臣今

請以所問錄於紙上各令直書其義不假文言既與

策有殊又事堪徵證憑此取舍庶歸至公如有義策

全通者五經舉人請准廣德元年七月勅超與處分

明經請減兩選伏請每歲甄獎不過數人庶使經術

漸興人知教本勅旨明經義策全通者令所司具名

聞奏續商量處分餘依

三年四月勅禮部應進士舉人等自今以後如有試



官并不合選并諸色出身人有應舉者先於舉司陳狀准例考試如才堪及第者送名中書門下重加考覈如實才堪卽令所司進納告身注毀官申准例與及第至選日仍稍優與處分其正員官不在舉限貞元二年六月詔自今已後舉選人有能習開元禮者舉人同一經例選人不限選數許集但問大義一百條試策三道全通者超資與官義通七十條策通二道已上者放及第已下不在放限其有試官能通者亦依正員官例處分其明經舉人有能習律一部以代爾雅者如帖義俱通於本色減兩選令卽日與官其明法舉人有能兼習一經小帖義通者依明經例處分

五年四月詔曰明經舉人所習爾雅多是草木鳥獸之名無益理道宜令習老子道德經以代爾雅其進士同大經例帖

六年九月勅本置兩館學士皆選勳賢胄子蓋欲令其講藝紹習家風固非開此倖門墮紊典教且令式之內具有條章考試之時理須精覈比聞此色倖冒頗深或假市門資或變易昭穆殊虧教化之本但長澆漓之風未補者務取闕員已補者自然登第用廢



既已乖實試藝又皆假人誘進之方豈當如此自今已後所司宜據式文考試定其升黜如有假代益准法處分

九年五月詔曰王者設教勸學攸先生徒肄業執禮爲本故孔子曰不學禮無以立又曰安上理人莫善於禮然則禮者蓋務學之本立身之端居安之大猷致治之要道屬詞比事而不裁之以禮則亂疏通知遠而不節之以禮則誣實百行之本源爲五經之戶牖雖聖人設教罔不會通而學者遵行宜有先後自項有司定議計功記習不量教化淺深義理難易遂

使脩傳學者例從冬集習禮經者獨授散官敦本勸人頗乖指要始務弘獎以廣儒風自今已後明經習禮記及第者亦宜冬集如中經兼習周易若儀禮者量減一選應諸色人中習三禮者前資及出身人依科目例白身人依貢舉例每經問大義三十條試策三道仍主司於朝官學官中簡選精通經術三五人聞奏主司與同試問質定通否義策全通爲上等轉加超獎大義每經通十五條已上策通兩道已上爲次等依資與官如先是員外試官者聽依正員例其習開元禮人問大義一百條試策三道全通者爲上



等大義通八十條已上策兩道已上為次等餘一切  
並准習三禮例處分其諸館學士願習三禮及開元  
禮者並聽仍永為嘗式

十年中書侍郎平章事齊抗奏罷禮部別頭舉人故  
事禮部侍郎掌貢舉其親故即試于考功謂之別頭  
舉人抗奏罷之

十二年三月國子司業裴肅奏爾雅為六經文字之  
楷模老子是聖人玄微之奧旨請勒天下明經進士  
五經及明一經進士五經及諸科舉人依前習道德  
經者宜准天寶元年勅處分應合習爾雅者並准舊

式初天寶元年尊崇道教以老子乃玄元皇帝微言  
與旨不可列為小經今有司以爾雅代老子至貞  
元五年四月宰臣又議云所習爾雅多是草木鳥獸  
之名無益理道又令舉人停爾雅改習道德經至是  
又改焉

十三年十二月顧少連為尚書左丞權知貢舉奏伏  
以取士之科以明經為首教人之本則義理為先至  
於帖書及以對策皆形文字并易考尋試義之時獨  
令口問對答之失覆視無憑黜退之中流議遂起伏  
請准建中二年十二月勅以所問錄於紙上各令直  
書其義不假文言仍請依經疏對奏勅宜依

十四年九月詔鄉貢武舉并應百隻箭及三十隻箭



人等今年宜權停時諫議大夫田敦因蒙召對奏言  
兵部武舉等每年嘗數百千人持挾弓矢出入皇城  
間恐非所宜上聞而矍然故命停之其實武舉者每  
歲不過十數人時議惡敦貴欲非短舊事奏議不實  
自是訖于貞元更不復置

十六年十二月勅禮部別頭舉人宜委禮部考試不  
須置別頭

十八年五月勅明經進士自今以後每年考試所收  
人明經不得過一百人進士不得過二十人如無其  
人不必要滿此數

十九年六月勅禮部舉人自春以來久愆時雨念其  
旅食京邑資用屢空其禮部舉人今年宜權停

憲宗元和二年十二月壬申禮部貢舉院奏五經舉  
人請罷試口義依前試墨義十條五經通五明經通  
六便放入第從之勅自今以後州府所送進士如迹  
涉疎狂兼虧禮教或曾爲官司科罰或曾任州府小  
吏一事不合入清流者雖薄有詞藝并不得申送入  
如舉送以後事發長吏停見任及已停替者殿二年  
本試官及司功官并貶降

三年五月兵部奏鄉貢武舉准貞元十四年九月詔



宜權停今請准舊例却置從之  
七年十二月權知禮部侍郎韋貫之奏試明經請停  
墨義依舊格問口義從之

十三年十月權知禮部侍郎庾承宣奏臣有親屬應  
明經進士舉者請准舊例送考功試之先是貞元十  
六年高郢掌貢請停考功別試識者是之至是始復  
穆宗長慶元年三月勅今年禮部侍郎錢徽下進士  
及第鄭朗等一十四人重試聞奏四月詔曰國家設  
文學之科本求實才苟容僥倖則異至公訪聞近日  
浮薄之徒扇為朋黨謂之關節干擾主司每歲策名

無不先定永言敗俗深用興懷鄭朗等昨令重試意  
在精覈藝能不於異書之中固求深僻題目貴令所  
試成就以觀學藝淺深孤竹管是祭天之樂出於周  
禮正經閱其呈試之文都似不知本事詞律鄙淺蕪  
累至多亦令宣示錢徽庶其深自懷愧誠宜盡棄以  
警將來但以四海無虞人心方泰用引寧僭式示殊  
恩特掩爾瑕庶明予志孔溫業趙存約竇狗直所試  
粗通與及第盧公亮等十人並落下錢徽從別勅處  
分自今以後禮部舉人宜准開元二十五年勅及第  
訖所試雜文并策送中書門下詳覆



二年二月諫議大夫殷侑奏謹案春秋二百四十二年行事王道之正人倫之紀備矣故先師仲尼稱志在春秋歷代立學莫不崇尚其教伏以左傳卷軸文字比禮記多較一倍公羊穀梁比尚書周易多較五倍是以國朝舊制明經若大經中經能習一傳卽放冬集然明經爲學者猶十不一二今明經一例冬集人之掌情趨少就易三傳無復學者伏恐周公之微旨仲尼之新意史官之舊章將墜於地伏請置三傳科以勸學者左傳問大義五十條公羊穀梁各問大義三十條策三道義通七以上策通二以上與及第

其白身應者請同五經例處分其先有出身及前資官應者請唯學究一經例別處分又奏歷代史書皆記當時善惡繫以褒貶垂裕勸戒其司馬遷史記班固范曄兩漢書旨義詳明懲惡勸善亞於六經堪爲代教伏惟國朝故事國子學有文史直者弘文館弘文生並試以史記兩漢書三國志又有一史科近日已來史學都廢至於有身處班列朝廷舊章昧而莫知者况乎前代之載焉能知之伏請量前件史科每史問大義一百條策三道義通七策通二以上爲及第能通一史者白身請同五經三傳例處分其有出



身及前資官應者請同學究一經別處分其有出身及前資官稍優與處分其三史皆通者請錄奏聞特加獎擢仍請班下兩都國子監任生徒習請勅旨宜依仍付所司

三年禮部侍郎王起掌貢舉先是貢舉俛濫勢門子弟交相酬酢寒門俊造十棄六七及元稹李紳在翰林浮怒其事故有覆試之科及起考貢士奏曰伏以禮部放榜已是成名中書重覆尚未及第若重覆之中萬不一定則放榜之後遠近誤傳其於事理實為非便請今年進士堪及第者本司考試訖其詩賦先送中書門下詳覆候勅却下本司然後准例大字放榜從之

冊府元龜

冊府元龜

貢舉部

卷之六百四十一

十九